

# Gwom 'Borga/ Isi ki Gwo ma MATTA mo

*Gwo jin Beledhu goma Yesus Kristhos mo*

<sup>1</sup> Gwo jin 'kwaru mo mmobele'th gwo mo goma Yesus Kristhos mo jin ta ya/ ma Dawuu'd mo dhali ya/ ma Ibrahiim mo.

<sup>2</sup> Ibrahiim ta'da baba ma Is/hak mo dhala Is/hak ta'da baba ma Yakuub mo dhala Yakuub ta'da baba ma Yahuusa mo dhali ikam piti mo be. <sup>3</sup> Dhala Yahuusa ta'da baba ma Paaris mo dhala Saarah mo ka Thamar mo. Dhala Paaris ta'da baba ma Hasruun mo dhala Hasruun ta'da baba ma Araam mo. <sup>4</sup> Dhala Araam ta'da baba ma Aminadaab mo dhala Aminadaab ta'da baba ma Nahshuun mo dhala Nahshuun ta'da baba ma Salmuun mo be. <sup>5</sup> Dhala Salmuun ta'da baba ma Bu/as ka Rahab mo dhala Bu/as ta'da baba ma Ubiid ka Ra/uuth mo dhala Ubiid ta'da baba ma Yassa mo. <sup>6</sup> Dhala Yassa ta'da baba ma Dawuu'd jin ta'da malik mo be.

Dhala Dawuu'd ta'da baba ma Sulemaan ki ash ma Uriyya mo <sup>7</sup> dhala Sulemaan ta'da baba ma Rahabaam mo dhala Rahabaam ta'da baba ma Abiyya mo dhala Abiyya ta'da baba ma Aasa mo.

<sup>8</sup> Dhala Aasa ta'da baba ma Yahushapaath mo dhala Yahushapaath ta'da baba ma Yuram mo dhala Yuram ta'da baba ma Ussiyya mo <sup>9</sup> dhala Ussiyya ta'da baba ma Yutham mo dhala Yutham ta'da baba ma Ahaas mo dhala Ahaas ta'da baba ma Hiskiyya mo. <sup>10</sup> Dhala Hiskiyya ta'da baba ma

Manassa mo dhala Manassa ta'da baba ma Aamuun mo dhala Aamuun ta'da baba ma Yushiyya mo <sup>11</sup> dhala Yushiyya ta'da baba ma Yakunya mo dhali ikam piti mo ka tee jin bu'thkunu uni mo e Pam Baabil mo be.

<sup>12</sup> Dhali 'ko'di mo jin bu'thkunu uni mo e Pam Baabil mo tani Yakunya ta'da baba ma Sha/alti/iil mo dhala Sha/alti/iil ta'da baba ma Sarubbaabil mo be. <sup>13</sup> Dhala Sarubbaabil ta'da baba ma Abihud mo dhala Abihud ta'da baba ma Aliyagiim mo dhala Aliyagiim ta'da baba ma Aasuur mo. <sup>14</sup> Dhala Aasuur ta'da baba ma Saaduug mo dhala Saaduug ta'da baba ma Akiim mo dhala Akiim ta'da baba ma Aliyuud mo <sup>15</sup> dhala Aliyuud ta'da baba ma Ali/aasar mo dhala Ali/aasar ta'da baba ma Mattaan mo dhala Mattaan ta'da baba ma Yakuub mo. <sup>16</sup> Dhala Yakuub ta'da baba ma Yuusup jin ta'da kath ma Mariyam mo, Mariyam jin dho'thi'da Yesus mo, a'di jin yulkunu gway ka Kristhos mo be.

<sup>17</sup> Wakan 'pena risa nya Kum yil 'pena Ibrahiim mo ntaga Dawuu'd mo tani uni 'koni 'kume'd i'ce'dka dojon ka nya Kum yil mo, dhali 'pena Dawuu'd mo tani ntagi mo jin bu'thkunu uni mo e Pam Baabil mo tani 'koni 'kume'd i'ce'dka dojon ka nya Kum yil mo, dhali 'peni mo jin bu'thkunu uni mo e Pam Baabil mo tani ntaga Kristhos mo tani 'koni 'kume'd i'ce'dka dojon ka nya Kum yil mo be.

### *Mondho'th ma Yesus mo be*

<sup>18</sup> Dhali dho'th ma Yesus Kristhos a'di bu'thki mo yan kansan mo be. Ka ta'dam piti jin ta'da Mariyam karkunu mo goma Yuusup mo tani ntwa/a/ ki uni 'konuki gam me'd mo tani ayim

gamkunu mo ka 'ci mbwa ki Shi/in Dhelelad-helel mo be. <sup>19</sup> Dhala kathim piti ka Yuusup mo mmotana a'di wathinj kar/e mo dhali mmo'tena a'di bwa mo mmokara yim ki mon'the is mo tani a'di dina gwo mbwa mo mmothoson gwo jin 'kwaru mo mmodhala yim 'pen ki kup mo be. <sup>20</sup> Hili ki a'di dina gwo yansan mbwa mo tani hili mo mo ma, aman'doyu gwo gi Tapa piki a'di i is ki jan mo mmo/o gwo mo ki: Yuusup ya/ma Dawuu'd, dhalki is ki ko/ mo ma mmobudha Mariyam ki ashim pini mo haali/ a'di caan jin bwaakina a'di mo tani a'di 'peni Shi/in Dhelelad-helel mo be. <sup>21</sup> Ayim midi dho'th ya/ mo dhali / e mini yer a'di gway ka Yesus mo haali/ a'di midi wo<sup>th</sup> 'kwanim piti 'peni miinthus buni mo be. <sup>22</sup> Aris gwo gwansan bu'thki embul mo mo kun minu thim mo jin ona Tapa ka mançi gwom piti kadhamo/ mo ki:

<sup>23</sup> Hili nyaran gana/ midi bwaa mo dhali dho'th ya/ mo,

dhali gway piti minu yuk ka Imanu/iil mo ('pemen piti jin o'd ka Arumgimis di'd e ana mo).

<sup>24</sup> Ka Yuusup merki e mo 'peni mo/ish e mo tani a'di miiki'd me'd jin kankin ma man'doyu gwo gi Tapa a'di gwo mo. A'di bu'thki a'di mo mmota ashim piti mo be. <sup>25</sup> Hili a'di diki misha yim mo naskina/ ntaga yim dho'thki ya/ mo. Dhali a'di ki yer a'di gway ka Yesus mo be.

## 2

### *Mombut jin Buta 'Kwani kun Yukayuk mo*

<sup>1</sup> Dhali ka Yesus dho'thkunu mo e Pam Beetlaham gi Pa Yahuudiyya ka tee ma Hirodus

jin ta'da malik mo tani hili 'kwani kun yukayuk  
 'peni mom'pesho'k pu'dkin mo e Pa Urushaliim  
 mo mmo/o gwo mo ki: <sup>2</sup> Mane a'di jin dho'thkunu  
 mo mmota malik gi 'Kwani Yahuuda/ mo? Haali/  
 aman parkina acul piti e mo e mom'pesho'k  
 mo dhali aman iikina mo mmoluŋ a'di mo be.

<sup>3</sup> Ka Hiroodus jin ta'da malik cikki gwo yansan  
 mo tani a'di mur ma du mo dhali aris 'kwani  
 gi Pa Urushaliimi 'baar mo nyakki a'di mo be.

<sup>4</sup> Dhali a'di ki tul aris igasiis kun can is mo dhali  
 iman'kwar to gi 'kwani mo. A'di ki dot̄ uni gwo  
 mo gom mo jin minu dhodha Kristhos nycine/  
 mo. <sup>5</sup> Dhali uni ki tor a'di gwo mo ki: E Pam  
 Beetlaham e Pa Yahuudiyya mo, haali/ wakan a'di  
 ta gwo jin 'kwarkin ma mançi gwo ma Arumgimis  
 kadhamo/ mo ki:

<sup>6</sup> Dhali/e, ayy Beetlaham, e bampa/ Yahuudiyya mo  
 tani

/e yisa pisina e bwaman 'kwani gi itapa gi 'Kwani  
 Yahuudiyya mo,  
 haali/ 'peni /e mo tani amanjiya ji midi pu'du/ mo,  
 a'di jin midi hil 'kwanim pem ma Israyil mo be.

<sup>7</sup> Yan'ko'd Hiroodus ki yuk 'kwani kun yukayuk  
 mo ka ƙwal is mo dhali dot̄ gwo 'peni uni goma  
 tee jin pikin ma cul mo. <sup>8</sup> Dhali a'di ki hash uni  
 e Pam Beetlaham mo mmo/o gwo mo ki: Iiku/ mo  
 ma dhali ƙap gwo ka kar/e goma 'ci mo, dhali ki  
 um mini gam a'di mo tani guyaa/ gwo mo ki aha/  
 si'da/ mina yaku/ mo dhali luŋ a'di mo be. <sup>9</sup> Ki  
 uni cikki gwo 'pena malik mo tani uni iikin e bway  
 buni mo, dhali hili, acul jin parkina uni e mo e  
 mom'pesho'k mo tani yaki'di uni ibwambor mo  
 ntagi a'di pu'dki'd mo mmodosh apo/ mo jin din

ma 'ci nycine/ mo be. <sup>10</sup> Ki uni parkina acul e mo tani uni 'kunykina bwa mo ka daran du ki dhan bwanj 'kunyga/ mo. <sup>11</sup> Dhali ki uni iiki bway bwani gu'b mo tani uni parkina 'ci e mo nyak<sub>k</sub>ka Mariyam jin ta kum mo dhali uni ṭa'kkina 'cesh mo dhali lunj a'di mo. Dhali yan'ko'd uni ki ka'd tom buni gun ish kumma/ 'twa/ mo tani uni ki ci a'di to kun çinu ki me'd mo, 'dolkon gana/ mo dhala 'bicajwahar mo dhala 'bi'c cwa jin yuku ka murr mo be. <sup>12</sup> Dhali uni rumkunu ki gwo ki jan mo mmo'koki dok<sub>a</sub> Hiroodus mo. Uni iikin ki bway bampam buninj gana/, mo ki bwaya kamu/ mo be.

### *Hiroodus Palki Mii mo Mmo'kosha Yesus mo*

<sup>13</sup> Dhali ki uni iikin mo tani hili mo mo ma, aman'doyu gwo gi Tapa piki'da Yuusup i is mo ki jan mo dhali o a'di gwo mo ki: Cuyi mis mo ma, dhali susa 'ci dhali kum mo dhali soyi mo e Pam Masir mo dhali 'koyi mmun mo ntagi aha/ mina ṭor /e gwo mo, haala Hiroodus muru'di ḥapa 'ci mmo'ce'd a'di sho'k mo be. <sup>14</sup> Dhali a'di cuki mis mo dhali susa 'ci mo dhali kum mon'thiny mo dhali ii Pam Masir mo. <sup>15</sup> Dhali uni 'kokin mo mmun ntagi jwa ma Hiroodus mo. Yansan miikunu mo mmothim gwo jin ona Tapa ka manç<sub>i</sub> gwom piti kadhamo/ mo ki: 'Peni Pam Masir mo tani aha/ yukkina ya/m pem mo be.

<sup>16</sup> Yan'ko'd ka Hiroodus ki a'di parki mo e ki a'di he'kkunu e ki 'kwani kun yukayuk mo tani a'di dak ma nyor bwa me'd mo dhali a'di ki hash gwo mo dhali 'kosh uçingwa<sub>ṭh</sub> jwa 'baar mo kun 'kon e Pam Beetlaham mo dhali e bampa/ kun 'kon ka kukul is mo kun 'kona yil susu/ mo dhali kun 'kona bor mo me'd gwo jin da/arkina a'di 'peni 'kwani kun

yukayuk mo. <sup>17</sup> Wakan a'di thimkunu mo jin okin ma manci gwo ma Arumgimis kadhamo/ mo jin ta'da Irmiya mo ki:

<sup>18</sup> "Twa/ cikkunu mo e Pa Rama mo mmomiiya cinthar mo dhali kony jwa jin gwonuski jabu'th mo,  
aRahil gwoki'd mo gom uci ma yim mo.  
Ayim ushki'd mo ki a'di minu malas mo,  
haali/ uni mini 'kok'ko dok/e mo be.

<sup>19</sup> Hili ka Hiroodus wuki'd mo tani hili mo mo ma, aman'doyu gwo gi Tapa piki'da Yuusupi is ki jan mo e Pam Masir mo mmo/o gwo mo ki:  
<sup>20</sup> Cuyi mis mo ma dhali susa 'ci dhali kum mo, dhali iyi e bampa/ gi 'Kwani ma Israyiil mo haali/ uni gwansan kun njanjina 'ci mondiki/em piti mo mmo'kosh mo tani uni wukin mo be. <sup>21</sup> Dhali a'di cuki mis mo dhali susa 'ci dhali kum mo dhali ii mo e bampa/ gi 'Kwani ma Israyiil mo be. <sup>22</sup> Hili ki a'di cikki gwo ka Arkilaawus ta tapa apo/ Pa Yahuudiyya mo e mo gi com ka Hiroodus mo tani a'di ko/ki is mo mmoya mo dhali a'di rumkunu ki gwo ki jan mo tani a'di yaki'd mo e Pany Jaliil mo be. <sup>23</sup> Dhali a'di yaki'd mo mmoça'b e 'peñkuman bampa/ jin yuku ka Naasira mo. A'di jin ta gwo jin okin ma manci gwo ma Arumgimis kadhamo/ mo ki a'di minu thim mo ki: A'di minu yu'ki wathi/ gi Pa Naasira mo be.

### 3

*Gwo jin Cin ma Yohaan jin Ta'da Manmiiya Mii  
ki Yi'de/mo*

<sup>1</sup> Dhali ka tee gwansan Yohaan jin ta'da manmii ki yi'de/ pu'dki'd mo mmoçi gwo mo e bwaasho gi

Pa Yahuudiyya mo mmo/o gwo mo ki: <sup>2</sup> Rici adu is mo ma haali/ Bampa/ gi Momis midi pu'd ki 'dishe/ mo be. <sup>3</sup> Haali/ a'di yansan ta a'di jin okunu ka manci gwo ma Arumgimis kadhamo/ mo jin ta'da Ishaya ki a'di o gwo mo ki:

'Twa/ gi jan 'de/ mmocuu gwo em bwaasho ki:  
Thosoni bway gi Tapa mo ma.

Kari bway piti ka kar/e mo.

<sup>4</sup> Dhala Yohaan a'di hi'thki'da mur kalman mo dhali waçkan mo e empa'd piti mo, dhali tontem piti jin shwana a'di mo tani ta'da kuuyu/ dhala dham eya kur mo be. <sup>5</sup> Yan'ko'd aris 'kwani 'baar mo iikin ka pije/ mo e a'di mo 'peni Pa Urushaliim mo dhali 'peni bampa/ Yahuudiyya 'baar mo dhali e bampa/ 'baar mo kun 'kon ka kukul is mo e Yi'deñ Kumma/ Uurdun mo be. <sup>6</sup> Dhali uni 'kokunu mo mmomii ki yi'de/ ki a'di mo e Yi'deñ Kumma/ Uurdun mo mmopikina uni gwo gom miinthus buni mo be.

<sup>7</sup> Hili ki a'di parki 'Kwani Parisiyiin e mo dhali 'Kwani Sadukiyyiin pu'dkin mo e mo gi miinuwa mii ki yi'de/ mo tani a'di ki o uni gwo mo ki: Um ucin tasha/. Aja rum um ki gwo mo mmoso mo 'pena nyor jin midi pu'du/ mo? <sup>8</sup> Kali maman gana/ adho'th mo ma jin midi ha me'd ki mo jin rijuwa du is mo <sup>9</sup> dhali dhalku/ ki tel gwo 'pen mo mmo/o gwo mo e is bum ki: Ana tana ga Ibrahiim jin ta'da ababam bana mo. Haali/ aha/ tora um gwo mo ka Arumgimis mishi war wosh gwansan mmo'de'k uni mmota uci ma Ibrahiim mo be. <sup>10</sup> Hili shwane/ athurmany a'di 'thikunu mo eya eya birman cwa mo. Wakan mo tani aris cwa 'baar mo ka 'dete/ 'dete/

kun 'koki dho'th maman mo tani uni jepkunu ka 'cesh mo dhali minu taki o'd mo be.

<sup>11</sup> Aha/ miikina um ki yi'de/ gom mo gi minu rica du is mo, hili a'di jin midi yayu/ i'ko'di aha/ mo tani a'di ca'd ki aha/ mo dhala ppam piti mo tani aha/ dinaki ha me'd mo mmokal uni mo. Hili a'di midi mii um ki Shi/in Dheleladhelel mo dhali ki o'd mo be. <sup>12</sup> Dhali tonkar shem piti mmo'dash to mo tani di'di me'd piti mo dhali a'di midi dhelel ja'dam piti mo dhali a'di midi tul emen pos is mo e bwan themes mo, hila 'pi'b mina a'di ci'th ki o'd jin midi mol us mo be.

### *Mo jin Miinuwa Yesus ki Yi'de/ mo*

<sup>13</sup> Yan'ko'd Yesus pu'dki'd mo 'peni Pany Jaliil e Yi'deñ Kumma/ Uurdun eya Yohaan mo ki a'di minu mii ki yi'de/ ki a'di mo be. <sup>14</sup> Yohaan a'di ur a'di gwo mo mmo/o gwo mo ki: Aha/ mina mii ta gi mo gi miinuwa mii ki yi'de/ ki /e mo dhali /e pu'dkini aha/ kan mo 'taa? <sup>15</sup> Hila Yesus thok a'di gwo mo ki: Dhalki a'di miinu mo wakan shwane/ haali/ a'di wakan jin midi ha me'd mo gom ana mmothima ris mo ma kar/e mo. Dhali yan'ko'd a'di gamki gwo me'd mo be. <sup>16</sup> Dhali ka Yesus miikunu ki yi'de/ mo tani a'di cuki mis ki jahanne/ 'peni yi'de/ mo dhali hili, momis ka'dkunu mo dhali a'di parki Shi/in ma Arumgimis e mo mmothulu/ me'd gurko/ mo mmoça'ba po/ a'di mo be. <sup>17</sup> Dhali hili, 'twa/ 'peni momis o gwo mo ki: Yansan ta Ya/m pem jin enka/ mo dhali e a'di mo tani aha/ 'bora bwa mo be.

## 4

### *Mo gi Paluwa Yesus mo*

<sup>1</sup> Yan'ko'd aYesus a'di urkina Shi/in ka pije/ mo e mombwaasho mo dhali a'di palkina tapa ma ruma 'cesh mo be. <sup>2</sup> Dhali a'di ga/ki to mo ka cim ma issu/ montee mo dhali ka cim ma issu/ mon'thiny mo dhali yan'ko'd mo tani a'di 'kosha te/ mo be. <sup>3</sup> Dhali amanpal a'di pu'dki'd mo dhali o a'di gwo mo ki: Wakki/ /e ta Ya/ ma Arumgimis mo tani kani wosh gwansan gwo mo ma mmowar ki tonṭe/ mo. <sup>4</sup> Hili a'di thok a'di gwo mo ki: A'di 'kwarkunu mo ki:

Wathi/ midi diki di ki e jasi gom tonṭe/ a'di 'de/ mo hili ki gwo 'baar mo ka 'detē/ 'detē/ kun piyin mo 'peni 'twa/ ma Arumgimis mo be.

<sup>5</sup> Yan'ko'd tapa ma rum a'cesh ki sus a'di mo e 'penkuman bampa/ jin kogu mo dhali a'di ki kar a'di eya liman gu'b gi mondheleladhelel mo <sup>6</sup> dhali a'di ki o a'di gwo mo ki: Wakki/ /e ta Ya/ ma Arumgimis mo tani biti is pini ka 'cesh mo ma haali/ a'di 'kwarkunu mo ki:

A'di midi ci iman'doyu gwom piti mo mmoji /e mo, dhali,

E me'd buni mo tani uni mini 'de'k /e mo,  
isi ciki/ ki /e mina sho'k pini diki ṭorosha po/ wosh  
mo be.

<sup>7</sup> Yesus o a'di gwo mo ki: Dok/ e gwo 'kwarkunu mo ki: /E mini diki pal Tapa Arumgimis pini mo. <sup>8</sup> Dok/ e tapa ma ruma 'cesh ki sus a'di mo e 'kuwosh jin turatur kagahara mo dhali mmoṭor a'di aris bampa/ gi mony'ceshi 'baar mo dhali monycam buni mo be. <sup>9</sup> Dhali a'di ki o a'di gwo mo ki: Aris uni gwansani 'baar mo tani migā/ ci /e mo be wakki/ /e mini biṭa 'cesh mo dhali lunj aha/ mo

be. <sup>10</sup> Yan'ko'd Yesus ki o a'di gwo mo ki: Yaku/ mo ma, Setaan, haali/ a'di 'kwarkunu mo ki:  
/E mini lunj Tapa Arumgimis pini mo,  
dhali a'di 'de/ mo tani mmina /e mii to mo be.

<sup>11</sup> Yan'ko'd tapa ma ruma 'cesh ki dhal a'di 'pen  
mo dhali hili, iman'doyu gwo pu'dkin mo dhali mii  
a'di to mo be.

*Yesus Telki Mii ma Tu'c Piti 'Pen mo*

<sup>12</sup> Dhali ki a'di cikki gwo ka Yohaan karkunu eya  
sijin mo tani a'di pu'dki'd mo e Pany Jaliil mo be.

<sup>13</sup> Dhali a'di dhalki Pa Naasira 'pen mo dhali ya mo  
dhali ç'a'b mo e Pan Kapranahuum mo e shemen  
yi'de/ gi bampa/ gi Pan Sabuluun mo dhali Pan  
Naptaali mo be. <sup>14</sup> A'di ta gwo jin okunu ka manci  
gwo ma Arumgimis kadhamo/ mo jin ta'da Ishaya,  
a'di jin minu thim mo ki:

<sup>15</sup> E Pan Sabuluun mo dhali e Pan Naptaali mo tani  
'kup ki shemena gap jin 'cithu/ Yi'den Kumma/  
Uurdun mo,

e Pany Jaliil gi 'kwani kun 'kokki ta 'Kwani Yahuda/  
mo tani

<sup>16</sup> 'kwani kun 'kokin mo e bwaman mondhu-  
rumi'd mo tani  
uni parki dhan moñkush e mo,  
dhali e uni gwansan kun 'kokin mo e bampa/ mo  
dhali eya la wu mo tani  
moñkush 'twakkuñu mo mo be.

<sup>17</sup> 'Pena tee çaan mo tani Yesus telki gwo 'pen mo  
mmoçi gwo mo mmo/o gwo mo ki: Rici adu is mo  
ma haali/ Bampa/ gi Momis a'di pu'dki'd mo be.

*Yesus Yukki Imancik A'di Gwo Itwa/a/ mo*

<sup>18</sup> Me'd jin yakina a'di e shemena gap ma al  
ma Jaliil mo tani a'di parki 'kwanin tiya e isu/

mo kun tana kam mo, Simaan jin yu<sub>k</sub>u gway ka Buterus mo dhala Andaraawus jin ta'da kam piti mo mmobi<sub>k</sub>ina uni a'thi/ a/al mo, haali/ uni ta imancesh to yi'de/ mo be. <sup>19</sup> Dhali a'di ki o uni gwo mo ki: Bathi aha/ nsho'k mo ma dhali aha/ mina dhu um ki imanbu'th 'kwani ki gwo mo be. <sup>20</sup> Dhali ki jahanne/ uni dhalkina 'thim buni 'pen mo dhali bath a'di isho'k mo be. <sup>21</sup> Dhali ki a'di yaki'd mo 'peni mun mo tani a'di parki 'kwani su/ e mo kun ta ikam mo si'da/, Yakuub jin ta ya/ ma Sabadi dhala Yohaan jin ta'da kam piti mo e bwam ma kur buni nyak ka Sabadi jin ta'da ababam buni mo mmoshowa 'thim buni mo, dhali a'di ki yu<sub>k</sub> uni mo. <sup>22</sup> Dhali ki jahanne/ uni dhalkina kur buni 'pen mo dhali ababam buni mo, dhali bath a'di nsho'k mo be.

### *Yesus Çiki Gwo mo dhali Waça/ Waç mo*

<sup>23</sup> Dhali a'di yaki'd mo e Pany Jaliili 'baar mo tani a'di ṭorki gwo mo e gu'b gi montul is buni mo dhali mmoci gwom 'borga/ gom Bampa/ mo dhali mmowaça ris 'bathi 'baar mo dhali aris isa nyor kun 'koshi 'kwani mo be. <sup>24</sup> Wakan gwo gom a'di yaki'd ki lala'th ki tur mo e Pan Suriyya mo dhali uni suskina ris 'kwani e a'di kun 'bathan mo, uni gwansan kun doru ki isa nyor mo dhali ki isa nyor kun woci is she/ mo dhali kun bu'th ma rum thus mo dhali aris uni kun wu gampaj mo dhali aris uni kun mutta/ is mo dhali a'di ki waç uni mo be. <sup>25</sup> Dhali awaambuhany 'kwani caaca 'peni Pany Jaliil bathki a'di m'pen mo dhali 'peni Pan Dekapolis mo dhali 'peni Pa Urushaliim mo dhali 'peni Pa Yahuudiyya mo dhali 'peni bwampo/ Yi'den Kumma/ Uurdun mo be.

## 5

*Gwo jin Toru e 'Kuwosh mo*

<sup>1</sup> Mmohilkina a'di awaambuhany 'kwani mo tani a'di seki bway 'kuwosh jin turatur mo dhali ki a'di ca'bki'da 'cesh mo tani imancik a'di gwo pu'dkini a'di mo be. <sup>2</sup> Dhali a'di ki ka'd 'twam piti mo dhali tor uni gwo mo mmo/o gwo mo ki:

*'Ban jin 'Boruwa 'Bor Mii mo*

- <sup>3</sup> Mom'bor mii gom uni gun hatha'ko'd e shi/in mo, gom bampam buni ta ji gi momis mo be.
- <sup>4</sup> Mom'bor mii gom uni gwansan kun gwokin mo, ki uni minu malas mo be.
- <sup>5</sup> Mom'bor mii gom uni gun 'thup ma du mo ki uni mini gam mal ma 'cesh mo be.
- <sup>6</sup> Mom'bor mii gom uni gwansan kun 'kosha te/ mo dhali kun butha te/ miinkar/e mo ki uni minu kap mo be.
- <sup>7</sup> Mom'bor mii gom uni gun miimii mo ki uni mini gam momiimii mo be.
- <sup>8</sup> Mom'bor mii gom uni gun dhelel ma du mo ki uni mini para Arumgimis e mo be.
- <sup>9</sup> Mom'bor mii gom uni gun dhuna dhu ka ku'th is mo ki uni minu yuk ki iya/ ma Arumgimis mo be.
- <sup>10</sup> Mom'bor mii gom uni gwansan kun toju bwa mo gom gway gi miinkar/e mo, gom bampam buni jin tana uni mo tani ta ji gi momis mo be.
- <sup>11</sup> Mom'bor mii gom um ki 'kwani mini sor um mo dhali to'c um bwa mo dhali wal gwo sora shigga/ apo/ um mo gom gway pem mo be. <sup>12</sup> 'Kunyi bwa mo ma dhali 'bori

bwa mo, haali/ tom bum gun tana um gun  
 ish ƙumma/ mo e momis mo tani uni ekkin  
 mo, haali/ wakan 'kwani ƙoci imançι gwo  
 ma Arumgimis bwa kadhamo/ mo uni gun  
 'koni ƙwa/a/ ki um mo be.

*'Doŋkoro/ dhali Moŋkush*

<sup>13</sup> Um tana 'doŋkoro/ gom mony'cesh mo. Hili wakka 'doŋkoro/ midi this montaŋkar piti e mo tani a'di midi mish 'bala'th kata mo? A'di diki ha me'd mo dok/e gom tonj kamu/mo, hili isi ciki/a'di minu biṭa sho mo dhali minu yap ki sho'k gi 'kwani mo be.

<sup>14</sup> Um ta moŋkush gi 'kwaniny'cesh mo be. 'Peŋkuman bampa/ ڇaan jin ƙa'bkunu mo e 'ku-wosh mo tani a'di molu ba'k mo be. <sup>15</sup> Walla ki 'kwani ci'thkina lamba/ mo tani uni kum a'di 'kup ki tonj'kul bwa mo 'taa? Hili uni ki kar a'di e tirkina/ mo dhali a'di ki ci moŋkush e gu'bi 'baar mo be. <sup>16</sup> Dhalki moŋkush bum kushi mo mo wakan mbwambori 'kwani mo, ki uni mini par miim 'boron bum e mo dhali ci monyca ka Babam bum jin di'd e momis mo be.

*Yesus Torki Gwo gom Gwoŋkan jin Cinu mo*

<sup>17</sup> Dhalku/ ki tosh ki aha/ pu'dkina mo mmopuu gwoŋkan jin ڇinu mo dhali imançι gwo ma Arumgimis kadhamo/ mo. Aha/ pu'dkina mo mmopuu uni mo yisa, hili mmothim uni mo be.

<sup>18</sup> Haali/ ka jin gana/ aha/ ona um gwo mo ki: ntagi momis dhali mony'cesh uni mini pe mo tani walla ari businyaŋ gwo walla 'pisiranj gwo mo tani uni mini 'koki pe mo 'peni gwoŋkan jin ڇinu mo ntagi uni 'baar mo minu thim mo be. <sup>19</sup> A'diyin

jin midi 'ce'd gwoŋkana 'de/ 'peni uni gwansan kun 'kwarkunu mo kun pisin mo dhali ṭor 'kwani gwo wakan mo si'da/ tani a'di minu yuk ki a'di jin pisapis mo e Bampa/ gi Momis mo. Hili a'di jin mii uni mo dhali ṭor gwo ki uni mo tani a'di minu yuk gway ki a'di jin caaca mo e Bampa/ gi Momis mo be. <sup>20</sup> Haali/ aha/ ṭora um gwo mo ki isi ciki/ miŋkar/em bum mo mini bol ku gi iman'kwar to e mo dhali 'Kwani Parisiyiin mo tani um mini mol ciç e Bampa/ gi Momis mo be.

### *Yesus Torki Gwo mo gom Gwo ma Nyor mo*

<sup>21</sup> Um cikki gwo jin onu 'peni 'kwanin dhamo/ki: /E mini mii dhalku/ ki 'kosha 'kosh mo, dhali a'di jin 'koshki'da 'kosh mo tani a'di midi 'dapi gwon dwall mo be. <sup>22</sup> Hili aha/ ona um gwo mo ki aris 'kwani 'baar mo ka 'detē/ 'detē/ ki ji gi mii'da nyor ka kam piti mo tani a'di midi 'dapi gwon dwall mo be. A'diyin jin soro'da kam piti mo si'da/ mo tani midi 'dapi gwon dwall e montul is gi 'Kwani Yahuuda/ mo, dhali a'diyin jin midi o/e gwo mo ki: /E ta pus mo tani, a'di midi 'dapi mo ma al o'd mo be. <sup>23</sup> Wakan wakki/ /e ki guyu/ tom pini jin ćinu ki me'd mo apowa gwaṭa/ mo dhali /e ki ka gwo e ka kam pini dina tonj kamu/ apo/ /e mo tani <sup>24</sup> dhalki tom pini jin ćina /e ki me'd mo mbwambor ma gwaṭa/ mo dhali yaku/ mo, mmogwama gwam ntwa/a/ mo nyakka kam pini mo dhali yan'ko'd yayu/ mo dhali ci tom pini jin ćinu ki me'd mo. <sup>25</sup> Miiyi amugu ki jahanne/ mo nyakki a'di jin yer / e is ki gway mo ki um 'kon mo mmo/ii ka yiha/ mo e bway mmodwall gwo mo nyakki a'di mo, isi ciki/ amanyer /e is ki gway midi biṭki /e mo e me'd ma

mandwall gwo mo dhali amandwall gwo mo a'di midi çiki /e ka manji mo mo dhali /e minu kar eya sijin mo be. <sup>26</sup> Ka jin̄ gana/ aha/ ona /e gwo mo ki /e mini mol 'ba/ piyu/ ka pije/ ki sule/ mo ntagi /e mini çiya maliim jin̄ 'ko'd mo be.

*Yesus Torki Gwo mo gom Mii jin Miinu Miinyçal mo*

<sup>27</sup> Um ciłki gwo jin onu ki: Dhalku/ çal ki mii mii mo ma. <sup>28</sup> Hili aha/ ona um gwo mo ki aris 'kwani 'baar mo ka 'dete/ 'dete/ uni gun hili 'kup ki up mo mmo'dap e mo tani ki jahanne/ uni miiki miinyçal nyałki up mo eya dum buni mo be. <sup>29</sup> Wakki/ e ma bim poros pini łu'c /e mo mmomii miinthus mo tani buķi a'di ka pije/ mo ma dhali biti a'di ashō mo haali/ a'di 'boro'd gom /e mo mmothis bunġwar is gi 'ban is piniñ kamu/ e mo jin mina bunġwar is pini ka 'bimpil diki ya mo e mo ma al o'd mo be. <sup>30</sup> Dhali wakki/ me'da bim poros pini midi łu'c /e mo mmomii miinthus mo tani 'cithi/ a'di mo ma dhali yipi a'di ashō mo haali/ a'di 'boro'd gom /e mo mmothis bunġwar is gi 'ban is piniñ kamu/ e mo jin mina bunġwar is pini ka 'bimpil diki ya mo e mo ma al o'd mo be.

*Yesus Torki Gwo mo gom Mii jin Dhaluwa Dhal 'Pen mo*

<sup>31</sup> A'di onu si'da/ ki: A'diyin jin midi dhal ashim piti 'pen mo tani dhalki a'di thosoni'da warka/ jin dhaluwa dhal 'pen mo. <sup>32</sup> Hili aha/ ona um gwo mo ki aris 'kwani 'baar mo ka 'dete/ 'dete/ gun dhalki up buni 'pen mo hili isi ciki/ jasi gom gwo gi miinyçal mo tani uni dhu uni ki imanmii miinyçal mo dhali a'diyin jin midi mash a'bom jin dhal ma

kathim piti 'pen mo tani a'di si'da/ miiki miinyçal mo be.

*Yesus Torki Gwo mo gom Gwo jin Thulu Me'da Po/mo*

<sup>33</sup> Dok/ e um cikki gwo jin onu mo ki 'kwanin dhamo/ ki: /E mini dhalku/ ki mii thul me'da po/ gwo mo mmo/o is ka ḥor mo, hili thimi gwo e Tapa mo a'di jin thula / e gwo me'da po/ mo mmo/o mo. <sup>34</sup> Hili aha/ ona um gwo mo ki: Dhalku/ gwo ki mii thul me'da po/ mo mmo/o mo ki sule/ mo ma, walla gom momis mo haali/ a'di ta'da kursi ma Arumgimis mo be, <sup>35</sup> walla gom mony'cesh mo haali/ a'di ta mondhu sho'k piti mo, walla gom Pa Urushaliim mo haali/ a'di ta 'penkuman bampa/ ma Malik jin ca'd mo. <sup>36</sup> Dhali dhalku/ ki mii thul gwo me'da po/ mo mmo/o mo gom 'kup pini mo haali/ /e molona mur'kup ṭal 'deñ kamu/ war mo mmota gi kush mo walla mmota gi 'thi/ mo. <sup>37</sup> Dhalki gwom pini jin ona /e mo midi ta jasi anynye mo walla yisa mo. Ma e tonj kamu/ jin mar mii yan is mo tani uni pu'dkin 'peni tonthus mo be.

*Mo/en gom Uni gun Ta 'Kup mo*

<sup>38</sup> Um ciłkin a'di jin onu ki: Ki e gom e mo dhali ki she/ gom she/ mo tani <sup>39</sup> hili aha/ ona um gwo mo ki: Dhalku/ ki roç a'di jin ta thus mo. Hili wakki/ jan 'deñ kamu/ midi dor /e e 'ban 'peshe/ ma bim poros mo tani tu'kki a'di 'bana kamu/ si'da/ mo ma. <sup>40</sup> Dhali wakki/ wathin 'deñ kamu/ midi sus /e mo dhali bu'th burrinyem bwaman pini mo tani dhalki a'di bu'th jam po/ si'da/ mo ma. <sup>41</sup> Dhali wakki/ wathin 'deñ kamu/ ḫan /e gwo ki 'bi'th mo mmoya ki ḫatgin 'de/ mo tani yayi nyakki a'di mo

ki ɳatgini su/ mo. <sup>42</sup> Ciki a'di jin dołki to 'peni /e mo dhali dhalku/ ki ush a'di jin midi bar to Ɂal 'peni /e mo.

<sup>43</sup> Um cikkin a'di jin onu ki: /E mini en amannyak ɬa'b pini mo dhali shi/ 'kup pini i e mo. <sup>44</sup> Hili aha/tora um gwo mo ki: Eni uni gun ta 'kup ki um mo ma dhali 'thoyi gom uni gwansan kun ɬoci um bwa mo. <sup>45</sup> Wakan ki um mini ta iya/ ma Ababam bum jin di'd e momis mo, haali/ a'di ɬu'cki'da tentem piti mmosul apo/ 'kwani kun to thus ki thus mo dhali apo/ uni kun ta 'kwaniŋ gana/ mo, dhali a'di ki hasha sho'k apo/ 'kwani kun ta kuŋ ɬar/e mo dhali apo/ uni gun 'koki ta kuŋ ɬar/e mo be. <sup>46</sup> Haali/ wakki/ um ki en uni gwansan kun eni um mo tani tom bum kun mina um gam gom mii gi wakan mo tani mini wakata mo sa/? 'Kona imanteria thulpa/ ki mii mii jin nyaka'd kan mo 'taa? <sup>47</sup> Dhali wakki/ um ki the jasi iwak bum me'd mo tani mii jana imiina /e ki nyanye/ mmobol cin tiya e mo? 'Kona 'kwani kun 'koki ta 'Kwani Yahuuda/ ki mii mii jin nyaka'd kan mo 'taa? <sup>48</sup> Wakan um mini mii ta unim 'borgan gana/ mo me'da Ababam bum jin di'd e momis jin ta a'dim 'borgan gana/ mo be.

## 6

*Yesus Torki Gwo gom To jin Minu Ci 'Kwani kun Hatha'ko'd mo*

<sup>1</sup> Jiyi miiny jarom bum jin mina umi boł mo mbwambori 'kwani mo mmomina uni mish um mo haali/ ɳ'ko'd mo tani um mini ta gi to jin ish ɬumma/ yisa ' pena Ababam bum jin di'd e momis mo.

<sup>2</sup> Wakan si'da/ki /e mini ci to jin cinu gom 'kwani kun hatha'ko'd mo tani dhalku/ ki kowa poome/ mo mbwambori /e mo me'd 'kwani kun tana he'k e ka he'k e mo kun miiki to mo e gu'b gi montul is mo dhali e bway tur kun iinu mo ki uni mina 'kwani iman̄ mo. Ka jin̄ gana/aha/ona um gwo mo ki uni tan gi tom buni gun ish kumma/ mo be. <sup>3</sup> Hili ki /e mini ci to gom 'kwani kun hatha'ko'd mo tani dhalku/ ki dhal me'da cam pini mmomish me'da bim poros pini mmomiina a'di to mo <sup>4</sup> wakan ki tom pini kun cina /e gom 'kwani kun hatha'ko'd mo minu mii ki kup mo, dhala Ababam pini jin mishki'da ris to gun miinu ki kup mo tani midi ci /e to kun mini ish kumma/ mo be.

### *Yesus Torki Gwo mo gom Mon'tho mo*

<sup>5</sup> Dhali ki /e mini 'tho mo tani /e mini mii dhalku/ ki mii me'd 'kwani kun ta imanhe'k e mo haali/ uni eni mondosh mo dhali 'tho mo e gu'b gi montul is mo dhali e mo jin 'citha/ bway tur mo ki uni mina 'kwani mish mo. Ka jin̄ gana/ aha/ ona um gwo mo ki uni tan gi tom buni kun ish kumma/ mo be. <sup>6</sup> Hili ki /e mini 'tho mo tani yayi gu'b pini mo dhali muthi acampur mo dhali 'thoyi Ababam pini mo, a'di jin 'konuki tor eya tente/ mo, dhali Ababam pini, a'di jin mishki to gun 'kon ki kup mo tani midi ci /e to gun ish kumma/ mo be.

<sup>7</sup> Dhali eya 'thom bum mo tani dhalku/ ki roth gwo apo/ mo gun 'ko bwa 'te/ mo me'd 'kwani kun 'koki ta 'Kwani Yahuuda/ mo haali/ uni kulumki gwo mbwa mo ki uni minu cik 'twam buni ki gwom buni kun ona uni ka ris mo be. <sup>8</sup> Dhalku/ ki wa e ki uni mo ma haali/ Ababam bum mishki

a'di jin mina um mii ta mo nt̄wa/a ki um dot̄ki a'di  
mo be. <sup>9</sup> Thoyi wa cikise/ mo ma:

Ababam bam jin di'di momis,  
dhalki gway pini a'di kogu mo ma.

<sup>10</sup> Dhalki bampam pini a'di yayi'da 'cesh.

Dhali dhalki bwam pini a'di miinu a'cesh mo ma  
me'd yan a'di miinu e momis.

<sup>11</sup> Ka tee yansan ciyi am ton̄tem bam jin ta ji gi isa  
yempa/ mo ma.

<sup>12</sup> Dhal am amure/ miinthus bam 'pen mo ma  
me'd yan si'da/ dhala aman 'kwani 'pen gun 'kon  
ka mure/ miinthus bam m'ba/.

<sup>13</sup> Dhalku/ ki sus am e mo jin palu mo e miinthus.  
Hili wothi/ aman 'peni wathin thus mo ma.

<sup>14</sup> Haali/ wakki/ um mini dhal 'kwani gwon dhanj  
buni 'pen mo tani Ababam bum si'da/ midi dhal  
um gwon dhanj bum 'pen mo be. <sup>15</sup> Hili wakki/  
um 'koki dhal 'kwani gwon dhanj buni 'pen mo  
tani wakan si'da/ Ababam bum midi diki dhal um  
gwon dhanj bum 'pen mo be.

### *Yesus Torki Gwo mo gom Tojin Ga/u mo*

<sup>16</sup> Dhali ki um mini ga/ to mo tani dhalku/ ki hil  
mo ki engwamash mo me'd 'kwani kun tana he'k  
e ka he'k e mo haali/ uni warki jis/em buni mo  
ki mon̄ga/ tom buni minu mish ki 'kwani mo. Ka  
jin̄ gana/ aha/ ona um gwo mo ki uni tan gi tom  
buni kun ish kumma/ mo be. <sup>17</sup> Hili ki /e mini ga/  
to mo tani shupuri 'kup pini ka yin mo ma dhali  
lami bwam/em pini mo <sup>18</sup>ki mon̄ga/ tom pini minu  
'koki mish ki 'kwani mo hili ka Ababam pini, a'di  
jin dinuki tor mo eya tente/ mo, dhali Ababam pini

jin mishi to jin di'd ki jin kup mo tani a'di midi ci /  
e to jin ish kumma/ mo be.

### *Mmo/ish Kumma/ e Momis mo*

<sup>19</sup> Dhalku/ ki sug to gom is pini mo ma mmo/ish kumma/ mo e mony'cesh yan mo, e mo gun 'kon ma dhurany mo dhali mo gun wuna to gure/ mo mmoshwa mo dhali mo gun 'kona 'kwanin 'di/ mo mmo'ce'd mo mo dhali mmokwal to mo be. <sup>20</sup> Hili suki is pini ki to kun ish kumma/ mo e momis mo e mo jin dar ga dhurany mo walla mo jin wuna to gure/ mo mmoshwa to mo dhali e mo jin daru gi 'kwanin 'di/ mo mmo'koki 'ce'd to mo dhali kwal to mo. <sup>21</sup> Haali/ mo jin isha tom pini kumma/ mo tani a'di ta mo jin min ma dum pini idi si'da/ mo be.

### *Alamba/ gi Buŋwar Is mo*

<sup>22</sup> E, a'di ta'da lamba/ gom buŋwar is mo. Wakan wałki/ em pini midi ća'bki kwany kwany mo tani buŋwar is pini 'baar mo ka 'bimpil mo tani minu 'tu'd mo ki moŋkush mo be. <sup>23</sup> Hili wałki/ em pini diki ća'bki kwany kwany mo tani buŋwar is pini 'baar mo ka 'bimpil mo tani minu 'tu'd mo ki mondhumumi'd mo be. Wałki/ moŋkush jin di'd e /e dhurumi'd mo kan tani dhan mondhumumi'd 'ka'da miiya!

### *Mmo/anan Is mo*

<sup>24</sup> Wathin 'deñ kamu/ yisa di'da jin midi mish miiya tu'c gom tapa isu/ mo: haali/ a'di midi mii shi/ jan tal 'deñ kamu/ i e mo dhali ena kamu/ mo walla ilu/ a'di midi bu'th jan 'deñ kamu/ ka bor mo dhali wak jan kamu/ mo be. Um moli mii Arumgimis to mo dhali mii to gun tanu pa ki pa mo.

<sup>25</sup> Wakan aha/ ṭora um gwo mo ki dhalku/ is ki anan mo gom mon'koki/em bum mo ma walla gom tonṭe/ jin mina umi shwa mo walla gom to jin mina umi pi mo walla gom bunḍwar is bum mo gom to jin mina umi hithi is mo. Dina mondiki/ e ki bol tonṭe/ e mo 'taa? Dhali bunḍwar is ki bol burrinye/ e mo 'taa? <sup>26</sup> Hili 'kup ki 'dii kun pen e mis mo ma. Uni 'koki si to mo walla 'koki 'cīṭh to mo walla 'koki tul to is mo e bwan themes mo tani dhali hili Ababam bum jin di'di momis mo tani a'di thipki uni mo be. 'Kona um ki ta 'kwani kun 'bitha yol she/ ki 'bi'th mo mmobol uni e mo 'taa? <sup>27</sup> Dhali wathi/ jana di'di bwam um mo jin midi anan is mo dhali jin midi mish ganan mondiki/em piti 'ba/ mo? <sup>28</sup> Dhali atinta anana um is mo gom burrinye/ mo? Kulumi gwo ibwa mo ma gom jandin to kun 'kona pije/ mo mmocakina uni mo. Uni 'koki miiya ṭu'c mo walla sura thus mo be. <sup>29</sup> Hili aha/ ṭora um gwo mo, goma Sulemaan e monycam piti 'baar mo tani a'di dinuki hi'th ki burrinye/jin waki jandin 'de/ 'peni uni gwansan mo be. <sup>30</sup> Hili wakki/ Arumgimis ki hitha sho ki burrinye/ wakan mo e bwaasho mo tani uni gun 'kokin mo shwane/ dhali ka'thamo/ 'kwani ki ta'k uni e mo/o'd mo tani bakata 'te/ mmina a'di diki hi'th um ki burrinye/ ki nyanye/ mo, ayy um 'kwani kun gwa'da mongam gwo is ki gwa'd mo kan? <sup>31</sup> Wakan dhalku/ is ki anan mo ma mmo/o gwo mo ki: Atinta mmina ana ishwa mo? walla, Atinta mmina ana ipi mo sa/? walla, Atinta mmina ana ihithi is mo sa/? <sup>32</sup> Haali/ 'kwani kun 'koki ta 'Kwani Yahuuda/ ḥapkina ris to gwansi 'baar mo, dhali Ababam bum jin di'di momis mo tani a'di mishki a'di jin mina umi mii

ta gi uni 'baar mo be. <sup>33</sup> Hili simmi bampam piti e nt̄wa/a/ mo ma dhali mo ma ƙar/em piti mo, dhali aris to gwansani 'baar mo tani uni mini ta kum bum si'da/ mo be.

<sup>34</sup> Wakan dhalku/ is ki anan mo gom ka'thamo/ mo haala 'thamo/ midi anan is mo gom is piti mo. Dhalka tee ki is pitin̄ gana/ ƙoci bwa mo mmo'leya tee mo.

## 7

### *Mmodwall kun Tiya Gwo mo*

<sup>1</sup> Dhalku/ ki ćinjitha ćinj'i th | mo ki um minu 'koki ćinj'i th | mo. <sup>2</sup> Haali/ ki gwo jin ćinjitha um ki ćinj'i th | mo mmopi mo tani um minu ćinj'i th | mo dhali ki mii jin bara um mii mo tani um minu bar ka nyaŋ'ko'd mo be. <sup>3</sup> Atinta mishkina /e businyan to i e ma kam pini mo hili diki mish adhana ƙa'dum jin di'd /e e em pinin̄ gana/ mo? <sup>4</sup> Walla atinta mina /e i/owa kam pini gwo mo ki: Dhalki aha/ guna /e businyan to 'peni em pini mo ma dhali /e ki dhal adhana ƙa'dum /e i em pinin̄ gana/ mo. <sup>5</sup> /E jin tana he'k e ka he'k e kan mo, buki aƙa'dum jin di'di em pini nt̄wa/a/ mo ma dhali yan'ko'd /e mini mish mohil ki 'bore/ mo mmobuk businyan to jin di'da kam pini i e mo be.

<sup>6</sup> Dhalku/ ki ćiya 'ka to jin ƙogu mo dhali dhalku/ ki biṭ dhemam bum mbwambori ƙuthar mo, hili isi ciki/ ki uni mini sa uni ki sho'k mo dhali ƙu'k mo mmo'kosh um mo be.

### *Doti ma, dhali Simmi Mii E mo, dhali Nagkani mo*

<sup>7</sup> Doti to mo ma dhali a'di minu ćiki um mo be. Simmi mii e mo ma dhali um mini gam a'di mo be.

Nagkani anagkan ki me'd mo ma dhali a'di minu ka'd ki um mo be. <sup>8</sup> Haali/ aris uni 'baar mo ka 'dete/ 'dete/ kun dotki to mo tani bu'thki uni mo dhali uni gun simmki mii e mo tani gamki to mo dhali a'di jin nagkanki a'di mo tani a'di ka'dkunu a'di mo be. <sup>9</sup> Walla wathi/ jana di'di bwam um mo wa<sup>k</sup>ki/ ya/m piti dot a'di gwo gom maanj<sup>k</sup>uthu'd mo tani mina a'di ci a'di wosh mo 'taa? <sup>10</sup> Walla wa<sup>k</sup>ki/ a'di ki dot a'di gwo gom wa'c mo tani mina a'di ci a'di tasha/ mo 'taa? <sup>11</sup> Wakki/ um si'da/ kun ta 'kwani kun ta thus ki thus kan mo mishi tom 'boron ci ki ucim bum mo tani bakata bese/ mmin ma Babam bum jin di'di momis mo diki ci aris to gwansan kun 'boron ki uni gwansan kun dotki a'di mo si'da/? <sup>12</sup> Wakan ma to yin jin ona um ki 'kwani mini mii mii gom um mo tani miyi wakan si'da/ gom uni mo ma haali/ gwo yansan ta gwo<sup>j</sup>kan jin ci<sup>n</sup>u mo dhali gwo gi imanci gwo ma Arumgimis kadhamo/ mo be.

### *Campur jin Nyuthanyu'th mo*

<sup>13</sup> Ci<sup>c</sup>i um mo ma e bway jin nyutha 'twaman ki nyu'th mo haali/ acampur a'di wangala wangal mo dhali bway a'di 'disha mii mo e mo jin shunu mo e mo jin 'ce'du sho'k mo dhali uni gwansan kun ci<sup>c</sup>kin e a'di mo tani tana ris ka ris mo be. <sup>14</sup> Haali/ acampura nyu'thga/ mo tani dhali bway mo tani a'di di<sup>t</sup>a mii mo jin shunu mo e mondiki/e mo dhali uni gwansan kun gamki a'di mo tani 'koni daka/ mo be.

### *Aris Cwa Uni Mishu ki Maman Buni mo be*

<sup>15</sup> Jiyi imanci gwonthus ki e ki 'bore/ mo ma uni gun pu'dkin mo e um mo mmohitha mur ka'bali is mo, hili e bwaman ma du mo tani uni tana wu

gun pitili to ki she/ mo be. <sup>16</sup> Um mini mish uni ki maman buni mo. Amura'th minu ho mo 'pena 'de/ mo 'taa? walla pu/ 'pena lit mo 'taa? <sup>17</sup> Wakan aris cwa kun 'boron mo tani dho'th maman kun 'boron mo hili cwa kun shi/ashi/ mo tani dho'th maman kun ta thus ki thus si'da/ mo be. <sup>18</sup> Cwam 'borga/ mol dho'th maman kun shiyin mo walla cwa shigga/ si'da/ mol dho'th maman kun 'boron mo be. <sup>19</sup> Aris cwa 'baar mo ka 'dete/ 'dete/ kun 'koki dho'th maman kun 'boron mo tani uni jepu ka 'cesh mo dhali taki o'd mo be. <sup>20</sup> Wakan si'da/ um mini mish uni ki maman buni mo be.

<sup>21</sup> Aris 'kwani 'baar mo ka 'dete/ 'dete/ kun o aha/ gwo mo ki: Tapa, Tapa mo tani mini 'koki ciç mo e Bampa/ gi Momis mo hili jasi a'di jin mii bwa ma Ababam pem jin di'd e momis mo be. <sup>22</sup> Dhali ka cim caan mo tani 'kwani mini ta aris ka ris mo kun mini o aha/ gwo mo ki: Tapa, Tapa, 'kona aman ki o gwo is ki gway pini mo 'taa? dhali ura rum thus ka piye/ ki gway pini mo? dhali miiya ris dhan mii kun 'bitha'bi'th ki gway pini mo 'taa? <sup>23</sup> Dhali yan'ko'd aha/ mina tor uni gwo eya tente/ mo ki: Aha/ dinaki mish um ki sule/ mo be. Iiku/ mo 'peni aha/ mo ma, um gun ta imanmii tonthus mo.

### *Moŋka'b jin Ka'bu Isu/ mo be*

<sup>24</sup> Aris 'kwani 'baar mo ka 'dete/ 'dete/ kun cikki gwom pem gwansan mo dhali mii uni mo tani uni wana e ki wathi/ jin yukayuk mo mmonyaq gu'b piti eya po/ wosh mo be. <sup>25</sup> Dhali ka sho'k wolki yi'de/ mo dhali dhana gannu/ yi'de/ pu'dki'd mo dhali 'tham poshki'd mo dhali dor apo/ gu'b mo tani hili a'di diki 'tuq mo be haali/ a'di ŋka'b kunu apo/ wosh mo be. <sup>26</sup> Dhali aris 'kwani 'baar mo ka

'dete/ 'dete/ kun cikki gwom pem mo dhali 'koki mii uni mo tani uni wana e ki wathim pus jin nyaŋki gu'b piti apowa si'b mo be. <sup>27</sup> Dhali ka sho'k wolki yi'de/ mo dhali agannu/ yi'de/ pu'dki'd mo dhali 'tham poshki'd mo dhali dor apo/ gu'b caan mo tani dhali a'di kumki'da 'cesh mo be dhali adhana bar jin caaca shinu is e a'di mo be.

### *Moshirr ma Yesus mo*

<sup>28</sup> Dhali ka Yesus 'baarki gwo gwansan mmo/o mo tani awaambuhany 'kwani merkin mo gom gwontor piti mo be <sup>29</sup> haali/ a'di ṭorki uni gwo mo me'd wathi/ jin ta gi moshirr mo dhali yisa me'd iman'kwar tom buni mo be.

## 8

### *Yesus Dhelelki Wathi/jin 'Kosha Monthus Is mo*

<sup>1</sup> Ki a'di thulki'd ka 'cesh mo 'peni 'kuwosha turga/ mo tani adhana waambuhany 'kwani kun caaca bat̄hki a'di m'pen mo be. <sup>2</sup> Dhali hili wathi/ jin 'kosha monthus pu'dki'di a'di mo dhali ca'bki jinj 'kupa'dupuni bwambori a'di mo mmo/o gwo mo ki: Tapa, wakki/ /e ona bwa mo tani /e mishi aha/ mmodhelel mo be. <sup>3</sup> Dhali a'di ki he'th me'd piti mo dhali ta a'di is ki me'd mo mmo/o gwo mo ki: Aha/ ona bwa mo be. Dheleli mo ma. Dhali ki jahanne/ monthus piti dhelelkunu mo be. <sup>4</sup> Dhala Yesus ki o a'di gwo mo ki: Hili /e mini dhalku/ ki o wathinj kamu/ gwo mo gom ton ṭal 'de/ yan mo. Hili yaku/ mo dhali ṭor is pini ka gasiis mo dhali ci a'di to jin ḥan ma Musa gwo mo e gwoŋkan mo haali/ a'di ta to jin nyo/i gwo gom 'kwani mo be.

*Ciŋkina/ ma Mancil ma Askar Iss 'Kwanimpa  
Mmudhe'd jin Waćkunu mo*

<sup>5</sup> Me'd jin cićkina a'di mo e Paŋ Kapranahuum mo tani amancil ma askar iss 'kwanimpa mmudhe'd mo tani pu'dki'd 'kup ki a'di mo mmonjap a'di mo, <sup>6</sup> dhali o gwo mo ki: Tapa, ciŋkinam pem ishki 'ko'da 'cesh ki 'ba'th jin mutt a'di is mo e pa mo dhali a'di shwan ma ćisa nyor mo be. <sup>7</sup> Dhali a'di ki o a'di gwo mo ki: Aha/ mina yaku/ mo dhali wać a'di mo be. <sup>8</sup> Hili amancil ma askar iss 'kwanimpa mmudhe'd thok a'di gwo mo ki: Tapa, aha/ dinaki ha me'd mo jin mina /e yayu/ mo eya galgin gu'b pem mo. Hili oyi jasi gwo mo 'te/ dhali ciŋkinam pem minu wać mo be. <sup>9</sup> Haali/ aha/ tana wathi/ jin di 'ko'd e moshirr mo. A/askar 'koni bwam me'd pem mo, dhali ki aha/ ona gwo e jan ṭal 'de/ mo ki: Yaku/ mo tani dhali a'di yaki'd mo. Dhali aha/ ki o gwo e jan ṭal 'deñ kamu/ mo ki: Yayu/ mo tani a'di yayi'd mo be, dhali e ciŋkinam pem ki: Miiyi yan mo ma tani dhali a'di miiki a'di mo be. <sup>10</sup> Ka Yesus cikki gwom piti mo tani a'di merki'd mo dhali o uni gwansan gwo kun baṭhi a'di nsho'k gwo mo ki: Ka jin gana/ aha/ ona um gwo mo ki: Jan 'deñ kamu/ yisa di'da e 'Kwani ma Israyiil jin gamkika/ jin ta'd gi moŋgam gwo is gi wakansan mo be. <sup>11</sup> Aha/ ṭora um gwo mo ki: Ama'diny 'kwani ka ris mini pu'du/ mo 'peni mom'pesho'k mo dhali 'pena bora lungu'b mo dhali 'ko atharabeesa nyakka Ibrahiim mo dhala Is/hak mo dhala Yakuub mo e Bampa/ gi Momis mo be <sup>12</sup> ki iya/ gi Bampa/ gi Momis mo minu ṭa'k mo e mondhurumi'd jin ta'da 'tum ka 'tum mo tani e mun mo tani 'kwani mini ko mo dhali 'pe'd

shem buni mo be. <sup>13</sup> Dhali eya mancil ma askar iss 'kwanimpa mmudhe'd mo tani Jesus ki o a'di gwo mo ki: Yaku/ mo ma. Dhalki a'di miinu mo gom / e mo me'd jin gamkina / e gwo is mo be. Dhali ciŋkina/ a'di wačkunu mo eya tee ćaan ki e 'kamu'thki'd mo be.

*Jesus Wački'da Mar ma Buteris jin Ta'da 'Bomi mo*

<sup>14</sup> Dhali ka Jesus cički gu'b ma Buteris mo tani a'di parki'da mar ma Buteris e mo jin ta'da 'bomi mo mmo/ isha a'di mmo'batha a'di is ki 'ba'th mo. <sup>15</sup> A'di ki ta ayim is ki me'd mo dhali 'ba'th dhalki'da yim 'pen mo dhali ayim cuki mis mo dhali mii a'di to mo be. <sup>16</sup> Ki mom'pimpili/ mo tani uni kalki 'kwani i a'di mo aris uni gun bu'th ma ruma 'cesh mo dhali a'di ki ura rum thus kun nyo/ on ka piye/ mo ki gwo mo dhali a'di ki wač uni 'baar mo kun 'kokin mo mmo'ba'th mo be. <sup>17</sup> Dhali a'di yan ta gwo jin minu thim mo me'd gwo jin okin ma manci gwo ma Arumgimis kadhamo/ mo jin ta'da Ishaya mo ki: A'di kalki isa nyor bana mo dhali kalki aris 'ba'th jin 'koshki ana mo be.

*Uni kun Mini 'Taki Batha aYesus Nsho'k mo*

<sup>18</sup> Dhali ka Jesus parki'da waambuhany 'kwani e kun 'kamki a'di mo tani a'di kanki gwo mo mmoya mo mmo'citha/ gap ki 'bana kamu/ mo be. <sup>19</sup> Dhala man'kwar to pu'dki'd mo dhali o a'di gwo mo ki: Amantor Gwo, aha/ mina bath /e nsho'k mo e mo 'baar mo jin mina /e iya mo. <sup>20</sup> Dhala Jesus ki o a'di gwo mo ki: Amak uni ta gi jis mo dhali 'dii kun pen e momis mo tani uni ta gi gu'b mo. Hili, Ya/ gi 'Kwani mo tani a'di dar gi mo mo mmokar 'kup piti nycine/ mo be. <sup>21</sup> Dhala mancik gwonj

kamu/ o a'di gwo mo ki: Tapa, dhalki aha/ yana nt̄wa/a/ mo mmokana babam pem mo. <sup>22</sup> Hila Yesus ki o a'di gwo mo ki: Bathi aha/ m'pen mo ma dhali dhalki jwa kan çeny jwam bunin gana/ mo.

### *Yesus Doshki'da Dhana Punthar 'Tham mo*

<sup>23</sup> Dhali ki a'di cički'd e bwaakur mo tani imanicik a'di gwo bathki a'di isho'k mo be. <sup>24</sup> Dhali hili adhana punthar 'tham caaca cuki mis mo e bwam yi'de/ mo, wakan dhala kur a'di borkunu mo ki yi'de/ jin bir bakal mo. Dhali hili a'di ishki e mo be. <sup>25</sup> Dhali uni iikin mo mmomer a'di e mo mmo/o gwo mo ki: Woθhi/ awoθh mo ma, Tapa. Ana 'ce'da sho'k mo be. <sup>26</sup> Dhali a'di ki o uni gwo mo ki: Atinta ko/ka um is mo kan, ayy um 'kwani kun gwa'da mongam gwo is ki gwa'd kan mo? Dhali yan'ko'd a'di ki cu mis mo dhali kucur 'tham ki gwo mo dhali yi'de/ mo dhali adhan mo dosh ki biyuu mo be. <sup>27</sup> Dhali 'kwani merkin mo mmo/o gwo mo ki: Ki wathi/ jana a'danne, ki 'tham dhali yi'de/ ha a'di gwo e mo kan?

### *'Kwani gi Paŋ Gadara kun Bu'th ma Ruma 'Cesh mo*

<sup>28</sup> Dhali ki a'di pu'dki'd ki 'bana gapa kamu/ jin ta bampa/ gi Paŋ Gadara mo tani 'kwani su/ 'kon kun takin ga rum thus kun nyo/on mo gamki a'di 'kup mo kun iiyin 'peni mon'kupaje mo. Uni shwana nyor kagahara ki jan tal 'deŋ kamu/ midi diki ya ki bway çaan mo be. <sup>29</sup> Dhali hili uni cuun kagahara mo ki: /E mini miiya tinta e am mo ayy Ya/ ma Arumgimis? /E pu'dkin mo mmahan mmodhu am ki isa nyor nt̄wa/a/ ki mo diki pu'd mo naskina/ 'taa? <sup>30</sup> Dhali ama'diny kuthar 'kokin

mo mmoshwa mo isa dhana/ mo 'peni uni mo.  
<sup>31</sup> Dhali arum thus kun nyo/on ki dot a'di gwo mo ki: Wakki/ /e mini dhu am 'pen ka pije/ mo tani hashi aman mo e bwanj kuthar mo ma. <sup>32</sup> Dhali a'di ki o uni gwo mo ki: Iiku/ mo. Wakan uni iikin mo ka pije/ mo dhali se mo e bwanj kuthar mo. Dhali hili ama'diny kuthar uni yakina waça/ ka luŋgu'b mo e bwaman ma gapa al mo dhali uni 'ce'dkunu sho'k ki yi'de/ mo be. <sup>33</sup> Dhali imanhil kuthar uni sokin mo dhali uni iikin mo e 'peŋkuman bampa/ mo dhali uni ṭorkina ris to gwansan mo dhali gom to kun miikunu mo goma rum thus kun nyo/on mo. <sup>34</sup> Dhali hili aris 'kwani gi 'peŋkuman bampa/ uni pu'dkin mo mmogama Yesus 'kup mo. Dhali ki uni parki a'di e mo tani uni dotki a'di mo mmodhal mom buni gun 'kokina uni 'pen mo be.

## 9

### *Yesus Wacki Wathi/jin Mutta/ Is mo*

<sup>1</sup> Dhali a'di cicki bwam ma kur mo mmo'citha/ gap mo dhali a'di pu'dki'd mo e 'peŋkuman bam-pam piti mo be. <sup>2</sup> Dhali hili uni kalki a'di wathi/ jin mutta/ is mo mmo/isha a'di eya cim piti mo. Dhali ka Yesus parki mongam gwo is buni e mo tani a'di ki o a'di jin mutta/ is gwo mo ki: Buthi adu mo ma, ya/m pem. Miinthus pini dhalkunu /e 'pen mo be. <sup>3</sup> Dhali hili iman'kwar ton tiya o gwo mo e is buni ki: Wathi/ yansan walki gwo sor mo be. <sup>4</sup> Hila Yesus mishki gwom buni jin kulumkina uni ibwa mo be mmo/o gwo mo ki: Atinta kuluma um gwon thus eya dum bum kan mo? <sup>5</sup> Haali/ mii jana sa/? η'ka'da'd mo? Mmo/o wathimpa gwo mo ki:

Miinthus pini dhalkunu /e 'pen mo? walla mmo/o gwo mo ki: Cuyi mis mo dhali 'deki acim pini dhali ya mo? <sup>6</sup> Hili ki um mini mish ki Ya/ gi 'Kwani ta gi moshirr mo e mony'cesh yan mo mmodhal miinthus gi 'kwaniny'cesh 'pen mo – yan'ko'd a'di ki o wathi/ jin mutta/ is gwo mo ki: Cuyi mis mo, dhali 'deki acim pini mo dhali yayi bway pa mo ma. <sup>7</sup> Dhali yan'ko'd a'di cuki mis mo dhali ya bway pa mo be. <sup>8</sup> Ka waambuhany 'kwani parki a'di e mo tani uni 'kokin mo mmoko/ is mo dhali uni karkina Arumgimis ki ca mo gom a'di jin ciki moshirr e 'kwani kan mo be.

### *Ayuk jin Yukkunuwa Mat̄ta mo*

<sup>9</sup> Ka Yesus yaki'd ki yampe 'peni mat̄tan mo tani a'di parki wathiŋ kamu/ e mo jin yuķu gway ka Mat̄ta mo mmoça'ba a'di mo e mo jin teruwa thulpa/ mo. Dhali a'di ki o a'di gwo mo ki: Bathi aha/ nsho'k mo ma. Dhali a'di cuki mis mo dhali bath a'di nsho'k mo be.

<sup>10</sup> Dhali ki a'di ca'bki'd mo eya tharabeesa e gu'b mo tani hili imantera thulpa/ ka ris dhali imanmii miinthus mo pu'dkin mo dhali 'kowa 'cesh nyakka Yesus mo dhali imancik a'di gwo mo be. <sup>11</sup> Dhali ki 'Kwani Parisiyiin mishki mii yan mo tani uni ki o imancik a'di gwo gwo mo ki: Atinta shwan ma manṭor gwom bum to mo nyakki imantera thulpa/ mo dhali 'kwani kun mii miinthus kan mo? <sup>12</sup> Hili ki a'di cikki gwo yan mo tani a'di ki o gwo mo gom uni gwansan kun 'kon ki 'bore/ mo kun mini mii 'koki mii ta ga hakiim mo, hili jasi gom uni gwansan kun 'ba'thkin mo be. <sup>13</sup> Iiku/ mo ma dhali da/ari a'di yan jin ta 'pemen gwo mo ki: Aha/ ḥapa momiimii moyi dhali yisa gom to jin minu 'cith

'kus mo. Haali/ aha/ pu'dkina mo yisa mmoyuk  
uni gun mii miŋkar/e mo yisa hili gom uni gun ta  
imanmii miinthus mo be.

*Gwondotjin Dotu gom To jin Ga/u mo*

<sup>14</sup> Dhali yan'ko'd imancika Yohaan gwo uni  
pu'dkini a'di mo mmo/o gwo mo ki: Atinta ga/a  
aman to mo dhali 'Kwani Parisiyiin si'da/? hili  
imancik /e gwo 'koki ga/ to mo? <sup>15</sup> Dhala Yesus  
ki o uni gwo mo ki: Mina 'kwani kun yuku mo e  
momii mash mo mmota yilkina/ mmoko mo e mo  
çaan jin dina wathinyaña'b nyakki uni mo 'taa?  
Atee mini pu'du/ mo ki wathinyaña'b minu gu mo  
'peni uni mo tani dhali yan'ko'd uni ki ga/ to mo  
be. <sup>16</sup> Wathin 'deñ kamu/ yisa di'da jin kar sharkin  
burrinye/ jin diki shum is apo/ burrinyen dhamo/  
mo haali/ mo jin 'dapu mo tani midi dher bwa mo  
'peni burrinye/ mo, dhali mondher piti midi shi/  
mo kagahara. <sup>17</sup> Wakan si'da/ wathiñ kamu/ diki  
kar yimana mura'th jin this e bwañ ƙucan yimana  
muratha dhamo/ mo. Wakki/ a'di midi mii kan mo  
tani ƙucan midi 'twak mo dhali yimana mura'th  
midi gaça sho mo, dhali ƙucan minu 'ce'd sho'k  
mo. Hili yimana mura'th minu kar e ƙucan kun  
daka kucuru mo dhali wakan uni su/ mini 'ko ka  
'dan'dap mo be.

*'Bwa/ gi Wathi/ jin Ta Tapa mo dhala 'Bom jin  
Ta'da Yesus 'Twaman Burrinyem Piti Is ki Me'd mo*

<sup>18</sup> Ki a'di di'd mmo/o gwo mo wakan i uni mo  
tani hili tapañ kamu/ pu'dki'd mo dhali ça'b ki jin  
'kupa'dupuni bwambori a'di mo mmo/o gwo mo  
ki: 'Bwa/um pem daka wu'd mo be. Hili yayu/ mo  
ma dhali kar me'd pini apowa yim mo ka yim midi

di ki e mo. <sup>19</sup> Dhala Yesus cuki mis mo dhali bath a'di nsho'k mo nyakki imancik a'di gwo mo be. <sup>20</sup> Dhali hili a'boma kamu/ diki'di mun jin 'kosha is ka nyor mo 'pena bas jin gus a'di ki yili 'kume'd i'ce'dka su/ mo. Dhali a'di pu'dki'd mo n'ko'di a'di mo dhali ta 'twaman burrinyem piti is ki me'd mo, <sup>21</sup> haala yim o gwo mo ki is piti mo ki: Wakki/ aha/ mina ta a'di jasi 'twaman burrinyem piti is ki me'd mo tani aha/ mina isi 'bor mo be. <sup>22</sup> Yesus tu'kki'd mo dhali para yim e mo dhali o a'di gwo mo ki: Buthi adu mo ma, 'bwa/um, mongam gwo is pini wački /e mo be. Dhali ki jahanne/ mo tani a'bom wacki'd mo be. <sup>23</sup> Dhali ka Yesus pu'dki'd mo e gu'b gi tapa mo tani a'di parki imanpiya thathar e mo dhala waambuhany 'kwani mo mmomiiya dulatt mo <sup>24</sup> dhali a'di ki o gwo mo ki: Iku/ mo ma haali/ ari nyara/ diki wu mo, hili a'di ishi e mo be. Dhali uni pe'th a'di mo be. <sup>25</sup> Hili ka waambuhany 'kwani urkunu ka pije/ 'baar mo tani a'di seki bway bwaŋ gu'b mo dhali butha yim mme'd mo be dhali ari nyara/ cuki mis mo. <sup>26</sup> Dhali gwo gom mii yan mo tani a'di yaki'd ki lala'th mo e bampa/ 'baar mo be.

### *'Kwaniny Ja'da/ Isu/ kun Bu'thki Momish Mo mo*

<sup>27</sup> Dhali ka Yesus yaki'd ki yampe mo 'peni mun mo tani 'kwaniny ja'da/ isu/ bathki a'di nsho'k mo mmocuu ki 'twa/ kun caaca mo ki: Miiyi mii apo/ aman mo ma, Ya/ ma Dawuu'd mo. <sup>28</sup> Ki a'di cički gu'b mo tani 'kwani kun tana ja'da/ pu'dkini a'di mo. Dhala Yesus ki o uni gwo mo ki: Um gamki gwo is mo ki aha/ misha to yan mii mo 'taa? Uni thok a'di gwo mo ki: Nye, Tapa. <sup>29</sup> Dhali yan'ko'd a'di ki ta uni em buni is ki me'd mo dhali

o gwo mo ki: Isi me'd moŋgam gwo is bum mo tani a'di miikunu gom um mo be. <sup>30</sup> Dhali em buni ka'dkunu mo dhala Yesus ki la ḁan uni gwo ki 'bi'th mo mmo/o gwo mo ki: Dhalku/ ki dhal wathinj kamu/ mmomish a'di yan mo. <sup>31</sup> Hili uni iikini bway mo dhali peper gwom piti ki lala'th mo e pa gwansani 'baar mo.

### *Wathi/jin Ta'da 'Diye/Mishki 'Twa/Wal mo*

<sup>32</sup> Me'd jin iikina uni mbway mo tani hili wathin 'diye/ jin bu'th ma rum thus mo suskunu i a'di mo be. <sup>33</sup> Dhali ka rum thus urkunu ka piye/ mo tani wathi/ jin ta'da 'diye/ oki gwo mo dhala waambuhany 'kwani merkin mo mmo/o gwo mo ki: Toŋ kamu/ yisa di'da jin paru e mo wakansan 'thissa/ mo e 'Kwani ma Israyil ki sule/ mo be. <sup>34</sup> Hili 'Kwani Parisiyiin o gwo mo ki: A'di urki'da rum thus ka piye/ ki gway gi tapa ma ruma 'cesh mo be.

### *Yesus Hilki'da Hil ka 'Thime/gom 'Kwani mo*

<sup>35</sup> Dhala Yesus yaki'd e 'peŋkuman bampa/ 'baar mo dhali e bampa/ si'da/ mmoṭor gwo e gu'b gi montul is buni mo dhali mmoci gwom 'borga/gom Bampa/ ma Arumgimis mo dhali mmowaça ris 'ba'th kun 'koshi 'kwani mo dhali aris isa nyor mo be. <sup>36</sup> Ki a'di parki'da waambuhany 'kwani e mo tani a'di hilki'da hil ka 'thime/ mo gom uni mo haali/ uni 'kokin mo ka ha'th'ko'd mo dhali dar gi mom'bi'th mo mmowa e ki ḁa'bal kun dar ga manhil uni mo be. <sup>37</sup> Dhali yan'ko'd a'di ki o imancik a'di gwo gwo mo ki: Bwaman mondhe'd iskina to mo tani hili imanmiiya ṫu'c uni 'koni daka/ mo be. <sup>38</sup> Thoyi wakansan mo ma, ki Tapa gi

mondhe'd midi hashki imanmiiya Ქ'c mo e bwam  
mondhe'd piti mo be.

## 10

### *Yesus Kwanyki Uni N'kume'd I'ce'dka Su/ mo*

<sup>1</sup> Dhali a'di yukki uni e a'di mo gun ta kum piti kun 'koni 'kume'd i'ce'dka su/ mo kun ta imancik a'di gwo mo dhali ci uni moshirr mo apowa rum thus kun nyo/on mo mmo/ur uni ka pije/ 'peni uni mo dhali mmowaça ris 'ba'th dhali aris isa nyor kun 'koshi 'kwani mo be. <sup>2</sup> Dhali gway gi uni kun 'koni 'kume'd i'ce'dka su/ mo kun dhunu ki she/ mo tani wa cikise/ mo be: jin Ხwa/a/ ta'da Simaan, a'di jin yuku gway ka Buteris mo dhala Andaraawus jin ta'da kam piti mo, dhala Yakuub jin ta ya/ ma Sabadi mo dhala Yohaan jin ta'da kam piti mo be. <sup>3</sup> Dhala Pilibus dhala Bartulamaawus, dhala Tuuma dhala Matta jin ta'da mantera thulpa/ mo, dhala Yakuub jin ta ya/ ma Halpa mo, dhala Taddaawus mo, <sup>4</sup> dhala Simaan gi Pañ Kaana mo dhala Yahuusa Iskariyuuti, a'di jin 'cithi/ a'di is ki gwo mo be.

### *Uni kun Hashu ka 'Kume'd I'ce'dka Su/ mo*

<sup>5</sup> Unij 'kume'd i'ce'dka su/ gwansan hashkin ma Yesus ka pije/ mo mmoñan uni gwo mo ki: Dhalku/ ki ii mo e bwaman mo kun 'kona 'kwani kun 'koki ta 'Kwani Yahuuda/ mo ma dhali dhalku/ ki cic mo e bampa/ gi Pa Saamira mo. <sup>6</sup> Hili iyi mo ma mmodhal mii e i is mo mmoñap ᲏a'bal kun thisu e mo e gu'b ma Israyiil mo be. <sup>7</sup> Dhali ciyi gwo mo me'd jin mina umi ii mo mmo/o ki: Bampa/ gi Momis pu'dki'd mo hila/ e me'd mo be. <sup>8</sup> Waçi uni gun 'ba'thkin mo, 'deki uni gun wukin mo,

dhali dheleli uni gun 'kosha monthus mo, dhali uri aruma 'cesh ka piye/ mo. Um bu'thki a'di ki dar gi to jin çinu mo, çiyi a'di jin çinu ki dar ga kar 'kus mo. <sup>9</sup> Dhalku/'dolkon gana/ki bu'th mo walla 'dolkon kush mo walla gurany 'per eya jisalaan bum mo, <sup>10</sup> walla kucar mo gom iim bum mo, walla burrinyem bwaman isu/ mo, walla appa/nsho'k mo, walla to mme'd mo, haali/ amanmiiya tu'c a'di ha me'd gom ton<sup>tem</sup> piti mo. <sup>11</sup> Dhali e mom bampa/yin jin mina umi se mo walla pa mo tani gami a'di jin ha me'd mo e bwaman mo yan mo dhali 'koyi nyakki a'di mo ntagi um mini ii mo. <sup>12</sup> Me'd jin mina umi cic gu'b mo tani theyi a'di me'd mo ma. <sup>13</sup> Dhali wakki/ gu'b ha me'd mo tani dhalki mon<sup>ku</sup>'th is bum pu'dki'da po/ a'di mo. Hili wakki/ a'di diki ha me'd mo tani dhalki mon<sup>ku</sup>'th is bum dokki'di um ka nyar'ko'd mo. <sup>14</sup> Dhali wakki/ a'din 'de/ yin midi diki bu'th um mo walla diki cik gwom bum mo tani biri abuhany 'peni sho'k bum mo ma me'd jin dhalkina um gu'b çaan 'pen mo walla pa çaan mo. <sup>15</sup> Ka jin<sup>g</sup> gana/ aha/ ona um gwo mo ki a'di mina 'twa/ si'd mo yisa ka tee gi gwon dwall mo gom bampa/ gi Pan Saduum mo dhali Pan Gamuura mo mmobol pa çaan e mo yisa.

### *Monto'c 'Kus Mini Pu'du/ mo*

<sup>16</sup> Hili mo mo ma, aha/ hashkina um mo ka piye/ mo me'd ka'bal mo e bwaman ma wu mo, wakan yuk<sup>i</sup> ki yuk<sup>ı</sup> mo me'd tasha/ mo, dhali dari ga mak mo me'd gurko/ mo. <sup>17</sup> Jiyi 'kwani ki e ki 'bore/ mo ma haali/ uni mini ci um mo e montul is jin dwallu gwo mo dhali dor um mo e gu'b gi montul is buni mo be. <sup>18</sup> Dhali um minu dir 'ko'da 'cesh mo

mbwambori imudhiir mo dhali imalik mo gom gway pem mo mmoçi gwo mbwambori uni mo dhali 'kwani kun 'koki ta 'Kwani Yahuuda/ mo be. <sup>19</sup> Ki uni mini ci um wakan mo tani dhalku/ is ki anan mo mmo/o gwo mo ki gwonta imina umi o mo walla um mini o ata mo. Haali/ a'di jin mina umi o mo tani minu ci um ki mo yansan mo be. <sup>20</sup> Haali/ a'di diki ta um kun mini o gwo mo, hili Shi/in 'pena Ababam bum oki gwo e um mo be. <sup>21</sup> Akama kamu/ midi ciya kam piti mmowu mo, dhali ababa gi wathin 'deñ kamu/ midi ci ya/m piti mmowu mo dhali uci mini cu mis apo/ ikum mo dhali uni mini dhu uni mmowu mo be. <sup>22</sup> Dhali um minu ishi/i e mo gom gway pem mo be. Hili a'diyin jin midi 'dim 'kup ntagi 'pemen mo tani a'di minu woth mo be. <sup>23</sup> Ki uni mini to'c um bwa mo e bampan 'deñ kamu/ mo tani soyi mo e bampan kamu/ mo. Haali/ka jiñ gana/aha/ona um gwo mo ki um mini 'koki ii e bampa/ gi 'Kwani ma Israyiili 'baar mo ntwa/a/ ki Ya/ gi 'Kwani midi pu'du/ mo be.

<sup>24</sup> Amancik gwo yisa ica'd ka mançor a'di gwo mo yisa, walla çinqkina/ si'da/ yisa ica'd ki tapam piti mo yisa. <sup>25</sup> A'di 'koshi jwa mo goma mancik gwo mo mmowa e ka mançor gwom piti mo be, dhali çinqkina/ si'da/ a'di 'koshi jwa mo mmowa e ki tapam piti mo be. Wałki/ uni mini yük tapa gi gu'b gway ka Baalsebuul mo tani bakata 'te/ beseene/ mina uni sor uni gwansan kun 'koni gu'b piti mo.

### *A'di jin Minu Ko/ mo*

<sup>26</sup> Wakan dhalki uni ki ko/ mo haali/ toñ kamu/ yisa di'da jin kumu 'kup mo ki a'di minu 'koki tor eya tente/ mo. Walla toñ kamu/ yisa di'da jin

bagkunu mo ki a'di minu 'koki mish eya tente/ mo.  
<sup>27</sup> A'di jin ṭorka/ um ka ḥwal is mo tani mina umi tor e monjku'kush mo dhali a'di jin cīka um ki ḥakko/ mo tani mina umi ṭor eya tente/ ej 'kunju'b mo be. <sup>28</sup> Dhali dhalku/ ki ko/ uni gwansan kun 'koshi bunjwar is mo hili uni 'koki misha ḥashira/ 'kosh mo. Hili dhali mii yan e i is mo mmoko/ a'di jin mishki'da ḥashira/ sho'k 'ce'd mo mmontal 'de/ ki bunjwar is ilu/ mo e mo ma al o'd mo be. <sup>29</sup> 'Konuki yol ushi 'dii su/ ka maliumi su/ mo 'taa? Dhali janj kamu/ 'de/ 'peni uni gwansan midi diki bita 'cesh mo ki dar gi bwa ma Ababam bum mo be. <sup>30</sup> Hili amur 'kup bum gana/ uni 'baar mo deñkunu e mo be. <sup>31</sup> Gom a'di gi wakan mo tani dhalku/ is ki ko/ mo ma haali/ um a'di i'bitha yol she/ ki 'bi'th mo mmobol ushi 'dii e mo be. <sup>32</sup> Wakan aris 'kwani 'baar mo ka 'detē/ 'detē/ uni gun mini ci gwo mbwambori 'kwani mo gom aha/ mo tani aha/ si'da/ mina ci gwo gom uni mbwambor ma Ababam pem mo, a'di jin di'd e momis mo be. <sup>33</sup> Hili a'diyin jin waṭki aha/ gway mo mbwambori 'kwani mo tani aha/ si'da/ mina waṭ a'di gway mo mbwambor ma Ababam pem jin di'd e momis mo be.

### *Yisa Moŋku'th Isa, Hili Gandal jin Ka'd mo*

<sup>34</sup> Dhalku/ ki ṭosh ki aha/ pu'dkina mo mmokar moŋku'th is e mony'cesh mo. Aha/ dinaki pu'du/ mo mmokal moŋku'th is mo, hili gandala turga/ mo be. <sup>35</sup> Haali/ aha/ pu'dkina mo mmothum wathi/ apo/ com mo dhali a'di jin ta uni a'bwa/um mo tani apo/ kum mo be dhali a'di jin ta uni a'bwa/ um eya mar pití mo tani apowa mar pitim 'bomi

mo be. <sup>36</sup> Dhali 'kwani kun ta 'kup gom wathinj kamu/ mo tani mini ta uni gwansan gi gu'b pitinj gana/ mo be. <sup>37</sup> A'di jin eni com kagahara mo walla kum mo mmobol aha/ e mo tani a'di diki ha me'd mo gom aha/ mo be. Dhali a'di jin eni ya/ mo walla 'bwa/ mo mmobol aha/ e mo tani a'di diki ha me'd mo gom aha/ mo be. <sup>38</sup> Dhali a'di jin diki Ɂal cwany'cithan dhul piti mo dhali diki bath̄ aha/ nsho'k mo tani a'di diki ha me'd mo gom aha/ mo be. <sup>39</sup> A'di jin midi gam mondiki/em piti mo tani a'di midi this a'di e mo be, dhali a'di jin midi this mondiki/em piti e mo gom gway pem mo tani a'di midi gam a'di mo be.

### *To gi Ish Kumma/ mo*

<sup>40</sup> A'diyin jin bu'thki um mo tani a'di bu'thki aha/ mo dhali a'diyin jin bu'thki aha/ mo tani a'di bu'thki a'di jin hashki aha/ mo be. <sup>41</sup> A'diyin jin bu'thki'da manci gwo ma Arumgimis kadhamo/ mo haali/ a'di ta'da manci gwo mo tani midi bu'th to jin ish kumma/ ma manci gwo ma Arumgimis mo, dhali a'diyin jin bu'thki wathinj Ɂar/e mo haali/ a'di ta wathinj Ɂar/e mo tani a'di midi bu'th to jin ish kumma/ gi wathinj Ɂar/e mo be. <sup>42</sup> Dhali a'diyin jin midi pash ari jan tal 'de/ jin gwa'da'd 'peni uni gwansan yi'den 'thupga/ ki 'kwa mo haali/ a'di ta'da manci gwo mo tani ka jin gana/ aha/ ona um gwo mo ki a'di midi diki this tom piti e jin ish kumma/ mo be.

## 11

<sup>1</sup> Dhali ka Yesus 'baarki gwo yansan mmoye'thkina a'di kum piti kun 'konj 'kume'd i'ce'dka su/ sho'k ki gwo mo kun ta imancik a'di

gwo mo tani a'di yaki'd mo 'peni mun mo dhali  
tor gwo mo dhali ci gwo mo e 'penjuman bampam  
 buni mo be.

*Imanhashu mo 'Pena Yohaan jin Ta'da Manmi-  
 iya Mii ki Yi'de/mo*

<sup>2</sup> Dhali ka Yohaan cikki gwo mo ki a'di di'd eya  
 sijin mo gom mii kun miikin ma Kristhos mo tani  
 a'di hashki gwo mo ki imancik a'di gwo mo <sup>3</sup> dhali  
 o a'di gwo mo ki: A/e ta a'di jin midi pu'du/ mo  
 'taa? walla aman mina hil jan kamu/ mo? <sup>4</sup> Dhala  
 Yesus ki thok uni gwo mo ki: Iiku/ mo ma dhali tora  
 Yohaan gwo mo gom to jin cika um mo dhali jin  
 parkina um e mo be <sup>5</sup> ki uni gun tana ja'da/ mo tani  
 bu'thki momish mo mo dhali uni gun ta ŋwol mo  
 tani iin ki sho'k mo, dhali uni gun 'kosha monthus  
 mo tani dhelelkunu is mo dhali uni gun tana 'diye/  
 mo tani cikki gwo mo dhali uni gun wukin mo tani  
 cukunu mis mo dhali uni gun hatha'ko'd mo tani  
 uni çikunu gwom 'boro'd mo be. <sup>6</sup> Dhali mom'bor  
 mii gom a'diyin, a'di jin midi diki bu'th monkol e  
 aha/ mo be.

<sup>7</sup> Me'd jin iikina uni e bway mo tani Yesus telki  
 mii 'pen mo mmotora waambuhany 'kwani gwo  
 mo isi gwo goma Yohaan mo ki: Atinta iikina um  
 ka pije/ mo mmopar e mo e mombwaasho mo?  
 Apil jin yikinkina 'tham is mo 'taa? <sup>8</sup> Atinta iikina  
 um ka pije/ mo mmopar e mo? Mmopar wathi/  
 jin hithi burrinyen na'bulka/ e mo 'taa? Hili uni  
 gwansan kun hithi burrinyen na'bulka/ mo tani  
 uni 'kon e gu'b gi imalik mo be. <sup>9</sup> Dhali atinta  
 iikina um ka pije/ mo mmopar e mo? Amanç*i* gwo  
 ma Arumgimis kadhamo/ mo 'taa? Nye. Aha/ tora

um gwo mo dhali a'di jin bolo'da mançι gwo e mo.

<sup>10</sup> A'di yansan ita a'di jin 'kwarkunu gwo mo ki:  
Hili mo mo ma, aha/ mina hasha gum bway pem  
mbwambori jis /em pini mo,

a'di jin midi thoson /e bway pini n̄twa/a/ mo be.

<sup>11</sup> Ka jiŋ gana/ aha/ ona um gwo mo e bwaman uni  
gwansan kun dhodha up mo tani jaŋ kamu/ yisa  
di'da jin ca'd ka Yohaan jin ta'da manmiiya mii  
ki yi'de/ mo. Hili a'di jin pisapis mo e Bampa/ gi  
Momis mo tani a'di nyca'd ki a'di mo be. <sup>12</sup> 'Pena  
tee ma Yohaan jin ta'da manmii ki yi'de/ mo ntagi  
shwane/ mo tani Bampa/ gi Momis 'koshu ki mom-  
bujur mo dhali 'kwani kun bujurki a'di mo tani  
bu'thki a'di ki mom'bi'th mo be. <sup>13</sup> Haali/ aris  
imanci gwo ma Arumgimis kadhamo/ mo dhali  
gwoŋkan jin çinu mo tani di'd mo mmo/o gwo is  
mo ntaga Yohaan mo be. <sup>14</sup> Dhali waŋki/ um ona  
bwa ki bu'th a'di mo tani a'di ta'da Iliyya jin midi  
pu'du/ mo be. <sup>15</sup> Dhali a'diyin jin ta'd gi gu'ban'ce  
mo tani dhalki a'di ciŋ gwo mo ma.

<sup>16</sup> 'Kwani ma nyakum yil gwansan mo tani migia/  
dhu uni ka par 'ban kata mo? Uni wana e ki uci  
kun 'kon mo e mo ma suug mo dhali mmoyuŋka yuŋ  
mo ki uni gun nyak uniya lo'b buni mo ki:

<sup>17</sup> Aman pina athele/ mo gom um mo tani dhali um  
'koki sa mo be.

Aman gwona mo mmomiiya çinhar mo tani dhali  
um 'koki ko mo ki kony jwa mo be.

<sup>18</sup> Haala Yohaan pu'dki'd mo dhali diki shwa to mo  
walla diki pi to mo dhali uni o gwo mo ki: A'di ta'd  
ga rum thus mo be. <sup>19</sup> Dhali Ya/ gi 'Kwani pu'dki'd  
mo dhali shwa to mo dhali pi to mo dhali uni o gwo  
mo ki: Hili mo mo ma. Amanshwana te/ anyor mo

dhali aman'kosh ma su mo, a'di jin ta'da mugu gi imantera thulpa/ mo dhali 'kwani kun ta imanmii miinthus mo. Hili moyuk a'di karu ka ƙar/e e mo ki mii ma yimi 'baar mo be.

*Wayyi e 'Peñkuman Bampa/ kun Ushkina Du Ri'c Is mo*

<sup>20</sup> Dhali yan'ko'd a'di ʈelki mii 'pen mo mmotor 'kwani gi 'peñkuman bampa/ gwo mo ki 'bi'th mo e mo jin miikunu miiny caagam piti nycine/ mo haali/ uni 'koki rica du is mo be. <sup>21</sup> Wayyi e um, 'Kwani gi Pa Kurasiin mo. Dhali wayyi e um, 'Kwani gi Pam Beetṣayda mo. Haali/ wakki/ adhan miiny caaga/ kun miikunu mo e um mo tani minu 'taki mii mo e Pan Sur mo dhali e Pan Saydaa/ mo tani uni mini 'taki rica du is mo kadhamo/ mo nnii mmohi'th burrinyen shawaal mo dhali 'kosh 'piny mo be. <sup>22</sup> Hili aha/ ḥora um gwo mo ki a'di mina 'twa/ si'd mo yisa ka tee gi gwon dwall mo gom Pan Sur mo dhali Pan Saydaa/ mo mmobol um e mo yisa. <sup>23</sup> Dhali um 'Kwani gi Paŋ Kapranahuum mo a/um minu 'de'k me'd momis mo 'taa? Um minu 'doyu/ ka 'cesh eya Haawiya mo. Haali/ wakka dhana ʈuca 'bi'thga/ kun miikunu mo e um mo tani minu 'taki mii mo gom Pan Saduum mo tani a'di midi 'taki di ntaga tee yansan mo be. <sup>24</sup> Hili aha/ ḥora um gwo mo ki a'di mina 'twa/ si'd mo yisa goma tee gi gwon dwall mo gom Pan Saduum mo mmobol um e mo yisa.

*Iiyu/ I Aha/ mo ma, dhali Siyi Is mo*

<sup>25</sup> Dhali ki mo ڇaan mo tani Yesus ki ḥor gwo mo eya tente/ mo ki: Aha/ 'bora /e bwa i is mo. Ababa jin ta Tapa gi momis mo dhali mony'cesh mo, ki

/e bagki to gwansan 'peni 'kwani kun yukayuk mo dhali kun mishi gwo 'ban mo mmotor a'di eya tente/ ki uni gun tana 'pereny mo be. <sup>26</sup> Nye, Ababa, gom ku gi wakan mo tani a'them pini ona bwa mo be. <sup>27</sup> Aris to 'baar mo cikunu aha/ mo ka Ababam pem mo dhali jan 'deñ kamu/ yisa di'da jin mishki Ya/ mo hili isi ciki/ Ababa mo, dhali jan 'deñ kamu/ yisa di'da jin mishki'da Ababa mo hili isi ciki/ a'di jin ta Ya/ mo dhali ma a'din 'de/ yin jin mina Ya/ ikwany mo tani mina a'di itor eya tente/ mo be. <sup>28</sup> Iiyu/ i aha/ mo ma, aris 'kwani 'baar mo kun miina tu'c mo dhali kun 'thira ton dit'i'd mo, dhali aha/ mina ci um mosi/is mo. <sup>29</sup> Buthi dhaŋka'b tom 'bam pem apo/ um mo ma dhali da/ari 'peni aha/ mo haali/ aha/ tana man'thup e mo dhali amankar is ki gwa'd eya du mo dhali um mini gam mosi/is goma ɺashiram bum mo be. <sup>30</sup> Haali/ dhaŋka'b tom 'bam pem mo tani a'di 'disha'dish mo dhali tom pem jin ɺalka/ mo tani a'di po'dapo'd mo be.

## 12

### *Imancik Gwo Uni 'Ce'dki Pos ka Cim ma Pesu/ mo be*

<sup>1</sup> Dhali ka tee ɻaan mo tani Yesus yaki'd mo e bwam bunto mo ka cim ma pesu/ mo dhali imancik a'di gwo uni 'koshkina ɻe/ mo be dhali uni telki mii 'pen mo mmo'ce'd pos mo dhali mmo'ka a'di mo be. <sup>2</sup> Hili ki 'Kwani Parisiyiin parki a'di jin miikunu e mo tani uni oki a'di gwo mo ki: Hili imancik /e gwo uni miiki to jin dina gwoŋkan jin ɻinu ki dhal bway mo mmomii ka cim ma pesu/ mo be. <sup>3</sup> Dhali a'di ki o uni gwo mo ki: 'Kona um

ki deñ Gwo ma Dawuu'd e mo 'taa? ki a'di 'kosha te/ mo tani dhali uni gwansan kun nyakki 'ko ki a'di mo tani <sup>4</sup> ba a'di cički gu'b ma Arumgimis mo dhali shwa maanjkuthu'd jin di'di buŋ'kus mo, a'di jin dina gwoŋkan jin ćinu ki dhal a'di bway mo mmoshwa mo walla uni gwansan kun nyakki 'ko ki a'di mo, hili gom igasiis uni 'cena mo be. <sup>5</sup> Walla 'kona um ki den gwoŋkan jin ćinu e mo goma cim ma pesu/ mo ki igasiis kun 'kon e gu'b gi mondheleladhelel mo tani uni 'koki kara cim ma pesu/ ki jin kogu mo dhali uni 'kon ka po/ mo? <sup>6</sup> Aha/ ṭora um gwo mo ki jaŋ kamu/ jin ca'd jin bol gu'b gi mondheleladhelel e mo tani di'di mahan mo be. <sup>7</sup> Dhali wałki/ um mini mish 'pemen gwo yansan mo tani, aha/ ona bwa ki momiimii mo dhali yisa abas jin 'ciṭhu/ mo, um mini 'taki 'koki wak uni gun 'kon ka po/ mo be. <sup>8</sup> Haali/ Ya/ gi 'Kwani a'di ta tapa ga cim ma pesu/ mo be.

### *Wathi/jin Kutha Me'd Guŋkuru/ mo*

<sup>9</sup> Dhali a'di yaki'd mo 'peni mun mo dhali cički'd mo e gu'b gi montul is buni mo be. <sup>10</sup> Dhali hili wathiŋ kamu/ diki'd mmun mo jin kutha me'd guŋkuru/ mo dhali uni dotki a'di gwo mo ki: A'di ta gwo jin dhala gwoŋkan jin ćinu bway mo mmowaça/ waç mo ka cim ma pesu/ mo 'taa? Wakan ki uni mini 'taki ta gi gwo mmoyer a'di is ki gway mo be. <sup>11</sup> Dhali a'di ki o uni gwo mo ki: Wathi/ jana di'di bwam umme, a'di jin ta'd gi ķa'bala 'de/ jin bitki'd e bwam jis mo ka cim ma pesu/ mo, mina a'di diki ya mo mmobu'th a'di mo dhali mmołkal a'di ka pije/ mo 'taa? <sup>12</sup> Bahili wathimpa a'di gama she/ yol ki gam mo mmobol

ka'bal e mo. Wakan a'di ta gwo jin dhala gwoñkan jin çinu bway mo mmomii miim 'boro'd ka cim ma pesu/ mo be. <sup>13</sup> Dhali yan'ko'd a'di ki o wathi/ gwo mo ki: Hethi me'd pini mo ma. Dhali wathi/ he'tki me'd piti mo dhali a'di waçkunu mo dhali a'di 'borkina me'd mo me'd janj kamu/ mo be. <sup>14</sup> Hili 'Kwani Parisiyiin iikin ka pije/ mo dhali bu'th gwo jin gamu me'd apo/ a'di mo gom mii jin mina uni 'ce'd a'di sho'k mo be.

### *Gwo ma Ishaya jin Onu Is Thimkunu mo be*

<sup>15</sup> Dhala Yesus a'di nyithki mii yansan mo dhali yaki'd mo 'peni mun mo. Dhali 'kwani ka ris bathki a'di nsho'k mo dhali a'di ki waç uni 'baar mo be. <sup>16</sup> Dhali a'di ki ƙan uni gwo mo mmod-halku/ ki dhal a'di ki a'di minu mish mo. <sup>17</sup> Dhali mii yansan a'di ta gwo jin thimkunu mo jin okin ma amançι gwo ma Arumgimis kadhamo/ mo jin ta'da Ishaya mo ki:

<sup>18</sup> Hili mo mo ma, çin̄kinam pem a'di jin kwanya/ mo tani jin ta a'di jin enka/ mo dhali a'di jin 'bor ma ƙashiram pem bwa i is mo tani aha/ mina ci Shi/in pem apo/ a'di mo, dhali a'di midi ƙor gwo gom miin̄kar/e gom 'kwani kun 'kokki ta 'Kwani Yahuuda/ mo be.

<sup>19</sup> Dhali a'di midi diki wal mo walla midi diki ko kagahara mo  
walla mina jan 'deñ kamu/ diki cik 'twam piti mo e bway tur jin iinu mo be.

<sup>20</sup> Dhali a'di midi diki 'ce'd bwa mo me'd apil jin mu/u mo  
walla midi diki usa thus jin mura she/ ikup mo ntagi a'di midi ƙal mo ma ƙar/e ki mo jin minu pi mii e mo be.

**21** Dhali ki gway piti mo tani a'di mina 'kwani kun  
'koki ta 'Kwani Yahuuda/ ita ga 'teŋ kape/  
mo be.

*Gwo Sor jin Walu apo/ Shi/in Dheleladhelel mo*

**22** Dhali yan'ko'd wathi/ jin ta'da ja'da/ mo dhali  
jin mol 'twa/ wal mo dhali jin bu'th ma rum thus  
mo tani ƙalkunu mo e a'di mo dhali a'di ki waç a'di  
mo. Wakan a'di jin mol 'twa/ wal mo tani a'di  
oki gwo mo dhali par to e mo be. **23** Dhali aris  
'kwani 'baar mo merkin mo dhali o gwo mo ki:  
Dina yan ki ta Ya/ ma Dawuu'd mo 'taa? **24** Hili ki  
'Kwani Parisiyiin cikki a'di mo tani uni o gwo mo  
ki: A'di ta jasi jim ma Baalsebuul mo jin ta tapa  
ma ruma 'cesh mo jin urkina wathi/ yansan arum  
thus ka pije/ mo. **25** Dhali a'di mishki gwom buni  
kun kuluma uni ibwa mo tani a'di ki o uni gwo mo  
ki: Aris 'penkuman bampa/ kun ƙwa/u bwa mo e  
is buni mo tani uni shi/ki is mo dhali 'penkuman  
bampam kamu/ walla gu'b jin ƙwa/u bwa mo e is  
piti mo tani midi mol dosh mo be. **26** Dhali wakka  
Setaan uru'da Setaan ka pije/ mo tani a'di ƙwa/u  
bwa mo apo/ is piti mo. Ba bampam piti midi mish  
dosh kata mo? **27** Dhali wakki/ aha/ ura aruma  
'cesh ka pije/ ki gway ma Baalsebuul mo tani a/  
dhali iya/m bum mini ur uni ka pije/ kaja mo?  
Wakan uni mini ta um imandwall gwo mo. **28** Hili  
wakki/ ki Shi/in ma Arumgimis jin urka/ aruma  
'cesh ka pije/ mo tani dhali yan'ko'd Bampa/ ma  
Arumgimis midi pu'du/ apo/ um mo be. **29** Walla  
ki wathi/ midi ciç gu'b gi wathi/jin 'bitha'bi'th kata  
mo dhali ƙal tom piti mo hili isi ciki/ a'di midi mii  
dek wathi/jin 'bitha'bi'th ka shi/ n̄twa/a/ mo. Dhali

yan'ko'd mo tani ka jin̄ gana/ a'di midi kwal gu'b  
 piti to mo be. <sup>30</sup> A'di jin̄ diki di nyakki aha/ mo  
 tani a'di di'd apo/ aha/ mo dhali a'di jin̄ diki nyak  
 is tul ki aha/ mo tani a'di ta'da ak̄wa/um bwa ki  
 aha/ mo be. <sup>31</sup> Wakan aha/ tora um gwo mo ki: Ka  
 aris miinthus mo dhali gwo sor jin̄ wala 'kwani mo  
 tani uni dhalkunu 'kwani 'pen mo be. Hili a'di jin̄  
 wal gwo sor apo/ Shi/in mo tani yisa minu dhal  
 miinthus piti 'pen mo ki sule/ mo. <sup>32</sup> Dhali a'diyin  
 jin̄ midi o gwo apo/ Ya/ gi 'Kwani mo tani a'di minu  
 dhal miinthus piti 'pen mo, hili a'diyin jin̄ o gwo  
 sor apo/ Shi/in Dheleladhelel mo tani a'di minu  
 'koki dhal miinthus piti 'pen mo hili ki she/ yil yan  
 mo walla ki yil jin̄ midi pu'du/ mo be.

<sup>33</sup> Hili kari cwa jin̄ 'boro'd mo dhali maman piti  
 jin̄ 'boro'd mo, walla kari cwa jin̄ shiyi'd mo dhali  
 maman piti jin̄ shiyi'd mo, haali/ cwa mishu ki  
 maman piti mo be. <sup>34</sup> Um uçi gi tasha/, um mishi  
 gwo jin̄ 'boro'd o kata mo? ki um ta kun ta thus ki  
 thus kan mo? Haali/ 'peni mo jin̄ isha to kumma/  
 eya du mo tani 'twa/ a'di ciki gwo mo be. <sup>35</sup> Dhali  
 wathim 'boro'd jin̄ isha tom 'boro'd kumma/ eya  
 du mo tani a'di kalki miim 'boro'd mo dhali wathi/  
 jin̄ ta thus jin̄ isha tonthus kumma/ eya dum piti  
 mo tani a'di kalki tonthus mo be. <sup>36</sup> Aha/ tora um  
 gwo mo eya tee yan gi gwon dwall mo tani 'kwani  
 minu kam 'kup ki gwo mo goma ris gwo 'baar mo  
 ki 'beles kun thutha uni mii mo mmo/o mo be.  
<sup>37</sup> Haali/ ki gwom pini mo tani /e minu kar ka kar/  
 e mo dhali ki gwom pini mo tani /e minu wał mo  
 be.

*'Kwani kun Tana Nyakum Yil kun Ta Thus ki  
 Thus mo Napki Jamas Mii mo*

<sup>38</sup> Dhali yan'ko'd iman'kwar ton tiya dhali 'Kwani Parisiyiin mo tani uni oki a'di gwo mo ki: Amanṭor gwo, aman ona bwa ki par jamas mii e 'peni /e mo be. <sup>39</sup> Hili a'di thokki uni gwo mo ki: 'Kwani kun ta thus ki thus mo dhali kun ta iman-mii miinycal ka nyakum yil buni mo tani simmki jamas mii e mo, hili jamas mii yisa minu ci gom uni mo hili isi ciki/jamas mii jin ta'da amançι gwo ma Arumgimis kadhamo/ mo jin ta'da Yuunaan mo be. <sup>40</sup> Haali/ me'd jin dikan ma Yuunaan ka cim kwara mo dhali ka cim kwara ki mon'thiny ilu/ mo e bwan to yi'de/ mo tani wakan si'da/ mina Ya/ gi 'Kwani di ka cim kwara mo dhali ka cim kwara ki mon'thiny ilu/ mo eya du gi mony'cesh yansan mo be. <sup>41</sup> 'Kwani gi Pa Ninawa mini cu mis mo e gwon dwall mo nyakki 'kwani ma nyakum yil gwansan mo dhali uni mini wak uni mo, haali/ uni 'koki rica du is mo gom gwo jin çikin ma Yuunaan mo, dhali hili jan kamu/ di'di mahan mo jin ekki'd ka Yuunaan mo be. <sup>42</sup> Dhala yim jin ta'da malik 'peni 'ko'd gwar ma biny cam mo tani midi cuyu/ mis mo e gwon dwall mo nyakki 'kwani ma nyakum yil gwansan mo dhali wak uni mo be haala yim pu'dki'd mo 'peni mo jin dina mony'cesh 'kup mo mmocik yük ma Sulemaan mo dhali hili mo mo ma, jan kamu/ di'di mahan mo jin ekki'd ka Sulemaan mo be.

*Mo jin Dokkin ma Rum Thus kun Nyo/on ka  
Nyan'ko'd mo*

<sup>43</sup> Ka rum thus kun nyo/on iikin ka pije/ 'peni wathi/ mo tani a'di yaki'd ki tur mo e mo jin dar gi yi'de/ mo mmonjap mo mo mmosi/is mo hili a'di diki gam mo mo be. <sup>44</sup> Dhali yan'ko'd a'di ki o gwo

mo ki: Aha/ mina dok ka nyan'ko'd mo e gu'b pem mo 'peni mo jin yayika/ mo 'peni cine/. Dhali ki a'di pu'dki'd mo tani a'di gamki a'di bwa 'te/ mo mmodhi'thkunu a'di mo dhali mmothosonkunu aris to 'baar mo ki 'bore/ mo be. <sup>45</sup> Dhali yan'ko'd a'di ki ya mo dhali susa rum thus kun 'koni pesu/ nyakki a'di mo kun ta thus ki thus mo mmobol a'di e ki is piti mo dhali uni cičkin mo dhali nyakki 'ko mo. Dhali monyça'b gi wathi/ jin ta jinj 'ko'd mo tani a'di warki'd ki shi/ mo mmobol jin twa/a/ e mo be. Wakan si'da/ a'di mina e waki 'kwani ma nyakum yil gwansan kun ta thus ki thus mo be.

### *KoYesus dhali Ikam Piti mo*

<sup>46</sup> Dhali ki a'di di'd mmo/o 'kwani gwo mo tani hili kum dhali ikam doshkina pije/ mo mmodot gwo mo mmotora ḥor ki a'di mo be. <sup>47</sup> Wathinj kamu/ ṭorki a'di gwo mo mmo/o gwo mo ki: Ata'dam pini dhali ikam pini uni 'kokin mo mmodosha pije/ mo mmodot/e mo mmotora ḥor ki/e mo be. <sup>48</sup> Hili a'di thok wathi/ gwo mo dhali o a'di gwo mo ki: Aja a'di ita'da ata'dam pem mo dhali aja a'di ita ikam pem mo? <sup>49</sup> Dhali a'di ki he'th me'd piti mo 'kup ki imancik a'di gwo mo dhali a'di ki o gwo mo ki: Ita'dam pem anan mo dhali ikam pem anan mo be. <sup>50</sup> Haali/ a'diyin jin mii bwa ma Ababam pem jin di'd e momis mo tani a'di ta'da akam pem mo dhali 'bwah pem mo dhali ata'dam pem mo be.

## 13

### *Gwom 'Bi'th/e goma Ka'bany To jin Yeķu mo*

<sup>1</sup> Dhali ka teen 'de/ ḥaan mo tani Yesus yaki'd ka pije/ mo 'peni gu'b mo dhali ca'bki'di shemena

al mo be. <sup>2</sup> Dhali adhana waambuhany 'kwani tulki is mo e a'di mo. Wakan a'di sekina a'di mo e bwam ma ƙur mo dhali ça'b nycine/ mo dhali awaambuhany 'kwani uni doshkin shemen ma gap mo be. <sup>3</sup> Dhali a'di ki ƙor uni gwo ka ris ki gwom 'bi'th/e mo ki: Amanyeka ƙa'banya yaki'd mo mmoye ƙa'banya mo be. <sup>4</sup> Dhali ki a'di yekki'd mo tani aka'banya tiya bitkin mo e bway tur kun iinu mo dhali 'dii pu'dkin mo dhali los uni mo be. <sup>5</sup> Dhali aka'banya tiya bitkin mo eya 'cesh gi embul wosh mo, e mo jin dara uni ka 'cesh ki nyanye/ mo tani dhali ki jahanne/ uni 'kana le/ mo haali/ uni dar gi embul mo e mo ma 'cesh mo be. <sup>6</sup> Hili ka tente/ sulki'd mo tani uni shi'bilkunu mo dhali haali/ uni daran ga birman mo tani uni ku'thkin ka bush'ko'd mo be. <sup>7</sup> Aka'banya tiya uni bitkin mo e bwam ma 'de/ mo dhali ka 'de/ can mo tani uni çokotki uni mo be. <sup>8</sup> Aka'banya tiya uni bitkin mo eya 'cesh jin 'boro'd mo dhali uni dho'th manan mo, jaŋ kamu/ dhotho'di iss 'kwanimpa ka mudhe'd mo dhali jaŋ kamu/ dhotho'di iss 'kwanimpa ka 'de/ i'ce'dka 'kume'd mo be. <sup>9</sup> A'diyin jin ta'd gi gu'ban'ce mo tani dhalki a'di cik gwo mo ma.

### *'Kup Gwo gom Gwom 'Bi'th/e mo*

<sup>10</sup> Dhali yan'ko'd imancık a'di gwo pu'dkini a'di mo dhali o a'di gwo mo ki: Atinta ƙora /e uni gwo ki gwom 'bi'th/e mo sa/? <sup>11</sup> Dhali a'di ki thok uni gwo mo ki: E um mo tani um ƙinu gwo mo mmomish gwo jin ƙinu ki jin bag mo gom Bampa/ gi Momis mo, hili e uni mo tani uni 'konuki ci a'di mo be. <sup>12</sup> Haali/ e a'diyin jin ta'd gi nyanye/ mo tani minu ci a'di ki nyanye/ mo be dhali a'di midi ta gi a'di

jin ishki'd ka entus mo. Dhali hili 'peni a'diyin jin dara'd mo tani hili me'd jin tana a'di gi a'di mo tani minu bu'th 'peni a'di mo be. <sup>13</sup> A'di ta 'pemen gwo a'danni jin oka/gwo e uni ki gwom 'bi'th/e mo haali/ uni hilki to gun 'kona uni ki mish mo dhali uni cikki gwo kun 'kona uni ki cik mo walla uni 'koki mish gwo 'ban mo be. <sup>14</sup> E uni ka jin gana/ mo tani gwo thimkunu mo jin onu is mo eya Ishaya jin o'd ki:

Um ka jin gana/ mini cik gwo mo tani hili um mini  
 'koki mish gwo 'ban ki sule/ mo,  
 dhali um ka jin gana/ mini par to e mo tani hili um  
 mini 'koki nyith to ki sule/ mo be.

<sup>15</sup> Haala duŋ 'kwani gwansan uni warkin ka du  
 kun dhethadhe'th mo  
 dhali 'cem buni mo tani usa/us mo mmocik gwo  
 mo,  
 dhali em buni mo tani uni 'dapkin mo be.

Hili isi ciki/ki uni mini 'taki nyith to ki em buni mo  
 dhali cik gwo ki 'cem buni mo  
 dhali mish a'di 'ban ka dum buni mo  
 dhali tu'k mo e aha/ mo jin migā/ 'taki waç uni mo  
 be.

<sup>16</sup> Hili mom'bor mii gom em bum mo haali/ uni  
 mishki to mo dhali 'cem bum mo haali/ uni cikki  
 gwo mo be. <sup>17</sup> Ka jin gana/ aha/ ona um gwo  
 mo ki imanci gwo ma Arumgimis ka ris mo dhali  
 'kwani kun tana kar/e mo tani uni 'koshkina te/  
 mo mmohil a'di jin misha um mo tani dhali uni  
 'koki par a'di e mo dhali mmocik a'di jin cikkina um  
 mo dhali uni 'koki cik a'di mo be.

*Yesus A'di Torki 'Pemen Gwo gom Gwom 'Bi'th/e  
 gom To jin Yeku mo*

<sup>18</sup> Gom a'di gi wakan mo tani ciki gwo gom gwom 'bi'th/e goma manyeka ka'bany to mo ma. <sup>19</sup> Ki a'din 'de/ yin jin cikki gwo gom Bampa/ ma Arumgimis mo dhali diki mish a'di 'ban mo tani a'din thus 'de/ yin pu'dki'd mo dhali kwany gwo jin sinu eya dum piti mo be. A'di yansan ta a'di jin yeku e bway tur jin iinu mo be. <sup>20</sup> Dhali me'd gom a'di jin yeku e embula 'cesh wosh mo tani a'di ta a'di jin cikki gwo mo dhali ki jahanne/ a'di ki la bu'th a'di ki bwanj 'kunyga/ mo, <sup>21</sup> hili a'di dara'd ga birman e is piti mo hili a'di di'd ari'ceenne/ mo dhali ki monto'c bwa pu'dki'd mo walla ki mon'kosha 'kosh cuki'd mo gom gway gi gwo mo tani ki jahanne/ a'di bitki'd mo be. <sup>22</sup> Dhali wakan gom a'di jin yeku mo e bwam ma 'de/ mo tani a'di yansan ita a'di jin cik gwo mo, dhali hili a'di bala to ga 'cesh is mo dhali 'penkapan piti jin tana a'di pa ki pa mo tani çokot a'di mo dhali a'di mol dho'th maman mo be. <sup>23</sup> Dhali gom gwo gi a'di jin yeku mo eya 'cesh jin 'bora'bor mo tani a'di yansan nta a'di jin cik gwo mo dhali mish a'di 'ban mo dhali a'di ka jin gana/ dhodhi maman mo be, dhali adho'th piti jin dhodha a'di eya tora 'de/ mo tani ta iss 'kwanimpa mmudhe'd mo dhali jan kamu/ ki iss 'kwanimpa ikwara mo, dhali jan kamu/ ki iss 'de/ i'ce'dka 'kume'd mo be.

### *Biriny e Bwam Pos jin Sinu mo*

<sup>24</sup> Dhali gwom 'bi'th/ ej kamu/ kara a'di uni mbwambor mo mmo/o gwo mo ki: Bampa/ gi Momis mo tani mishu kar ka par 'ban mo me'd wathi/ jin yekki'da ka'bany tom 'boro'd e bwaman buntom piti mo be. <sup>25</sup> Hili ki 'kwani ishki e mo

tani a'di jin ta 'kup gi a'di pu'dki'd mo dhali yek biriny e bwaman pos piti mo dhali a'di ki ya mo be. <sup>26</sup> Wakan ki to jin sinu mo 'kaki'da le/ mo tani dhali dho'th emen mo tani dhali yan'ko'd biriny pikin si'da/ mo be. <sup>27</sup> Dhali ki imanmiiya tu'c gi com gu'b pu'dkin mo dhali o a'di gwo mo ki: Tapa, dina / e ki yeka ka'bany to jin 'boro'd e bwam buntom pini mo 'taa? Atinta winya biriny isi pi mo? <sup>28</sup> A'di ki o uni gwo mo ki: A'di jin ta 'kup, a'di mii mii yansan mo be. Dhali imanmiiya tu'c o a'di gwo mo ki: A/dhali /e n̄api aman mmo/ii mo mmotul uni is mo 'taa? <sup>29</sup> Hili a'di ki o gwo mo ki: Yisa. Hili isi ciki/ ki um mini tul biriny is mo tani um mini buk pos si'da/ mo mmontal 'de/ nyakki uni mo be. <sup>30</sup> Dhalki uni cani montal 'de/ mo ntagi bwam mondhe'd mo dhali bwam mondhe'd min ma teem piti 'baar mo jin minu 'cith a'di to mo tani aha/ mina tor iman'cith to gwo mo ki: 'Cithi/ to mo ma mmotul biriny is nt̄wa/a/ mo dhali dek uni ki dekk̄en mo mmoci'th mo hili tuli pos is mo e bwan themes pem mo ma.

### *Emen To jin Miinuwa 'Tash mo*

<sup>31</sup> Dhali gwom 'bi'th/en kamu/ kara a'di uni mbwambor mo mmo/o gwo mo ki: Bampa/ gi Momis a'di wana e ki emen to jin miinuwa 'tash mo, a'di jin kala wathi/ mo dhali yek mo e bwam buntom piti mo be. <sup>32</sup> Emen to a'di ta piri'th ki piri'th mo be hili ki a'di caki'd mo tani a'di wurupa wurup kagahara mo dhali warki'd ki cwa mo. Wakan 'dii kun pen e mis mo tani pu'dkin mo dhali nyan gu'b buni eya bim piti mo be.

### *Gwo goma Cumat mo*

<sup>33</sup> A'di ki ṭor uni gwom 'bi'th/eŋ kamu/ mo mmo/o gwo mo ki: Bampa/ gi Momis wana e ka cumat jin ƙal ma 'bom mo dhali kum a'di 'kup mo eya dipany jin baru ka uçaŋŋi kwara mo ntagi a'di sha'bki'di 'baar mo be.

*Mo gi Bu'th ma Yesus Gwom 'Bi'th/e Mmotor mo*

<sup>34</sup> Aris gwo gwansani 'baar mo okin ma Yesusa waambuhany 'kwani ki gwom 'bi'th/e mo. Ka jin gana/ a'di diki o gwoŋ kamu/ ki dar gi gwom 'bi'th/e mo be. <sup>35</sup> A'di ta gwo jin minu thim mo jin okin ma amançι gwo ma Arumgimis kadhamo/ ki: Aha/ mina ƙa'd 'twam pem mo mmotor gwom 'bi'th/e mo be. Aha/ mina ṭor eya tente/ to jin bagu mo ki mony'cesh ƙa'bkunu mo be.

*Yesus A'di Torki 'Pemen Gwom 'Bi'th/e goma Biriny jin yeķu e Bwam Pos mo*

<sup>36</sup> Dhali yan'ko'd a'di dhalki'da waambuhany 'kwani 'pen mo dhali a'di yaki bway gu'b mo. Dhali imancik a'di gwo pu'dkini a'di mo mmo/o a'di gwo mo ki: Tori aman 'pemen gwom 'bi'th/e mo ma gom biriny jin yeķu e bwam bunto mo. <sup>37</sup> Dhali a'di thoķ gwo mo ki: A'di jin yeķki emen to jin 'boro'd mo tani ta Ya/ gi 'Kwani mo be. <sup>38</sup> Dhali bwam mondhe'd mo tani a'di ta mony'cesh mo be. Dhali emen to tani a'di ta 'pemen gwo gom iya/ gi Bampa/ gi Momis mo. Dhali 'pemen gwo gom biriny mo tani a'di ta iya/ gi a'din thus 'de/ yin mo be. <sup>39</sup> Dhali a'di jin ta 'kup jin si'da ƙa'bany to e uni mo tani ta tapa ma ruma 'cesh mo be. Dhali bwam mondhe'd mo tani a'di ta mo jin 'disha 'pemen mo mo mmodi 'kup mo be. Dhali iman'cith to mo tani

ta iman'doyu gwo mo be. <sup>40</sup> Jasi me'd biriny kun  
tulu is mo dhali ci'th ki o'd mo tani wakan a'di  
mina embul mo i'dish 'twa/ mo be. <sup>41</sup> Haali/ Ya/ gi  
'Kwani midi hash iman'doyu gwom piti mo dhali  
uni mini tul uni gwansan is ka pije/ 'peni bampam  
piti mo aris uni gun rakki miinthus mo dhali aris  
uni gun miiki to kun ta thus ki thus mo. <sup>42</sup> Dhali  
uni mini ṭa'k uni e mo/o'd jin ca'bki wur wur mo.  
Dhali e mun mo tani 'kwani mini ko mo dhali 'pe'd  
shem buni mo be. <sup>43</sup> Dhali uni gun min ka kar/  
e mo tani mini 'twa₄ mo mo me'da tente/ 'peni  
Bampa/ ma Ababam buni mo be. A'di jin ta'd gi  
gu'ban'ce mo tani dhalki a'di cik gwo mo ma.

*To jin Ish Kumma/jin Bagu mo*

<sup>44</sup> Bampa/ gi Momis mo a'di wana e ki to jin ish  
kumma/ jin bagu mo e bwam bunto mo, jin gama  
wathi/ mo dhali kum 'kup mo. Yan'ko'd gom bwaj  
'kunygam piti mo tani a'di ki ya mo dhali yol a'di  
'baar mo, a'di jin tana a'di mo jin mina a'di yol  
bunto caan mo be.

*Dhema/jin 'Bitha Yol She/ ki 'Bi'th mo*

<sup>45</sup> Dok/e Bampa/ gi Momis a'di wana e ki wathi/  
jin mii'da dukkaan mo jin napi dhema/ jin gama  
gam mo be. <sup>46</sup> A'di, ki a'di gamki a'din 'de/jin caaca  
mo jin 'bitha yol she/ ki 'bi'th mo tani a'di yaki'd  
mo dhali yol a'di 'baar mo, a'di jin tana a'di mo ki  
a'di midi yol a'di mo be.

*Gwo goma 'Thi/ mo*

<sup>47</sup> Dok/e Bampa/ gi Momis a'di wana e ka 'thi/  
mo, a'di jin yipu mo e bwam yi'de/ mo dhali mmo-  
musha ris wa'c ka entus ki e ki she/ ki she/ mo be.

**48** Dhali ki a'di 'tu'dki'd mo tani 'kwani ki dir a'di ka gap mo dhali 'ko 'pena 'cesh mo dhali lak uni gun 'boron mo e bwaman tor'kul bwa mo, hili kun shiyin mo tani taguwa sho mo be. **49** Wakan si'da/ a'di midi ta mo jin 'disha 'twa/ mo. Iman'doyu gwo mini pu'du/ mo dhali kwa/ 'kwanin thus bwa mo 'peni uni gun miin ka kar/e mo be. **50** Dhali ta'k uni e mo o'd jin ca'bki wur wur mo be. Dhali e mo yin mo tani 'kwani mini ko mo dhali 'pe'd shem buni mo be.

*To kun Ish Kumma/ kun This dhali kun Dhamo/ mo*

**51** A/um mishi gwo gwansan 'bani 'baar mo 'te/ sana? Uni thok a'di gwo mo ki: Nye. **52** Dhali a'di oki uni gwo mo ki: Wakan si'da/ iman'kwar to 'baar mo uni gun ye'thkunu sho'k mo gom Bampa/ gi Momis mo tani uni wana e ki com gu'b jin kalki tom piti jin ish kumma/ mo ka pije/ mo a'di jin ta jin this mo dhali jin dhamo/ mo be.

*Yesus A'di Wakku mo e Pa Naasira mo*

**53** Dhali ka Yesus 'baarki gwom 'bi'th/e gwansan mo tani a'di yaki'd 'peni mun mo be. **54** Dhali a'di pu'dki'd mo e bampam pitin gana/ mo dhali tor uni gwo mo e gu'b gi montul is buni mo. Wakan uni merkin mo dhali o gwo mo ki: 'Peni mana gama wathi/ yansan yuk kan mo sa/? Dhali mii mii gwansan kun eka/ ek mo? **55** Dina a'di ki ta ya/ ma manpa/ cwa mo 'taa? Dhali din ma kam piti ki ta Yakuub mo dhala Yuusup mo dhala Simaan mo dhala Yahuusa mo 'taa? **56** Dhali 'kona i'bwaham piti 'baar mo ki nyak 'ko ki ana mo 'taa? Dhali 'peni mana gama wathi/ yansan aris to gwansani 'baar mo kan? **57** Dhali uni kolu ki a'di mo be.

Hila Yesus ki o uni gwo mo ki: Amanci gwo ma Arumgimis yisa dar gi tak e mon tiya yisa, hili isi ciki/e bampam piti mo dhali e gu'b pitiŋ gana/ mo be. <sup>58</sup> Dhali a'di mol mii mii gun 'bitha'bi'th mo e mun gom uni dar gi gwo jin gamu is mo be.

## 14

### *Mowu ma Yohaan jin Ta'da Manmiiya Mii ki Yi'de/mo*

<sup>1</sup> Dhali ka tee çaan mo tani Hiroodus jin ta'da rub ra/iis cikki gwo goma Yesus mo be. <sup>2</sup> Dhali a'di ki o çinkinam piti gwo mo ki: A'di ta'da Yohaan jin ta'da manmiiya mii ki yi'de/ mo be. A'di 'de'kkunu mo 'peni mowu mo. A'di miikina a'di aris to gwansan ki mom'bi'th mo. <sup>3</sup> Haala Hiroodus bu'thki'da Yohaan mo dhali dek a'di mo dhali kar a'di eya sijin mo gom gway ma Hirodiyya mo ash ma kam piti ka Pilibus mo be. <sup>4</sup> Haala Yohaan o a'di gwo mo ki: Haali/ a'di diki ta mii gi gwoñkan mmokar ayim mo be. <sup>5</sup> Dhali hili a'di ɳap a'di mmo'kosh jwa mo tani a'di ɭo/ki 'kwani mo haali/ uni karki a'di ka manci gwo ma Arumgimis mo be. <sup>6</sup> Hili ka cim jin dhodhuwa Hiroodus pu'dki'd mo tani 'bwa/ ma Hirodiyya saki'd mo mbwambori 'kwani mo dhali a'di 'boro'da Hiroodus bwa mo be. <sup>7</sup> Wakan a'di ki o a'di gwo is mo ɻa ba/ gom to jin mina a'di ciya yim mo to yin jin mina a'di dot a'di mo be. <sup>8</sup> Dhali ayim logomkina kum ki gwo mo mmo/o gwo mo ki: Ciyaa/ 'kup ma Yohaan jin ta'da manmii ki yi'de/ shwanesan mo e bwam ma sahan mo. <sup>9</sup> Dhala malik a'di shina bwa mo, hili haali/ gom gwo jin ona a'di is mo dhali yilkinam piti mo tani a'di ɻanki gwo mo ki a'di minu guyu/ mo be.

**10** A'di hashki gwo mo dhala Yohaan 'cithkunu 'kup mo eya sijin mo be. **11** Dhali 'kup piti guyunu mo e bwam ma sahan mo dhali çiki nyara/ mo dhala yim ki ƙalki a'di ki kum mo be. **12** Dhali imancık a'di gwo pu'dkin mo dhali kal buŋwar is piti mo dhali kan a'di mo, dhali uni iikin mo dhali ṭora Yesus gwo mo be.

*'Kwani Alaapi Mudhe'd kun Cikunu Tonte/ mo*

**13** Ka Yesus cikki gwo yansan mo tani a'di yaki'd mo 'peni mun eya kur yi'de/ mo e mo jin dar gi 'kwani mo is 'ko'd mo be. Hili ka waambuhany 'kwani cikki gwo mo tani uni iikin mo mmobath a'di nsho'k mo ki sho'k 'peni bampa/ mo. **14** Ki a'di yaki'd e shemena gap mo tani a'di parki'da dhana waambuhany 'kwani e mo, dhali a'di ki ko'c uni e i is mo dhali wac 'ba'th buni mo be. **15** Ki mo ta mom'pimpili/ mo tani imancık a'di gwo pu'dkini a'di mo dhali o a'di gwo mo ki: Mo yansan dar gi 'kwani mo be dhali shwane/ atente/ yulu'd mo. Hashka waambuhany 'kwani bway pa mo ma mmoyol tonṭe/ gom is buni mo. **16** Yesus ki o uni gwo mo ki: Uni mini mii ta gi bway mmo/ii bway pa mo yisa. Um mini ci uni tonṭe/ mmoshwa mo be. **17** Uni ki thok a'di gwo mo ki: Am tana gi jasi maanjukuthu'di mudhe'd mmahan mo dhali to yi'de/ isu/ mo be. **18** Dhali a'di ki o uni gwo mo ki: 'Doyi uni mmahani aha/ mo ma. **19** Dhali yan'ko'd a'di ki kana waambuhany 'kwani gwo mo mmo'ko 'pena 'cesh apowa sho mo. Dhali a'di ki bu'th maanjukuthu'di mudhe'd mo dhali to yi'de/ nsu/ mo tani a'di ki hil 'kup ki 'ce'd a'di mo dhali a'di ki ci maanjukuthu'd ki imancık a'di gwo mo

dhali imancik a'di gwo ki çiki uni ka waambuhany 'kwani mo be. <sup>20</sup> Dhali uni 'baar mo shwaki a'di mo dhali uni kapkunu mo. Dhali uni 'tu'dkina nura/ i'kume'd i'ce'dka su/ mo ki 'pisira/ maa kun 'ce'dkunu mo gun uri 'kup mo be. <sup>21</sup> Dhali uni gwansan kun shwakin mo tani ta 'kwaniŋ gwas alaapi mudhe'd mo mmoodhal up ka po/ mo dhali uci mo be.

*Yesus Ya ki Sho'k e 'Kupa Al Yi'de/ mo*

<sup>22</sup> Dhali yan'ko'd a'di ki ḥor imancik a'di gwo gwo mo mmose bwaa ḫur mo dhali iiyi ṭwa/a/ ki a'di mo mmo'citha/ gap gi 'bana kamu/ mo ki a'di di'd mmoodhala waambuhany 'kwani bway mo mmo/ ii bway pa mo. <sup>23</sup> Dhali yan'ko'd ki a'di dhalki'da waambuhany 'kwani 'pen mo tani a'di yaki bway 'kuwosha turga/ mo a'di 'de/ mo mmo'tho mo be. Ki mom'pimpili/ pu'dki'd mo tani a'di diki'd a'di 'de/ mmun mo. <sup>24</sup> Hila ḫur ka tente/ yan mo tani a'di si'da ḷatgin ka ris 'pena gap mo. A'di dorkina 'tham mo haali/ 'tham poshki'da po/ uni mo be. <sup>25</sup> Dhali ki mo ta mon'twash/e mo tani a'di pu'dki'd e uni mo mmoya ki sho'k e 'kup yi'de/ mo be. <sup>26</sup> Hili ki imancik a'di gwo parki a'di e mo mmoya ki sho'k e 'kup yi'de/ mo tani uni deekina is mo kagahara mo mmo/o gwo mo ki: A'di ta'da arum mo be. Dhali uni cuukin mo kagahara haali/ uni ḫo/ki is mo be. <sup>27</sup> Hili ki jahanne/ a'di ḥorki uni gwo mo mmo/o gwo mo ki: 'Bithi adu is mo ma. Aha/tana a'di mo be. Dhalku/ is ki ḫo/ mo ma.

<sup>28</sup> Dhala Buṭerus ki thok a'di gwo mo ki: Tapa, wa᠁ki/ /e ta a'di mo tani yuki aha/ mmoyaku/ i /e i'kuyi'de/ mo ma. <sup>29</sup> A'di ki o a'di gwo mo ki: Yayu/

mo ma. Wakan Buterus cuki mis 'pena kur mo dhali ya ki sho'k e 'kuyi'de/ mo dhali pu'da Yesus mo. <sup>30</sup> Hili ki a'di parki 'tham e mo tani a'di ko/ki is mo dhali telki mii 'pen mo mmociç yi'de/ mo. A'di gwoki'd mo ki: Tapa, wothi/ aha/ mo ma. <sup>31</sup> Dhala Yesus ki jahanne/ a'di jidhirki me'd piti mo dhali bu'th a'di mo mmo/o a'di gwo mo ki: Ayy wathi/ jin gwa'da mongam gwo is ki gwa'd mo. Atinta shina / e bwa 'kup kan mo? <sup>32</sup> Dhali ki uni ciçkin e bwam ma kur mo tani 'tham doshki'd mo be. <sup>33</sup> Dhali uni gwansan kun 'kon e bwam ma kur mo tani lunjki a'di mo mmo/o gwo mo ki: Ka jin gana/ /e ta Ya/ ma Arumgimis mo be.

*Yesus Waçki 'Kwani kun 'Bathan e Pa Jannisaarat mo*

<sup>34</sup> Dhali ki uni 'cithkina gap gi 'bana kamu/ mo tani uni pu'dkin mo e Bampa/ gi Pa Jannisaarat mo be. <sup>35</sup> Dhali ki 'kwani gi mo caan nyithki a'di mo tani uni hashki gwo e bampa/ 'baar mo kun 'kon ka kukul is mo dhali kala ris 'kwani kun 'bathan e a'di mo be. <sup>36</sup> Dhali uni ŋapki a'di mo mmo'taki ta a'di 'twaman burrinyem piti is ki me'd mo. Dhali aris uni gun taki a'di is ki me'd mo tani 'borkunu is mo be.

## 15

*GwonDhamo/jin Luču 'Peni 'Kwani Gwanyjaka/  
mo*

<sup>1</sup> Dhali yan'ko'd 'Kwani Parisiyiin dhali iman'kwar to pu'dkina Yesus mo 'peni Pa Urushaliim mo dhali o a'di gwo mo ki: <sup>2</sup> Atinta dhanja imancik /e gwo gwon dhamo/ jin luču 'peni 'kwani gwanyjaka/ mo? Haali/ uni 'koki 'thur

me'd buni ki yi'de/ ntwa/a/ ki uni 'koki shwa to mo. <sup>3</sup> A'di ki thoꝝ uni gwo mo ki: Dhali atinta si'da/ idhaňa um gwoňkan ma Arumgimis jin 'kwarkunu mo gom gway gi gwon dhamom bum jin luꝝ mo? <sup>4</sup> Haali/ Arumgimis kanki gwo mo ki: Taki cim dhali kwan mo, dhali, A'di jin midi o gwonthus apo/ com mo walla kum mo tani dhalki a'di ka jin gana/ iwu'd mo. <sup>5</sup> Hili um o gwo mo ki: Waꝝki/ wathin 'de/ midi tor com gwo mo walla kum gwo mo ki: Ki a'di jin mina /e gam 'peni aha/ mo tani cikunu Arumgimis mo tani a'di midi diki mii ta gi mo mmotak com mo. <sup>6</sup> Wakan gom gway gi gwon dhamom bum jin luꝝ mo tani um ki puu Gwo ma Arumgimis mo be. <sup>7</sup> Um gun tana he'k e ka he'k e mo. Din ma Ishaya ki o um gwo is mowa ki a'di o gwo mo ki:

<sup>8</sup> 'Kwani gwansan tak aha/ ki 'twam buni mo tani hili adum buni si'dasi'd 'peni aha/ mo be.

<sup>9</sup> Uni luňki aha/ ki pe'th mo be.

Gwoňkan gi 'twarj 'kwani ḥora uni me'd gwoň gana/ mo be.

### *To gi Shi/i Wathi/ Is mo*

<sup>10</sup> Dhali a'di ki yuꝝ 'kwani e a'di mo dhali o uni gwo mo ki: Ciki gwo mo ma dhali mish a'di 'ban mo. <sup>11</sup> A'di diki ta to jin yaki 'twa/ wathi/ jin midi shi/ a'di mo hili a'di jin piyi'd 'peni 'twa/ wathi/ mo tani to yansan a'di ishi/ki wathi/ is mo be. <sup>12</sup> Yan'ko'd imancik a'di gwo pu'dkini a'di mo dhali o a'di gwo mo ki: Dina /e ki mish 'Kwani Parisiyiin 'kokunu mo mmogol mo ki uni cikki gwo yansan mo 'taa? <sup>13</sup> Dhali a'di thoꝝki uni gwo mo mmo/o gwo mo ki: Aris to gun sinu 'baar mo ka

'dete/ 'dete/ jin din ma Ababam pem e momis ki si mo tani uni minu yu'd mo be. <sup>14</sup> Dhalki uni 'kon, uni 'cena mo ma. Uni ta uni gun tana ja'da/ ka ja'da/ mo kun toshki ta ashu/um bway mo be. Dhali wakki/ wathiny ja'da/ sus ceny ja'da/ mo tani uni su/ mini taki jis mo be. <sup>15</sup> Hila Buterus ki thok a'di gwo mo ki: Tori aman 'pemen gwom 'bi'th/e yansan mo ma. <sup>16</sup> Dhali a'di ki o uni gwo mo ki: A/ um si'da/'kon naskina/ kan mo mmomol gwo 'ban mo 'taa? <sup>17</sup> Kona um ki misha, ki to yin jin ya 'twa/ wathi/ mo mmoya bwa mo tani dhali wakan a'di ki pe moyi? <sup>18</sup> Hili to jin piyi'd mo 'peni 'twa/ wathi/ mo tani a'di yayi'd 'pena du mo dhali to yansan a'di ishi/ki wathi/ is mo be. <sup>19</sup> Haali/ 'pena du mo tani gwonthus kun kulumu mbwa mo pu'dkin mo mmo'kosha mee mo dhali mmota çal mo dhali mmomii miinyçal mo dhali mmokwal to mo dhali mmo/o gwonthus apo/ wathinj kamu/ mo dhali mmothutha thu'th 'pen mo be. <sup>20</sup> To gwansan uni ita to gun shi/i wathi/ is mo, hili mmoshwa to ki me'd kun 'konuki 'thur ki yi'de/ mo tani a'di diki shi/ wathi/ is mo be.

### *Moŋgam Gwo Is ma 'Bom gi Pan Kanaan mo*

<sup>21</sup> Dhali ka Yesus yaki'd mo 'peni mo yin mo tani a'di yaki'd mo e bampa/ gi Pan Sur mo dhali Pan Saydaa/ mo be. <sup>22</sup> Dhali hili a'bom gi Panj Kanaan 'peni bampa/ çaan mo tani pu'dki'd mo dhali cuu gwo mo ki: Miyyi mii apo/ aha/ mo ma, ayy Tapa, Ya/ ma Dawuu'd mo. 'Bwa/m pem bu'th ma ruma 'cesh kagahara mo. <sup>23</sup> Hili a'di diki thoka yim gwo mo. Dhali imancik a'di gwo pu'dkin mo dhali dot a'di gwo mo mmo/o gwo mo ki: Urka yim mo ma

haali/ ayim cuu'di bath ana n'ko'd mo be. <sup>24</sup> Dhali a'di ki thok gwo mo ki: Aha/ hashkunu mo jasi gom ka'bal gi gu'b ma Israyiil kun thinkunu e mo uni 'cena mo be. <sup>25</sup> Hila yim pu'dki'd mo mmoça'b ki jin 'kupa'dupuni bwambori a'di mo mmo/o gwo mo ki: Tapa, wothi/ aha/ mo ma. <sup>26</sup> Dhali a'di ki thok a'di gwo mo ki: A'di yisa ta mii jin ha me'd mo mmobu'th maanjkuthu'd 'peni uci mo dhali ta'k a'di ka 'ka mo. <sup>27</sup> Ayim thok a'di gwo mo ki: Nye, Tapa, hili, a'ka uni mini shwa kuluny maa kun ta'kkin mo 'pena tharabeesa gi tapam buni mo be. <sup>28</sup> Yan'ko'd Yesus ki thoka yim gwo mo ki: Ayy, a'bom, dhan moŋgam gwo is pini caaca mo. Dhalki a'di miinu mo gom /e mo me'd jin dina a'di /e e bwa mo. Dhali 'bwa/m piti waçkunu hila/ mo be.

### *Yesus Waçki 'Kwani ka Ris mo be*

<sup>29</sup> Dhala Yesus yaki'd 'peni mun mo dhali 'citha/ gap gi Al ma Jaliil mo be. Dhali a'di seki'd e moŋ'kuwosh mo dhali a'di çabki'da 'cesh mmun mo be. <sup>30</sup> Dhali awaambuhany 'kwani pu'dkini a'di mo mmosuski 'kwani e a'di mo, uni gun ta ŋwol mo dhali uni gun kutha is gunjikuru/ mo dhali uni gun tana ja'da/ mo dhali uni gun mol 'twa/ wal mo dhali kun tiya ka ris mo dhali uni ki 'thi uni mo e sho'k piti mo dhali a'di ki waç uni mo be. <sup>31</sup> Wakan awaambuhany 'kwani merkin mo be ki uni parki wathi/ e mo jin mol 'twa/ wal walki 'twa/ mo be, dhali uni gun kutha is gunjikuru/ mo 'borkunu is mo dhali uni gun ta ŋwol mo iikin ki sho'k mo dhali uni gun tana ja'da/ mo mishki mo mo dhali uni karkina Arumgimis gi 'kwani ma Israyiil ki ca mo be.

*'Kwani Alaapi Dojon kun Cikunu Tonte/ mo*

<sup>32</sup> Dhali yan'ko'd Yesus ki yük imancık a'di gwo e a'di mo dhali o uni gwo mo ki: Aha/ ƙoca e eya waambuhany 'kwani mo be. Haali/ uni 'kon nyakki aha/ ka cim kwara shwane/ mo dhali uni dar gi tonte/ mmoshwa mo. Dhali aha/ 'tena bwa mmohash uni bway pa mo ki te/ mo isi ciki/ haali/ uni mina buye/ i'thi mo mbway mo be. <sup>33</sup> Dhali imancık a'di gwo ki dot a'di gwo mo mmo/o gwo mo ki: 'Peni mana mmina ana gam tonte/ jin midi 'kosh jwa mo e bwam ma si'b mmahan mo mmociya waambuhany 'kwani kun caaca wakan mo? <sup>34</sup> Dhala Yesus ki o uni gwo mo ki: Um 'kona maanjukuthu'd ekata mo? Uni ki thok a'di gwo mo ki: Mpesuyi, dhali ushi to yi'de/ idaka/ mo be. <sup>35</sup> Dhali a'di ki ƙana waambuhany 'kwani gwo mo mmo'ko mo mmo'ko 'pena 'cesh mo be. <sup>36</sup> Dhali a'di ki bu'th maanjukuthu'di pesu/ mo dhali to yi'de/ mo dhali a'di ki 'bora 'bor bwa i is mo dhali a'di ki 'ce'd uni mo dhali ci uni ki imancık a'di gwo mo mmocika waambuhany 'kwani mo be. <sup>37</sup> Dhali ki uni 'baar mo shwakin mo dhali 'kokunu mo mmokap mo tani uni ki tul maanjukuthu'd is jin ta 'pisira/ jin 'ce'dkunu bwa mo mmo'tu'da nura/ pesu/ 'peni jin urkunu 'kup mo be. <sup>38</sup> Uni gwansan kun shwaki to mo tani tana alaapi dojon mo mmodhal up ka po/ mo dhali uci mo be. <sup>39</sup> Dhali a'di ki hasha waambuhany 'kwani mo dhali a'di cicki'd mo e bwam ma kur mo mmoya bampa/ gi Pa Majdal mo be.

## 16

*Mmo/o Bwa ki Par Jamas Mii E mo*

<sup>1</sup> Dhali 'Kwani Parisiyiin dhali 'Kwani Sadukiyiin pu'dkin mo dhali pal a'di ki gwo mo. Uni dočki a'di mo mmotor uni jamas mii 'peni momis mo be. <sup>2</sup> A'di ki thočk uni gwo mo ki: Ki mo ta mom'pimpili/ mo tani um ki o gwo mo ki: A'di midi ta a'di mompiriny mo shwane/ haali/ momis 'pera'per mo be. <sup>3</sup> Dhali ka'thamo/ tani a'di midi ta mon'thama punthar mo shwane/ mo haali/ momis 'pera'per mo dhali wuma wuma mo. Um mishina jo'da yir mii gi momis mo tani hili atinta 'kona um ki misha jo'd jamas mii ma tee mo? <sup>4</sup> Um 'kwani gun tana nyakum yil kun ta thus ki thus kan mo dhali imanmii miinyçal mo tani ḥapki jamas mii mo janta? bahili jamas mii minu ci um mo yisa hili isi ciki/ jamas mii ma Yuunaan mo. Wakan a'di ki dhal uni mo dhali ya mo be.

### *Acumat gi 'Kwani Parisiyiin mo*

<sup>5</sup> Ki imancič a'di gwo merkin e 'bana gapa kamu/ mo tani uni ḥaki maanjkuthu'd mo mmo'koki guyi jaŋ kamu/ mo be. <sup>6</sup> Yesus ki o uni gwo mo ki: Hili ki 'bore/ mo ma dhali jiyi acumat gi 'Kwani Parisiyiin mo dhali 'Kwani Sadukiyiin mo ma. <sup>7</sup> Dhali uni su'kkin ki gwo mo, uni 'cena çem buni mo mmo/o gwo mo ki: Ana 'konaki guyu/ maa mo be. <sup>8</sup> Hila Yesus mishki gwo yansan mo dhali o uni gwo mo ki: Ayy um 'kwani kun gwa'da mongam gwo is ki gwa'd mo. Atinta suka um ki gwo çem bum kan mo? mmodara um ki tonte/ mo. <sup>9</sup> 'Kona um ki nyith mo 'taa? 'Kona um ki ka gwo e gom maanjkuthu'd kun shwana 'kwani alaapi mudhe'd mo dhali anura/ ekata i'tu'dkina um mo mmotul is mo? <sup>10</sup> Walla maanjkuthu'di pesu/ kun shwana

'kwani alaapi doŋon mo dhali anura/ ekatinta i'tu'dkina um mmotul is mo? <sup>11</sup> Atinta 'kona um ki nyi<sub>th</sub> mii mo ki aha/ dinaki o gwo mo gom tonṭe/ mo? Jiyi acumat̄ gi 'Kwani Parisiyiin mo dhali 'Kwani Sadukiyiin mo ma. <sup>12</sup> Dhali yan'ko'd uni mishki gwo 'ban mo ki a'di diki ṭor uni gwo mo mmojiya cumat̄ gi tonṭe/ mo, hili gom gwont̄or gi 'Kwani Parisiyiin mo dhali 'Kwani Sadukiyiin mo be.

*Buterus A'di Torki Mii eya Tente/goma Yesus mo*

<sup>13</sup> Dhali ka Yesus pu'dki'd e bampa/ gi Panj Kaysariyya gi Pam Pilibbi mo tani a'di ki dot̄ imancik a'di gwo gwo mo ki: Ki 'kwani oki Ya/ gi 'Kwani jana a'dan mo? <sup>14</sup> Dhali uni ki thok a'di gwo mo ki: Kun tiya on ka Yohaan jin ta'da manmiiya mii ki yi'de/ mo. Dhali kun tiya on ki Iliyya mo. Dhali kun tiya on ka Irmiya mo walla jan 'de/ 'peni imanci gwo ma Arumgimis kadhamo/ mo be. <sup>15</sup> Dhali a'di ki o uni gwo mo ki: Hili ba um on ki aha/ tana aja mo? <sup>16</sup> Simaan Buterus thok a'di gwo mo ki: /E tana Krishhos mo, Ya/ ma Arumgimis jin di'd ki e mo be. <sup>17</sup> Dhala Yesus ki thok a'di gwo mo ki: Mom'bor mii gom /e mo, Simaan jin ta ya/ ma Yuuna mo. Haali/ bunjwar is mo dhala bas mo tani uni 'koki ṭor a'di yan eya tente/ e /e mo, hili, Ababam pem a'di jin di'd e momis mo be. <sup>18</sup> Dhali aha/ ṭora /e gwo mo, /e jin tana Buterus mo, dhali eya po/ wosh yan mo tani aha/ mina nyaŋa ɺaniisam pem mo, dhali mom'bi'th gi mowu mo tani midi diki pi a'di jipi/ mo be. <sup>19</sup> Aha/ mina ci /e amuptha/ gi Bampa/ gi Momis mo, dhali ma to yin jin mina /e nnon mo e mony'cesh mo tani

a'di minu non mo e momis mo dhali ma to yin jin mina /e ndhal me'd e mony'cesh mo tani a'di minu dhal me'd e momis mo be. <sup>20</sup> Yan'ko'd a'di ki kan imancik a'di gwo gwo mo ki 'bi'th mo, mmodiki tor wathin tal 'deñ kamu/ gwo mo ki a'di ta'da Kristhos mo be.

### *Yesus Torki Wum Piti Itwa/a/ mo*

<sup>21</sup> Peni mo çaan mo tani Yesus telki mii 'pen mo mmotor imancik a'di gwo gwo mo ki a'di midi mii ya mo e Pa Urushaliim mo dhali 'kosh is ka nyor ki to ka ris mo 'peni 'kwani gwanyjaka/ mo dhali 'peni igasiis mo dhali iman'kwar to mo, dhali a'di minu 'kosh jwa mo, dhali ka cim kwara mo tani a'di minu 'de'k mo be. <sup>22</sup> Dhala Buterus ki bu'th a'di mo dhali tel mii 'pen mo mmokucur a'di ki gwo mo mmo/o gwo mo ki: Arumgimis diki tosh kan mo, Tapa. Mii yansan midi diki pu'di /e ki sule/ sule/ mo be. <sup>23</sup> Hili a'di ki tu'k mo dhali owa Buterus gwo mo ki: Setaan, yaku/ i'ko'di aha/ mo ma. /E noni aha/ 'kup mo. Haali/ /e diki di ki 'ban ma Arumgimis mo, hili /e din ka 'ban gi 'kwani mo be.

<sup>24</sup> Yan'ko'd Yesus ki tor imancik a'di gwo gwo mo ki: Wakki/ wathinj kamu/ midi yayu/ ibath aha/ nsho'k mo tani dhalki a'di non is piti mo ma dhali 'de'k cwany'cithan dhul piti mo dhali bath aha/ nsho'k mo. <sup>25</sup> Haali/ a'diyin jin midi woth mondiki/em piti mo tani midi this a'di e mo dhali a'diyin jin midi this mondiki/em piti e mo gom gway pem mo tani midi gam a'di mo be. <sup>26</sup> Haali/ mii jin nyo/a wathi/ mo wakata si'da/ wakki/ a'di gama'da ris to 'baar mo e mony'cesh yan mo dhali this mondiki/em piti e mo? Walla wathi/ midi wan mondiki/em piti 'ba/ ka tinta mo? <sup>27</sup> Haali/ Ya/ gi

'Kwani midi pu'du/ mo nyakki iman'doyu gwom piti ilu/ mo ki monyca gi com mo dhali yan'ko'd a'di midi ci aris 'kwani 'baar mo ka 'dete/ 'dete/ to jin wana e ki mii kun miikina uni mo be. <sup>28</sup> Ka jin gana/ aha/ ona um gwo mo ki 'kwanin tiya 'kon kun doshkini mahan mo shwane/ mo tani uni mini 'koki nyok wu ntwa/a/ mo ki uni 'koki par Ya/ gi 'Kwani e mo mmopu'du/ mo nyakki Bampam piti mo be.

## 17

### *Mmowarkin ma Yesus Jamas Piti mo*

<sup>1</sup> Dhali 'ko'da cim pe'de/ mo tani Yesus ki susa Buterus nyakki a'di mo dhala Yakuub dhala Yohaan jin ta'da kam piti mo, dhali sus uni bway 'kuwosh jin turatur uni 'cena mo. <sup>2</sup> Dhali a'di ki war is piti mbwambori uni mo, dhali bwam/ em piti 'twakki mo mo me'da tente/ mo dhali burrinyem piti warki'd ki bany bany me'd moŋkush mo be. <sup>3</sup> Dhali hili aMusa dhali Iliyya piki uni i is mo mmotora/ ṭor nyakki a'di mo be. <sup>4</sup> Dhala Buterus ki owa Yesus gwo mo ki: Tapa a'di 'boro'd gom aman mmo'kona aman mmahan mo. Wakki/ /e ona bwa mo tani aha/ mina nyan ciŋŋa/ ikwara mmahan mo, jan tal 'de/gom/e mo dhali jan kamu/ goma Musa mo dhali jan kamu/ gom Iliyya mo be. <sup>5</sup> Ki a'di di'd mmo/o gwo mo tani hili arak jin kushu mo mo 'kamki uni is mo dhali 'twa/ 'pena rak yan mo tani o gwo mo ki: Yansan ta Ya/m pem jin enka/ mo, a'di jin 'borka/ bwa i is mo. Ciki a'di gwo mo ma. <sup>6</sup> Ki imancik a'di gwo cikki gwo yan mo tani uni ṭa'kki bwam/em buni a'cesh mo dhali uni 'tu'dkunu mo ki moŋko/ is mo be. <sup>7</sup> Hila Yesus

pu'dki'd mo dhali ta uni is ki me'd mo mmo/o gwo mo ki: Cuyi mis mo ma. Dhalku/ is ki Ɂo/ mo ma.  
<sup>8</sup> Dhali ki uni 'de'kki em buni ki mis mo tani uni 'koki par wathinj kamu/ e mo, hili jasa Yesus a'di 'de/ mo be.

<sup>9</sup> Dhali me'd jin pu'dkina uni ka 'cesh 'peni 'ku-wosh mo tani Yesus Ɂan uni gwo mo ki: Dhalku/ wathin Ɂal 'deŋ kamu/ ki Ɂor tonyjan yan mo ntagi Ya/ gi 'Kwani minu 'de'k mo 'peni mowu mo be.  
<sup>10</sup> Dhali imancik a'di gwo doč a'di gwo mo ki: Atinta i/ona iman'kwar to gwo mo ki Iliyya midi mii pu'du/ ntwa/a/ mo? <sup>11</sup> A'di ki thok uni gwo mo ki: Iliyya pu'dki'd mo dhali a'di midi thoson aris to 'baar mo be. <sup>12</sup> Hili aha/ Ɂora um gwo mo ki Iliyya a'di pu'dki'd hila/ mo dhali uni 'koki mish a'di mo, hili uni ki mii a'diyin jin 'bor uni bwa mo. Wakan si'da/ Ya/ gi 'Kwani mina isi 'kosh ka nyor mo e me'd buni mo be. <sup>13</sup> Dhali yan'ko'd imancik a'di gwo mishki gwo 'ban mo ki a'di Ɂorki uni gwo mo goma Yohaan jin ta'da manmiiya mii ki yi'de/ mo be.

### *Yesus Wački'da 'Cijin Bu'thkin ma Rum Thus jin Nyo/o'd mo*

<sup>14</sup> Dhali ki uni pu'dkin eya waambuhany 'kwani mo tani wathinj kamu/ pu'dki'd e a'di mo dhali Ɂa'bki jinj 'kupa'dupuni bwambori a'di mo dhali o gwo mo ki: <sup>15</sup> Tapa, miiyi mii apo/ ya/m pem mo ma. Haali/ a'di wu gampang mo dhali a'di 'kosha is ka nyor kagahara mo. Haali/ me'd ka ris a'di bitki'd e bwam o'd mo dhali me'd ka ris a'di bitki'd e bwam yi'de/ mo be. <sup>16</sup> Dhali aha/ suskina a'di e imancik /e gwo mo tani dhali uni 'koki mish a'di wač mo be. <sup>17</sup> Dhala Yesus ki thok uni gwo

mo ki: Ayy, um 'kwani kun aṭha mongam gwo is ki aṭh kan mo dhali kun çaca ii ki çaca mo eya nya<sup>kum</sup> yil bum mo, aha/ mina di i um ki mo gi wakata mo? Dhali ki mo gi wakata imiga/ i'dim 'kup e um mo sa/? Susi a'di mmahan i aha/ mo ma.

<sup>18</sup> Dhala Yesus ki kucur a'di ki gwo mo dhali aruma 'cesh pu'dki'd ka pije/ 'peni a'di mo dhali a'ci a'di wa<sup>ç</sup>kunu ki jahanne/ mo be. <sup>19</sup> Dhali yan'ko'd imancik a'di gwo pu'dkina Yesus mo uni 'cena mo dhali o a'di gwo mo ki: Atinta 'kona aman ki mish a'di ur ka pije/ mo sa/? <sup>20</sup> A'di ki thok uni gwo mo ki: Haali/ mongam gwo is bum gwa'dagwa'd mo. Haali/ ka jin gana/ aha/ ona um gwo mo ki, wakki/ um mini ta gi mongam gwo is me'd emen to jin miinuwa 'tash mo tani um mini o wosha turga/ yansan gwo mo ki: Dhalki a'di joçu/ mo 'peni mo yansan is 'ko'di mun mo ma tani dhali a'di minu joç mo dhali tonj kamu/ yisa di'da jin minu mol mii gom um mo be. <sup>21</sup> Hili mii yansan midi diki piyu/ 'kup ka pije/ mo hili isi ciki/ ki mon'tho mo dhali ki monga/ to mo be.

### *Dok/e aYesus Torki Mowum Piti Itwa/a/ mo*

<sup>22</sup> Me'd jin tulkina uni is mo mmontal 'de/ mo e Pany Jaliil mo tani Yesus ki o uni gwo mo ki: Ya/ gi 'Kwani minu ci 'kwanin thusi me'd mo be. <sup>23</sup> Dhali uni mini 'kosh a'di jwa mo dhali a'di minu 'de'k ka cim kwara mo. Dhali uni butha 'tham kagahara mo be.

### *Mmoçiya Guurush gom Gu'b gi Mondhelelad-helel mo*

<sup>24</sup> Dhali ki uni pu'dkin e Paŋ Kapranahuum mo tani imanter tulpa/ gom gu'b gi mondhelelad-helel mo pu'dkina Buṭerūs mo dhali o a'di gwo mo ki: Din ma manṭor gwom bum ki ḡiya thulpa/ mo 'taa? <sup>25</sup> A'di ki o a'di gwo mo ki: Nye. Dhali ki a'di pu'dki bway pa mo tani Yesus ki ṭora ṭor ki a'di ntwa/a/ mo mmo/o gwo mo ki: Atinta kuluma /e mbwa mo, Simaan? 'Peni mana ikal ma malik kun 'kon e mony'cesha thulpa/ mo dhali to gun wothu/ 'kup mo? 'Peni iya/m buni mo 'taa? Walla 'peni kun tiya mo? <sup>26</sup> Dhali a'di o a'di gwo mo ki: 'Peni kun tiya mo tani Yesus ki o a'di gwo mo ki: Wakan iya/ 'kon ki 'kus mo. <sup>27</sup> Bahili mmomina ana 'koki kol uni mo tani yaku/ mo e yi'de/ mo ma dhali bita bi'c mo dhali bu'th wa'c jin yayi'di ṭwa/a/ ka pije/ mo dhali ki /e mini ḳa'd a'di 'twa/ mo tani /e mini gama guurush e 'twām piti mo. Buthi ḣaan mo dhali ḥi a'di ki uni mo gom aha/ mo dhali gom is pini mo.

## 18

### *Kaja A'di Cade?*

<sup>1</sup> Dhali ka tee ḣaan mo tani imancik a'di gwo pu'dkina Yesus mo dhali o a'di gwo mo ki: Kaja a'di ica'd mo e Bampa/ gi Momis mo? <sup>2</sup> Dhali a'di ki yuka 'ci mo dhali kar a'di e bwaman uni mo <sup>3</sup> dhali o gwo mo ki: Ka jin̄ gana/ aha/ ona um gwo mo ki isi ciki/ wakki/ um 'koki tu'k mo dhali war ki uci mo tani um mini 'koki se Bampa/ gi Momis ki sule/ mo be. <sup>4</sup> A'diyin jin̄ kar is piti ki gwa'd mo mmowa e ka 'ci yansan mo tani a'di icaaca mo e Bampa/ gi Momis mo be.

<sup>5</sup> A'diyin jin midi budha 'ci gi wakansan ki gway pem mo tani a'di buthi aha/ mo be. <sup>6</sup> Hili a'diyin jin midi rak̄ jan ṭal 'de/ 'peni uni gwansan kun gwa'dan kun gam gwo is e aha/ mo mmomii miinthus mo tani a'di midi 'taki 'bor mo gom a'di ka dhan wosha caaga/ minu 'taki dek̄ a'di e 'bam piti mo dhali bit̄ a'di mo e kulkun yi'de/ mo be.

### *Mompal gom Miinthus mo*

<sup>7</sup> Wayyi e 'kwaniny'cesh mo gom mompal gi miinthus mo. Haali/ a'di ta mii jin midi ta mii mo ki mompal mini pu'du/ mo. Dhali hili, wayyi e wathi/, a'di jin pu'dkina mompal 'peni cine/ mo be. <sup>8</sup> Dhali wak̄ki/ me'd pini walla sho'k pini rak̄/e mo mmomii miinthus mo tani 'cithi/ uni mo ma dhali taki uni asho 'peni /e mo haali/ a'di 'boro'd gom /e mo mmociç mondiki/e ki ɻul mo walla ki ɻwol mo jin minu 'koki bit̄ /e ki me'd su/ mo walla ki sho'k su/ mo e mo ma al o'd ki sule/ mo be. <sup>9</sup> Dhali wak̄ki/ em pini rak̄ /e mo mmomii miinthus mo tani buki a'di mo ma dhali bit̄ a'di ka piye/ 'peni /e mo. A'di 'boro'd gom /e mo mmociç mondiki/e ki en ṭal 'de/ mo jin minu 'koki bit̄ /e ki e su/ mo e mo ma al o'd jin kakacakaka'c mo be.

### *Gwom Bi'th/e gom Ka'bal jin Thisi E mo*

<sup>10</sup> Hil ki 'bore/ ki um mini 'koki wa᷑ jan ṭal 'den kamu/ 'peni uni gwansan kun gwa'dan mo haali/ aha/ tora /e gwo mo ki e momis mo tani iman'doyu gwom buni isa yempa/ uni hilki bwam/ e ma Ababam pem jin di'd e momis mo be. <sup>11</sup> Haali/ Ya/ gi 'Kwani pu'dki'd mo mmowoth̄ uni gun thiskunu e mo be. <sup>12</sup> Um kulumi gwo mbwa jin wakata mo? Wak̄ki/ wathi/ ta gi ka'bal iss 'kwanimpa

mmudhe'd mo dhali jan tal 'deñ kamu/ 'peni uni thiski e mo tani mina a'di diki dhal uni iss 'kwan-impa mmudhe'd athka 'de/ mo e mon'kuwosh mo dhali ya mo mmonjap jin tal 'de/ jin thiski e mo 'taa? <sup>13</sup> Dhali wakki/ a'di ki gam a'di mo tani ka jin gana/ aha/ tora /e gwo mo ki a'di 'kunya bwa ki 'kuny kagahara mo gom a'di jin 'dap uni 'twa/ ka iss 'kwanimpa mmudhe'd athka 'de/ mo kun 'koki this e mo ki sule/ mo. <sup>14</sup> Wakan a'di si'da/ diki ta bwa ma Ababam pem jin di'd e momis mo ki jan tal 'deñ kamu/ 'peni uni gwansan kun gwa'dan mo tani minu 'taki 'koki 'ce'd sho'k mo be.

### *Akam gi Miiki Miinthus mo*

<sup>15</sup> Wakka kam pini mii miinthus apo/ /e mo tani yaku/ mo dhali tor a'di miim piti mo ce um su/ mo, /e dhali a'di 'de/ mo. Wakki/ a'di cik /e gwo mo tani /e warana kan mo be. <sup>16</sup> Hili wakki/ a'di diki cik gwo mo tani susi jan tal 'deñ kamu/ mo walla su/ mo nyakki /e mo ki aris gwo 'baar mo ka 'dete/ 'dete/ kun onu mo minu 'da'b 'pen mo mmota du'd gwo gi 'twanj 'kwani su/ mo walla kwara mo be. <sup>17</sup> Wakki/ a'di ki ush gwo cik 'peni uni mo tani tori a'di ki 'kwaniñ kaniisa mo, dhali wakki/ a'di si'da/ ki ush gwo gi 'kwaniñ kaniisa cik mo tani dhalki a'di wara'd gom /e ki wathi/ jin diki ta Wathi/ Yahuuda/ mo dhali ka mantera thulpa/ mo be. <sup>18</sup> Ka jin gana/ aha/ tora um gwo mo ki ma to yin jin mina umi nnon mo e mony'cesh yansan mo tani a'di minu non mo e momis mo dhali ma to yin jin mina umi dhal me'd mo e mony'cesh mo tani a'di minu dhal me'd mo e momis mo be. <sup>19</sup> Dok/ e aha/ ona um gwo mo ki wakki/ 'kwani 'koni su/ mbwam um kun gami gwo me'd mo e mony'cesh

mo gom ma to yin jin mina uni doṭ mo tani a'di  
 minu mii gom uni ki gway ma Ababam pem jin  
 di'd e momis mo be. <sup>20</sup> Haali/ wakki/ 'kwani 'koni  
 su/ mo walla kwara mo kun tuli is mo e gway pem  
 mo tani aha/ dina e bwam uni mo be.

*Gwom 'Bi'th/e gom Çiŋkina/jin Diki Dhala Kamu/  
 Amurem Piti 'Pen mo*

<sup>21</sup> Dhali yan'ko'd Buterus pu'dki'd mo dhali o a'di  
 gwo mo ki: Tapa, me'd ekata min ma kam pem  
 mmii miinthus apo/ aha/ mo dhali aha/ ki dhal  
 a'di miinthus piti 'pen mo? a/me'd kun 'koni saba  
 kana? <sup>22</sup> Yesus ki thok a'di gwo mo ki: Aha/ dinaki  
 o /e gwo mo ki jasi me'di saba mo, hili me'd saba/  
 iin pi saba mo.

<sup>23</sup> Wakan Bampa/ gi Momis minu kar ka par 'ban  
 ka malik jin thosoni gwo nyakki çiŋkinam piti mo  
 gom to gun deju e mo. <sup>24</sup> Ki a'di telki mii 'pen  
 mo mmoden a'di e mo tani jan kamu/ suskunu  
 mo e a'di mo jin din ma murem piti m'ba/ mo ki  
 dhan\* kuluny 'dolkon alaapi 'kume'd mo. <sup>25</sup> Dhali  
 ki a'di diki mish mmoçi a'di to mo tani tapam piti  
 kanki gwo mo ki a'di minu yol mo nyakki ashim piti  
 mo dhali ki uçim piti ilu/ mo dhali ka ris to 'baar  
 mo kun tana a'di mo tani, dhali mii jin din ma  
 mure/ a'di m'ba/ mo tani minu ci mo be. <sup>26</sup> Wakan  
 çiŋkina/ a'di bitki'd ki jinj 'kupa'dupuni sho'k piti  
 mo mmowoth gwo is gom a'di mo mmo/o gwo  
 mo ki: Tapa, 'kuçi bwa gom aha/ mo ma dhali  
 aha/ mina ci /e aris to 'baar mo be. <sup>27</sup> Dhali gom  
 miiny çiŋkina/ jin miikina a'di mo gom a'di mo

---

\* **18:24** Dhan kuluny 'dolkon 'de/ wana e ka jineeh iss 'kwanimpa  
 ka iss 'de/ atha iss 'de/ apo/ mo.

tani tapa gi ćin̄kina/ ki 'cuk̄ a'di 'ba/ mo dhali dhal a'di amurem piti 'pen mo be. <sup>28</sup> Hili eny ćin̄kinan 'de/ yan mo tani me'd jin yakina a'di ka pije/ mo tani a'di gamki 'kup ki ćin̄kinam pitin̄ kamu/ mo a'di jin din ma mure/ a'di m'ba/ mo ka riyaal iss 'kwanimpa ikwara mo. Dhali a'di ki jigit a'di 'ba/ ki me'd mo dhali o gwo mo ki: Ҫiyaa/ to jin din ma mure/ /e m'ba/ mo ma. <sup>29</sup> Wakan agarr piti jin nyaka a'di atu'c mii mo tani bitki'da 'cesh mo dhali woṭh a'di gwo is mo mmo/o gwo mo ki: 'Kuci bwa gom aha/ mo ma dhali aha/ mina ci/e amurem pini mo be. <sup>30</sup> A'di ushu'd mo dhali ya mo dhali kar a'di eya sijin mo ntagi a'di midi 'taki ҫiya mure/ mo be. <sup>31</sup> Ki imannyaka ṫu'c mii ki a'di, ki uni parki a'di jin bu'thki embul mo mo tani uni butha 'tham kagahara mo dhali uni ki ii mo dhali ci gwo e tapam buni mo goma ris to gwansan kun bu'thki embul mo mo be. <sup>32</sup> Dhali yan'ko'd tapam piti ki dot a'di gwo mo dhali o a'di gwo mo ki: /E ta ćin̄kina/ jin ta thus ki thus mo. Aha/ dhalkina / e arisa murem pini 'peni 'baar mo haali/ /e wuki aha/ jwa i is mo be. <sup>33</sup> Dhali /e mini 'taki diki ta gi momiimii apo/ amannyaka ṫu'c pini mii mo me'd jin miikika/ mii apo/ /e mo? <sup>34</sup> Dhali ka nyor mo tani tapam piti a'di ki ci a'di ki imanjiya sijin mo ntagi a'di midi 'taki ci amurem piti 'baar mo be. <sup>35</sup> Wakan si'da/ Ababam pem jin di'd e momis mo midi mii kan goma ris umi 'baar mo ka 'dete/ 'dete/ mo wakki/ um 'koki dhal ikam bum amure/ miinthus buni 'pen 'pena dum bum gana/ mo be.

*Yesus Torki Gwo gom Mo jin Dhaluwa Dhal 'Pen mo*

<sup>1</sup> Dhali ka Yesus 'baarki'da ris gwo gwansan mo mmo/o mo tani a'di yaki'd mo 'peni Pany Jaliil mo dhali ciç mo e Bampa/ Yahuudiyya mo e bwampo/ Yi'deñ Kumma/ Uurdun mo be. <sup>2</sup> Dhali adhana waambuhany 'kwani caaca bathki a'di nsho'k mo dhali a'di ki waç uni mo be. <sup>3</sup> Dhali 'Kwani Parisiyiin pu'dkini a'di mo dhali pal a'di ki gwo mo mmo/o gwo mo ki: A'di ta mii jin dhala gwoŋkan bway mo mmomina wathi/ thoson gwo mo mmodhal ashim piti 'pen mo goma ris miin tiya kun tocon mo 'taa? <sup>4</sup> A'di ki thok gwo mo ki: 'Kona um ki deñ gwo e mo ki a'di jin ukki uni 'peni ka mun'kup mo ukki uni mo mmota wathin gwath mo dhali wathim 'bomi mo 'taa? <sup>5</sup> Dhali a'di ki o gwo mo ki: Haali/ gom 'kup mii gi wakan mo tani wathi/ midi mii dhal com 'pen mo dhali kum 'pen mo dhali gam is me'd ki ashim piti mo dhali uni su/ tala buŋwar isa ṭal 'de/ mo be. <sup>6</sup> Wakan uni dok/e 'koni su/ dok/e yisa. Hili uni ṭal 'de/ mo. Haali/ gwo gi wakan mo tani a'di jin gam ma Arumgimis is mo mmota isa 'de/ mo tani dhalku/ ki dhal wathin kamu/bway mo mmokwa/ uni bwa mo. <sup>7</sup> Dhali uni ki thok a'di gwo mo ki: Ba katinta ikan ma Musa gwo mo ki wathin ṭal 'de/ midi thosona warka/ jin dhaluwa dhal 'pen mo mmodhala yim 'pen mo? <sup>8</sup> Dhali a'di ki thok uni gwo mo ki: Haali/ adum bum kun 'bitha'bi'th mo tani aMusa dhalki um bway mo ba/ mmodhal up bum 'pen mo, hili 'peni ka mun'kup mo tani a'di yisa wakana. <sup>9</sup> Dhali aha/ ona um gwo mo ki: A'diyin jin midi dhal ashim piti 'pen mo gom ma to gunn kun tocon mo dhali

mash jaŋ kamu/ mo tani a'di miiki miinyçal mo be.  
 Mo ma dhal 'pen midi diki mii di mo gom ma to  
 gunn kun ṭocon mo, hili isi ciki/ mo wałka 'bom mii  
 miinyçal ki wathinj kamu/ mo be. Dhali a'diyin jin  
 midi masha 'bom jin dhal ma kathim piti 'pen mo  
 tani a'di miiki miinyçal mo.

<sup>10</sup> Dhali imancik a'di gwo o a'di gwo mo ki:  
 Wakki/ wakan gom wathinj gwath mo gom gwo  
 gi ash mo tani mane shi/ miim 'boro'd jin minu  
 mash mo? <sup>11</sup> Hili a'di ki o uni gwo mo ki: Aris  
 'kwani 'baar mo yisa mini bu'th gwo yansan mo  
 yisa, hili jasi uni gwansan kun çikunu a'di mo be.  
<sup>12</sup> Haali/ 'kwanin tiya 'kon ki mantil wakan mo  
 'peni mo jin dhodhu uni mo dhali 'kwanin tiya  
 'kon kun ta mantil 'peni mantil kun miina 'kwani  
 uni mo dhali 'kwanin tiya 'kon kun mii is buni ki  
 mantil mo uni 'cena mo gom gway gi Bampa/ gi  
 Momis mo. A'di jin mishi gwo yansan bu'th mo  
 tani dhalki a'di bu'th a'di mo ma.

### *Yesus 'Borki Uṣhi Uçin Gwa'dga/ Mii mo*

<sup>13</sup> Dhali yan'ko'd 'kwani 'kon mmokali uçi i a'di  
 mo ki a'di midi kar me'd piti apo/ uni mo dhali 'tho  
 mo. Dhali imancik a'di gwo uni ķucurki 'kwani ki  
 gwo mo be. <sup>14</sup> Hila Yesus ki o gwo mo ki: Dhalki uçi  
 iiyini aha/ mo ma. Dhalki uni ki non mo haali/ e  
 Bampa/ gi Momis mo tani a'di ta'd gi uni gi wakan  
 mo be. <sup>15</sup> Dhali a'di ki kar me'd piti apo/ uni mo  
 dhali ya mo be.

### *Wathin Dhuru'c jin Ta Pa ki Pa mo*

<sup>16</sup> Dhali hili, jan 'de/ pu'dki'di a'di mo mmo/o  
 gwo mo ki: Mantor gwo, tom 'boro'd jin migi/ mii  
 mii mo ta'da ta mo? mmogam mondiki/e ki sule/

sule/ ya ye 'ba/ mo. <sup>17</sup> Dhali a'di ki thok a'di gwo mo ki: Atinta dota /e aha/ gwo mo gom a'di jin 'boro'd mo? Jan tal 'deŋ kamu/ di'd jin 'boro'd mo. Wakki/ /e mini 'taki ciç mondiki/e mo tani dhuyi gwoŋkan kun 'kwarkunu mo ma. <sup>18</sup> Dhali a'di ki o a'di gwo mo ki: Jana? Dhala Yesus ki thok a'di gwo mo ki: / E mini mii dhalka 'kosh ki mii 'kosh mo. /E mini mii dhalki çal ki mii mii mo. Dhali /e mini mii dhalku/ki mii kwal to mo. Dhali/e mini mii dhalku/ki ak wathinj kamu/ gwo i is mo. <sup>19</sup> Taŋi cim dhali kwan mo dhali / e mini ena mannyak ca'b pini me'd is piniŋ gana/ mo be. <sup>20</sup> Dhali dhuru'c wathi/ki thok a'di gwo mo ki: Aris to gwansi 'baar mo tani miikika/ mo. Dhali to jin wakata i/athka/ mo? <sup>21</sup> Yesus ki thok a'di gwo mo ki: Wakki/ /e mini 'taki ta wathim 'borgaŋ gana/ mo tani yaku/ mo dhali yola ris to kun tana /e mo, dhali ciki uni ki 'kwani kun hatha'ko'd mo, dhali /e mini gam to kun ish kumma/ mo e momis mo. Dhali yayu/ mo mmobath aha/ nsho'k mo. <sup>22</sup> Ki wathin dhuru'c cikki gwo yansan mo tani a'di yaki'd mo ki bwa jin ditadiŋ mo, haali/ a'di ta wathi/jin isha to ka entus mo be.

<sup>23</sup> Dhala Yesus ki o imancik a'di gwo gwo mo ki: Ka jin gana/ aha/ ona um gwo mo ki: A'di diṭa mii ki diṭ mo gom wathi/ jin ta pa ki pa mo mmociç Bampa/ gi Momis mo be. <sup>24</sup> Dok/e aha/ tora um gwo mo ki: A'di 'disha mii ki 'dish mo gom kalman mo mmoya ki solol e jisa 'dipira/ mo mmodhal wathimpa e i is mo, a'di jin ta pa ki pa mo mmociç Bampa/ ma Arumgimis mo be. <sup>25</sup> Ki imancik a'di gwo cikki gwo yansan mo tani uni 'kokin mo mmomer kagahara mo mmo/o gwo mo

ki: Wakki/ a'di wakan mo tani ba ija a'di mminu iwoth mo? <sup>26</sup> Hila Yesus ki hil uni mo dhali o uni gwo mo ki: Ki miin 'kwani mo tani a'di molu mii mo, hili ka Arumgimis mo tani aris to 'baar mo mishu mii mo be. <sup>27</sup> Dhali yan'ko'd Buterus ki thok a'di gwo mo ki: Hili, aman dhalkina aris to 'peni 'baar mo dhali bath / e nsho'k mo dhali aman mina ta ga ta mo? <sup>28</sup> Yesus ki thok uni gwo mo ki: Ka jin̄ gana/ aha/ tora um gwo mo ki e momis jin this dhali e mony'cesh jin this mo tani ki Ya/ gi 'Kwani midi ç'a'ba po/ kursi gi monycam piti mo tani um kun bathi aha/ nsho'k mo tani mini 'ko si'da/ apowa kursi ma malik kun 'koni 'kume'd i'ce'dka su/ mo mmodwall uçi ma Israyiil gwo mo, uni kun 'kon ma waki 'kume'd i'ce'dka su/ mo be. <sup>29</sup> Dhali aris 'kwani 'baar mo ka 'dete/ 'dete/ uni gun dhalki gu'b buni 'pen mo walla ikam buni mo walla i'bawah buni mo walla icom mo walla ikum mo walla ucim buni mo walla mo mo gom gway pem mo tani uni mini bu'th to ki me'd iss 'kwanimpa mmudhe'd mo dhali ta gi mal gi moŋ'koki/e ki sule/ sule/ ya ye 'ba/ mo. <sup>30</sup> Hili 'kwani ka ris kun 'koni twa/a/ mo tani uni minu dhu n'ko'd mo be dhali uni gun 'koni 'ko'd mo tani minu dhu ntwa/a/ mo be.

## 20

### *Imanmiiya Tu'c e Bwam Monsinu mo*

<sup>1</sup> Haali/ Bampa/ gi Momis a'di wana e ki wathi/ jin cila gu'b mo, a'di jin ya'd mo mon'thamo/ ka'tum mo mmonjap imanmiiya tu'c mo gom bwa-man monsinum piti mo be. <sup>2</sup> 'Ko'di gwo jin gama a'di me'd nyakki imanmiiya tu'c piti mo gom nasa

guurush ka tee mo tani a'di ki hash uni e bwaman monsinum piti mo be. <sup>3</sup> Dhali a'di yaki'd mo dok/ e ka tente/ ta'da tente/ pedoŋjon mo tani a'di parki 'kwanin tiya e mo mmodosh mo ka wuny is e mo ma suug mo be. <sup>4</sup> Dhali e uni mo tani a'di ki o uni gwo mo ki: Um mini ii e bwaman monsinum pem mo si'da/ dhali a'diyin jin 'boro'd mo tani aha/ mina ci um a'di mo. Wakan uni iikin mo be. <sup>5</sup> Gom ya jin yana a'di dok/ e ka tente/ di'di bwanj 'kup mo dhali ka tente/ kwara mo tani a'di ki mii mii jin nyakka'd kan mo si'da/. <sup>6</sup> Dhali ka tente/ ta'da tente/ mudhe'd mo tani a'di yaki'd mo dhali gam kun tiya mmodosh mo dhali a'di ki o uni gwo ki: Atinta dosha um mmahan ka wuny is kan iyula tee mo? <sup>7</sup> Uni ki thok a'di gwo mo ki: Haali/ wathin ʈal 'de/ yisa di'da jin ɳapi aman mo. A'di ki o uni gwo mo ki: Um mini iiku/ mo e bwaman monsinum pem mo si'da/. <sup>8</sup> Dhali ki mom'pimpili/ pu'dki'd mo tani com gi monsinu o'da mandhu tom piti gwo mo ki: Yuķi imanmiiya ʈu'c mo dhali ci uni tom buni gun miina uniya ʈu'c mo mmotel 'pen nyakki uni gun 'ko'd mo ntagi uni kun 'koni ʈwa/ a/ mo be. <sup>9</sup> Dhali ki uni gwansan kun yukkunu mo ka tente/ mudhe'd pu'dkin mo tani uni ka 'dete/ 'dete/ bu'thki nasa guurush mo. <sup>10</sup> Dhali ki uni kun 'koni ʈwa/a/ pu'dkin mo tani uni kulumki gwo i bwa mo ki uni mini 'taki bu'th ki nyanye/ mo. Hili uni 'baar mo ka 'dete/ 'dete/ si'da/bu'thki nasa guurush si'da/ mo be. <sup>11</sup> Dhali ki uni bu'thki uni mo tani uni miikina gumgum apo/ com gu'b mo <sup>12</sup> mmo/o gwo mo ki: Uni gwansan kun miikina ʈu'c ɳ'ko'd mo ka jasa tenten 'de/ mo tani dhali / e ki dhu uni mmonyakki aman mana, aman kun

miikina tu'c kun ditadit ka tente/ jin 'batha'ba'th kan mo. <sup>13</sup> Hili a'di thok jan tal 'deñ kamu/ gwo mo 'peni uni mo ki: Akam pema, aha/ dinaki mii /e ki shi/ mo. Dina /e ki gam gwo me'd ki aha/ mo gom nasa guurush mo 'taa? <sup>14</sup> Buthi a'di jin ta jim pini mo ma dhali yaku/ mo. Aha/ kwanykina a'di jin cika/ uni gwansan mo kun iiyini 'ko'd mo me'd jin cikika/ /e mo be. <sup>15</sup> Aha/ dina bway ki kany mo be mmomii to jin oyaa/ bwa mo gom a'di jin ta jim pem mo be. Walla mina /e ta ham 'kus mo gom aha/ mmomiga/ mii ka 'the mo ki 'bore/ mo 'taa? <sup>16</sup> Wakan uni gun 'koni 'ko'd mo tani minu dhu ntwa/a/ mo dhali uni gun 'koni twa/a/ mo tani minu dhu n'ko'd mo be.

### *Yesus Torki Mowum Piti Itwa/a/ Me'di Kwara mo*

<sup>17</sup> Dhali ka Yesus yaki'd ka gagamis e Pa Urushaliim mo tani a'di suski imancik a'di gwo i'kume'd i'ce'dka su/ mo uni 'cena mo dhali e bway mo tani a'di ki o uni gwo mo ki: <sup>18</sup> Hili ana iina ii ka gagamis e Pa Urushaliim mo, dhali Ya/ gi 'Kwani minu ci 'kwaniñ gasiis kun cani me'd mo dhali iman'kwar to mo, dhali uni mini wak a'di mo mmo'kosh a'di jwa mo be. <sup>19</sup> Dhali uni mini ci a'di ki 'kwani kun 'koki ta 'Kwani Yahuuda/ mo mmomii a'di ka mak mo dhali mmodor a'di mo dhali 'kosh a'di mo ki cwany'cithan dhul mo, dhali a'di midi cu mis mo ka cim kwara mo be.

### *Gwondot ma Yakuub dhala Yohaan mo*

<sup>20</sup> Dhali yan'ko'd ata'da gi iya/ ma Sebadi pu'dkini a'di mo nyakki iya/m piti mo dhali 'ko ki jinj 'kupa'dupuni bwambori a'di mo, dhala yim ki dot a'di gwo mo gom to mo. <sup>21</sup> Dhali a'di ki owa yim

gwo mo ki: Atinta ɳapa /e mo? Ayim ki thok a'di  
 gwo mo ki: Ƙani iya/m pem su/ gwansan gwo mo  
 ma mmo'ko mo, jan 'de/ midi ɳa'b /e ki me'da bim  
 poros pini mo dhali jan 'de/ midi ɳa'b /e ki me'da  
 biny cam pini mo e bampam pini mo be. <sup>22</sup> Hila  
 Yesus ki thok a'di gwo mo ki: Um 'koki mish to jin  
 dotkina um mo be. Um mini mish piya ƙubbaaya  
 jin pikika/ mo 'taa? Uni ki thok a'di gwo mo ki:  
 Aman mina mish mii mo be. <sup>23</sup> A'di ki thok uni  
 gwo mo ki: Um mini piya ƙubbaayam pem mo. Hili  
 mmo'ko aha/ ki me'da bim poros pem mo dhali  
 ki me'da cam pem mo tani a'di diki ta miim pem  
 mmodhal um bway mo, haali/ a'di ta mo gom uni  
 gwansan kun thosonkin ma Ababam pem mo gom  
 uni mo be. <sup>24</sup> Dhali ki uni gun 'koni 'kume'd ciƙki  
 gwo yan mo tani uni 'kokin ka nyor mo apo/ uni  
 su/ gwansan mo kun ta ikam mo be. <sup>25</sup> Hila Yesus  
 yukki uni mo dhali o gwo mo ki: Um mishki mo  
 mo ki tapa kun 'koki ta 'Kwani Yahuuda/ mo mii  
 miin tapa apo/ uni mo dhali 'kwanim buni gun can  
 mo miiki moshirr apo/ uni mo be. <sup>26</sup> Mii yansan  
 minu 'koki mii wakan e bwam um mo. Hili a'diyin  
 jin midi 'taki ca mo mbwam um mo tani a'di midi  
 mii ta amanmiiya ʈu'c bum mo. <sup>27</sup> Dhali a'diyin jin  
 midi 'taki di nʈwa/a/ mbwam um mo tani a'di midi  
 mii ta ڦiŋkinam bum mo be. <sup>28</sup> Wakansan me'd Ya/  
 gi 'Kwani pu'dki'd mo ki a'di minu 'koki mii to mo  
 tani hili ki a'di midi mii to gom 'kwani mo dhali  
 mmoći mondiki/em piti mo mmota amangwam  
 gom 'kwani ka ris mo be.

*'Kwani Su/kun Bu'thki Momish Mo mo*

<sup>29</sup> Dhali me'd jin iikina uni ka pije/ mo 'peni Pa Ariiha mo tani adhana waambuhany 'kwani bathki a'di nsho'k mo be. <sup>30</sup> Dhali hili 'kwaniny ja'da/ isu/ 'kokin e shemen bway mo be. Ki uni cikki gwo ka Yesus yaki'd ki yampe mo tani uni cuu gwo kagahara ki: Miiyi mii apo/ aman mo ma, Ya/ ma Dawuu'd mo. <sup>31</sup> Dhali awaambuhany 'kwani ƙucurki uni ki gwo mo mmotor uni gwo mo mmo'ko ki shwam mo. Hili uni cuukin kagahara ki nyanye/ mo ki: Tapa, miiyi mii apo/ aman mo ma, Ya/ ma Dawuu'd mo. <sup>32</sup> Dhala Yesus doshki'd mo dhali yuk uni mo dhali o gwo mo ki: Atinta o um bwa jin miga/ mii gom um mo? <sup>33</sup> Uni thok a'di gwo mo ki: Tapa, dhalki em bam ƙa'du mo ma. <sup>34</sup> Dhala Yesus ki ƙwo'c uni e i is mo dhali ta uni em buni ki me'd mo, dhali ki jahanne/ uni bu'thki momish mom buni mo dhali uni bathki a'di nsho'k mo be.

## 21

### *Mojin Pinu Mii E mo Mmocic Pa Urushaliim mo*

<sup>1</sup> Dhali ki uni 'dishkin e Pa Urushaliim mo dhali pu'd mo e Pam Beetpaji mo e 'Kuwosh Setuun mo tani yan'ko'd Yesus ki hash imancik a'di gwo isu/ mo <sup>2</sup> mmo/o uni gwo mo ki: Iiku/ mo ma e bampa/ jin di'd ka par 'bani um mo dhali ki jahanne/ um mini gam thuluny jin shi'du/ mo dhali aran nyak di ki a'di mo. 'Cuki uni mo dhali 'doyu/ uni i aha/ mo ma. <sup>3</sup> Waƙki/ wathin 'dej kamu/ midi 'taki o um gwo mo tani um mini o a'di gwo mo ki: Tapa a'di midi mii ta gi uni mo dhali a'di midi doku/ uni ki jahanne/ mo be. <sup>4</sup> Mii yansan a'di bu'thki mo mo

jin minu thim gwo mo, a'di jin okin ma mançι gwo  
ma Arumgimis kadhamo/ mo mmo/o gwo mo ki:

<sup>5</sup> Tori 'bwa/ ma Sihyuun gwo mo ma,  
hili amaliç pini a'di pu'dki'd e /e mo  
mmokar is ki gwa'd mo, dhali a'di merki thuluny  
apo/ mo,  
dhali eya po/ ari thuluny mo, a'di jin ta arin thu-  
luny mo.

<sup>6</sup> Imancik a'di gwo uni iikin mo dhali mii a'di me'd  
gwo ma Yesus jin kankina a'di uni mo be. <sup>7</sup> Uni  
suski thuluny dhali aran mo dhali pa'd burrinyem  
buni apo/ uni mo, dhali a'di merki a'di apo/ mo  
be. <sup>8</sup> Dhala waambuhany 'kwani 'dishkina 'twa/  
m'baar mo uni kun pa'dki burrinyem buni mb-  
way mo dhali kun tiya uni kwa/kina biny cwa mo  
dhali pa'd uni e bway mo be. <sup>9</sup> Dhala waam-  
buhanay 'kwani iikini bwambori a'di mo dhali uni  
gun bathki a'di nsho'k mo tani kumki cuuwa/ mo ki:  
Hosanna e Ya/ ma Dawuu'd mo. Mom'bor mii gom  
a'di jin yayi'd ki gway gi Tapa mo. Hosanna a'di jin  
di'd e mo jin eka/ ek mo. <sup>10</sup> Dhali ki a'di ciçki'd mo  
e Pa Urushaliim mo tani aris 'kwani gi 'peñkuman  
bampa/ uni ci'thkunu is ki mii mo mmo/o gwo mo  
ki: Kaja a'danne? <sup>11</sup> Dhala waambuhany 'kwani o  
gwo mo ki: Yansan ta'da Mançι Gwo jin ta'da Yesus  
'peni Pa Naasira gi Pany Jaliil mo be.

### *Mmodhelel Gu'b gi Mondheleladhelel mo*

<sup>12</sup> Dhala Yesus ciçki'd e gu'b gi mondhelelad-  
helel ma Arumgimis mo dhali urki'da ris uni ka  
pije/ mo uni gun yolki to mo dhali kun yoli to  
mo e gu'b gi mondheleladhelel mo. Dhali a'di  
ki 'dañkala tharabeesa gi uni gun wani emena

guurush mo dhali mon'ko gi uni gwansan kun yoli gurko/ mo be. <sup>13</sup> A'di ki o uni gwo mo ki: A'di 'kwarkunu mo ki: Gu'b pem minu yuk ki gu'b gi mon'tho mo. Hili um ki mii a'di me'd gu'b gi 'kwanin 'di/ mo be.

<sup>14</sup> Dhali 'kwaniny ja'da/ dhali uni gun ta ɻwol pu'dkini a'di mo e gu'b gi mondheleladhelel mo dhali a'di waɔki uni mo be. <sup>15</sup> Dhali hili ki igasiis kun can mo dhali iman'kwar to mo parki miim 'borga/kun miikina a'di e mo tani dhali uci mmog-wona uni mo e gu'b gi mondheleladhelel mo ki: Hosanna e Ya/ ma Dawuu'd mo tani, uni 'kokin ka nyora du mo be. <sup>16</sup> Dhali uni ki o a'di gwo mo ki: A/ e ciłki gwo jin ona uni gwansan mo? Dhala Yesus ki thołk uni gwo mo ki: Nye. 'Kona um ki den gwo e ki suny suny mo 'taa? jin o gwo mo ki: 'Peni 'twa/ uci dhali uni gun pina ko mo tani /e kalki momaŋa 'borgaŋ gana/ mo be.

<sup>17</sup> Dhali a'di ki dhal uni 'pen mo dhali ya mo e 'peñkuman bampa/ gi Pam Beetaniya mo dhali ç'a'b e mun mo be.

### *Cwampu/jin Jeekunu mo*

<sup>18</sup> Dhali ki mo ta mon'thamo/ mo tani me'd jin dołkina a'di e 'peñkuman bampa/ mo tani a'di 'koshkina te/ mo be. <sup>19</sup> Dhali a'di yaki'd mo mmoŋapa pu/ mo jin di'd e shemen bway mo dhali ki a'di yaki'd mo dhali diki gam maman ʈal 'de/ 'peni a'di mo tani hili jasi 'cemen uni 'cena mo be. Dhali a'di ki o a'di gwo mo ki: Maman 'peni /e mo tani minu 'koki piyu/ shush ka pije/ ki sule/ sule/ mo dok/ e. Dhali apu/ a'di ɻu'thki'd ki jahanne/ mo be. <sup>20</sup> Dhali ki imancił a'di gwo parki a'di e mo tani uni merkin mo mmo/o gwo mo ki: Hili

atinta lan ma pu/ ku'th hila/ ki jahanne/ kan mo?  
 21 Dhala Yesus ki thok uni gwo mo ki: Ka jin̄ gana/  
 aha/ ona um gwo mo ki: Wakki/ um mini ta gi  
 mon̄gam gwo is mo dhali 'koki shi/ bwa 'kup mo  
 tani um mini 'koki mii jasi a'di jin miikunu mo  
 gom cwampu/ yan mo. Hili wakki/ um mini owa  
 dhan wosha turga/ yansan gwo mo ki: Dhalki a'di  
 gunu mo dhali bit̄ mo e bwam kumma/ yi'de/ mo  
 tani, a'di minu mii mo be. 22 Dhali ma to yin jin  
 mina umi dot̄ ki mon'tho mo tani um mini bu'th  
 a'di mo wakki/ um ta gi mon̄gam gwo is mo be.

### *Moshirr ma Yesus Dot̄kunu Gwondot̄ mo*

23 Dhali ki a'di pu'dki'd mo e gu'b gi mondheleladhelel mo tani igasiis kun can dhali 'kwani gwanyjaka/ gi 'kwani mo, uni pu'dkini a'di mo me'd jin̄ torkina a'di gwo mo dhali o gwo mo ki: Ki moshirr jana sa/ mmiikina /e aris to gwansani 'baar mo kan? Dhali aja a'di içiki / e moshirr yansan mo? 24 Yesus ki thok uni gwo mo ki: Aha/ si'da/ mina thok um gwondot̄ mo dhali wakki/ um mini tor aha/ gwon thok mo tani yan'ko'd aha/ si'da/ mina tor um gwo mo gom gwo gi moshirr yan jin miikika/ to gwansan mo be. 25 Ki mo jin miin ma Yohaana mii ki yi'de/ mo tani 'peni mana moye? 'Peni momis mo 'taa? Walla 'peni 'kwani mo? Dhali uni walkin ka rem 'kup mo mmo/o gwo mo ki: Wakki/ ana mina 'taki o ki 'peni momis mo tani a'di midi 'taki o ana gwo mo ki: Ba tinta 'kona um ki gam a'di gwo is mo? 26 Hili wakki/ ana ona ki, 'peni 'kwani mo tani, ana ko/kina waambuhany 'kwani mo. Haali/ uni 'baar mo karkina Yohaan ka manci gwo ma Arumgimis mo be. 27 Wakan uni

thokkina Yesus gwo mo ki: Aman mola mo mo be. Dhali a'di ki o uni gwo mo ki: Wakan si'da/ aha/ mina diki ṭor um gwo mo gom moshirr yan kun miikika/ aris to gwansan mo be.

*Gwom 'Bith/e gom Iya/ Isu/ mo*

<sup>28</sup> Dhali um kulumki gwo mbwa wakata mo? Gom wathi/ jin 'kona iya/ isu/ mo. Dhali a'di yaki'd mo e a'di jin ta'da bwanyara/ mo dhali o a'di gwo mo ki: Ya/uma, yaku/ mo dhali miiya tu'c e bwaman monsinu shwane/ mo. <sup>29</sup> Dhali a'di ki thok a'di gwo mo ki: Aha/ mina ya yisa. Hili η'ko'd mo tani a'di rici'da du is mo dhali ya mo be. <sup>30</sup> Dhali a'di yaki'd mo e a'di jin 'kon ma po/i su/ mo dhali o a'di gwon ṭal 'de/ mo. Dhali a'di ki thok a'di gwo mo ki: Aha/ mina ya mo gana. Hili a'di diki ya mo be. <sup>31</sup> Jana 'peni bwam uni su/ gwansan jin miiki bwa gi com mo? Uni ki thok a'di gwo mo ki: Jin ṭwa/a/ mo be. Dhala Yesus ki o uni gwo mo ki: Ka jin gana/ aha/ ona um gwo mo ki, imantera thulpa/ dhali uni gun mii miinyçal mo tani mini ii ntwa/a/ ki um mo e Bampa/ ma Arumgimis mo be. <sup>32</sup> Haala Yohaan pu'dki'd mo e um mo ki bway gi miinqar/e mo. Dhali um 'koki gam a'di gwo is mo. Hili imantera thulpa/ dhali uni gun mii miinyçal mo tani uni gamki a'di gwo is mo be. Dhali hili me'd jin hilkina um a'di mo tani η'ko'd um 'koki rica du is mo dhali gam a'di gwo is mo be.

*Gwom 'Bith/e gom Bwaman mo ma Mura'th jin Sinu mo dhali Imanhil Mo mo*

<sup>33</sup> Ciki gwom 'bi'th/enj kamu/ mo. Wathi/ jin cila gu'b mo di'd mo a'di jin thosonki mo mo e monsinu mo dhali a'di ki nyaŋa goŋ mmo'kam a'di is mo.

Dhali a'di ki ćwany mo mo mmoneyu/a mura'th nycine/mo dhali a'di ki nyāŋ gu'ba turga/mo dhali a'di ki dhal a'di e uni gun miina ṭu'c mo dhali a'di ki ya bampa/ jin si'dasi'd mo be. <sup>34</sup> Dhali ki yil gi maman cwa 'dishi 'twa/ mo tanı a'di hashki ćin̄kinam piti e uni gun miina ṭu'c mo mmok̄ali maman cwam piti mo be. <sup>35</sup> Dhali imanmiiya ṭu'c bu'thki ćin̄kinam piti mo dhali dor jan 'de/ mo dhali jan̄ kamu/ 'koshkina uni jwa mo dhali jan̄ kamu/ 'koshkina uni ki wosh mo be. <sup>36</sup> Dhali dok̄/e a'di ki hash ćin̄kinam piti mo, a'di jin bol kun twa/a/ e ka ris mo, dhali uni mii uni ki miin tal 'de/ mo jin miina uni mo be. <sup>37</sup> Yan'ko'd a'di ki hash ya/ m pitin̄ gana/ e uni mo mmo/o gwo mo ki: Uni mini tak̄ ya/m pem mo be. <sup>38</sup> Hilki imanmiiya ṭu'c parki ya/ e mo tanı uni o gwo mo ćem buni mo ki: Yan ti nta a'di jin midi kal mal mo. Iiyu/ mo ma, dhalki ana 'kosha a'di jwa mo dhali kal mal piti mo. <sup>39</sup> Dhali uni bu'thki a'di mo dhali bit̄ a'di ka pije/ 'peni bwaman monsinu mo dhali 'kosh a'di jwa mo be. <sup>40</sup> Dhali wakan ki com jin cila monsinu mo midi pu'du/ mo tanı a'di midi mii atinta mo gom imanmiiya ṭu'c gwansan mo? <sup>41</sup> Uni ki thok̄ a'di gwo mo ki: A'di midi dhu uni gwansan kun ta 'kwanin thus mo e mowu jin ka/aka/ mo, dhali dhal monsinum piti ki imanmiiya ṭuca tiya mo, uni gun mini ci a'di maman cwa gi yil buni mo be.

<sup>42</sup> Yesus ki thok̄ uni gwo mo ki: 'Kona um ki den gwo e ki suny suny mo 'taa e Gwo ma Arumgimis jin 'kwarkunu mo ki:

Ki wosh gana/ yansan jin nyāŋkunu gu'b mo tanı wakkina imannyaŋ gu'b mo

dhali a'di warki'd mo ki dhan 'kupan wosh gi  
'pena bi mo.

Mii yansan a'di ita mii jin miikina Tapa mo,  
dhali a'di ta mii jin meru em bana mo be.

<sup>43</sup> Wakan aha/ mina tor um gwo mo ki: Bampa/  
ma Arumgimis mo minu bu'th 'peni um mo dhali  
ci a'di ki kala kamu/ mo jin midi dho'th maman e  
a'di mo be. <sup>44</sup> Dhali a'di jin midi 'bar apo/ 'kuwosh  
yansan mo tani midi 'ce'd bwa ka 'ci'cimi'th mo,  
hili ki a'di midi bit apo/ jan 'deñ kamu/ mo tani  
midi yap a'di mo be.

<sup>45</sup> Dhali ki igasiis kun can dhali 'Kwani  
Parisiyiin cikki gwom 'bi'th/em piti mo tani uni  
nyithki gwo ki a'di oki gwo gom uni mo be. <sup>46</sup> Hili  
ki uni palki mii mmobu'th a'di mo tani uni ko/kina  
waambuhany 'kwani mo haali/ uni karki a'di ka  
manci gwo ma Arumgimis mo be.

## 22

### *Gwom 'Bi'th/e gom Miimash jin Yukwa Yuk mo*

<sup>1</sup> Dhali dok/e Yesus oki gwom 'bi'th/e e uni mo  
mmo/o gwo mo ki: <sup>2</sup> Bampa/ gi Momis miga/kar ka  
par 'ban ka malik mo, a'di jin yukki'da yuk mo gom  
miimash gi ya/m piti mo be. <sup>3</sup> Dhali mmohasha  
a'di ciñkinam piti mo mmoyuk uni gwansan kun  
yukkunu mo e momiimash jin yukuwa yuk mo tani  
hili uni 'koki iiyu/ mo be. <sup>4</sup> Dhali a'di ki hash  
ciñkinan tiya mo mmo/o gwo mo ki: Yuki uni  
gwansan kun yuku mo ma. Hili aha/ thosonkina  
tontem pem mo, dhali amorbip pem mo dhali ushi  
bip pem mo uni 'koshkunu mo dhali aris to 'baar  
mo thosonkunu mo. Iiyu/ mo ma e mo ma yuk

jin yuku mo e momiimash mo be. <sup>5</sup> Hili uni 'koki ciya hirdhe/ ki a'di mo dhali uni iikin mo dhali jan 'deñ kamu/ e buntom piti mo dhali jan kamu/ e mo ma tu'c piti mo be. <sup>6</sup> Ki 'kwaniñ tiya 'kon mo mmojigit çiñkinam piti 'ba/ ki me'd mo tani kun tiya miikina uni ki mon'the is mo dhali 'kosh uni jwa mo be. <sup>7</sup> Dhala malik shwa'da nyor ka nyor mo dhali a'di ki hash 'kwani ma meem piti mo dhali 'ce'd uni gwansan sho'k mo kun 'koshkina mee mo dhali ci'th bampam buni ki o'd mo be. <sup>8</sup> Dhali a'di ki o ciñkinam piti gwo mo ki: Ayuk jin yuku mo gom moshwa to mo e momiimash mo tani a'di thosonkunu mo, hili uni gwansan kun yukkunu mo tani uni ta 'kwani kun 'koki ha me'd mo. <sup>9</sup> Iiku/ mo wakan e bwaya beega/ mo dhali yuki 'kwani e momiimash ka ris mo me'd jin mina umi gam mo. <sup>10</sup> Dhali ciñkina/ gwansan uni iikin mo e bway tur mo dhali tula ris uni 'baar mo is kun gamkina uni mo nyakki uni kun shiyini lu/ mo dhali kun 'boron mo. Wakan momiimash jin yuka yuñ mo tani a'di 'tu'dkunu mo ki yilkinañ 'kwani mo be.

<sup>11</sup> Hili ka malik pu'dki'd mo dhali hil 'kwani yilkina/ mo tani a'di parki wathin 'deñ kamu/ e mo mmodara a'di gi burrinye/ gi momiimash mo be. <sup>12</sup> Dhali a'di ki o a'di gwo mo ki: Akam pema, atinta iyayina /e mmahan ki dar gi burrinye/ gi momiimash kan mo? Dhali a'di diki thok 'twanj kamu/ mo be. <sup>13</sup> Dhali yan'ko'd amalik ki o gwo mo e uni gun miina tu'c mo ki: Deki a'di ki me'di lu/ mo dhali ki shoki lu/ mo ma dhali biñ a'di e jis jin ta'da 'tum ka 'tum mo, dhali e mun mo tani mo yan a'di ta mo jin mina 'kwani ko mo dhali 'pe'd shem buni mo be. <sup>14</sup> Haali/ 'kwani ka ris yukkunu

mo tani hili uni 'kokini daka/ mo kun kwanykunu  
mo be.

*Mo gi Cinu Athulpa/ ka Kaysar mo*

<sup>15</sup> Yan'ko'd 'Kwani Parisiyiin iikin mo dhali gam  
'twa/ 'kup mo mmocesh a'di ki gwo jin ona a'di mo  
be. <sup>16</sup> Dhali uni ki hash imancik a'di gwo i a'di  
mo nyakki 'Kwani Hirodusiyiin mo mmo/o gwo  
mo ki: Manṭor Gwo, am misha ki /e ta a'dinj gana/  
mo dhali /e ki ṭor gwo gi bway ma Arumgimis  
gana/ mo dhali /e diki ko/ 'kwani mo haali/ /e diki  
mii mii ka gwar 'de/ gom buye/ jin nyitha /eya  
nyith mo walla gom 'kwani kun ta tapa mo. <sup>17</sup> Tori  
aman gwo mo ma, gwo kuluma /e mbwa katinta  
mo? A'di ta gwoñkan 'taa? jin minu ciya Kaysara  
thulpa/ mo walla minu dhalku/ mo? <sup>18</sup> Hila Yesus  
mmonyitha a'di tonthus buni mo tani a'di ki o gwo  
mo ki: Atinta pala um aha/ ki gwo kan mo, um  
'kwani kun tana he'k e ka he'k e mo? <sup>19</sup> Tori aha/  
nasa guurush jin ciyuwa thulpa/ mo ma. Dhali  
uni ki guyu/ a'di nasa guurush mo be. <sup>20</sup> Dhala  
Yesus ki o uni gwo mo ki: Jamas maja a'dan? dhali  
aja a'di i'kwara'di san mo? <sup>21</sup> Uni ki thok a'di gwo  
mo ka Kaysar mo be. Dhali yan'ko'd a'di ki thok  
uni gwo mo ki: Wakan ciya Kaysar to jin ta jim  
ma Kaysar mo ma. Dhali ciya Arumgimis to jin  
ta ji ma Arumgimis mo ma. <sup>22</sup> Ki uni cikki gwo  
gwansan mo tani uni merkin mo, dhali uni dhal  
a'di 'pen mo dhali ii mo be.

*Mo gi Dotu Gwondot gom Mo gi Pinu mo*

<sup>23</sup> Dhali ka tente/ caan mo tani 'Kwani  
Sadukiyiin pu'dkini a'di mo mmo/o gwo mo ki:  
Mominunj kamu/ yisa di'da. Dhali uni ki dot a'di

gwondoṭ mo <sup>24</sup> mmo/o gwo mo ki: Manṭor Gwo, aMusa a'di oki gwo mo ki: Waḳki/ wathi/ midi wu mo ki dar gi ući mo tani akam piti midi mii masha 'bom jin dar ga kath mo dhali ćis ući goma kam piti mo be. <sup>25</sup> Dhali uni ikam 'kokini pesu/ mo gun 'koni bwam am mo. Jin ṭwa/a/ mashki'd mo dhali a'di wuki'd mo ki dar gi ući mo, dhali a'di ki dhal ash ka kam piti mo be. <sup>26</sup> Wakan si'da/ a'di jin 'ko'd mo dhali jin 'kon ma po/i kwara mo ntagi uni 'baar mo 'kokini pesu/ mo be. <sup>27</sup> Dhali 'ko'di uni 'baar mo tani a'bom wuki'd si'da/ mo be. <sup>28</sup> Dhali e mompinu mo tani wakan e uni gun 'koni pesu/ mo tani ayim midi ta asha ja mo? Haali/ uni 'baar mo mashkina yim mo be.

<sup>29</sup> Hila Yesus ki thok uni gwo mo ki: Um thuthi mii mo haali/ um 'koki mish Gwo ma Arumgimis kun 'kwarkunu mo walla mom'bi'th ma Arumgimis mo be. <sup>30</sup> Haali/ e mompinu mo tani uni mini mash mo yisa walla minu 'koki ći bway mo mmomash mo si'da/. Hili uni mina e waki iman'doyu gwo mo e momis mo be. <sup>31</sup> Dhali gom gwo jin pinu 'peni mowu mo tani 'kona um ki deñ gwo e mo, a'di jin okin ma Arumgimis um mo mmo/o gwo mo ki: <sup>32</sup> Aha/ tana Arumgimis ma Ibrahiim mo dhali Arumgimis ma Is/hak mo dhali Arumgimis ma Yakuub mo. A'di diki ta Arumgimis gom uni gun wukin mo, hili gom uni gun 'kokin ki e mo be. <sup>33</sup> Dhali ka waambuhany 'kwani cikki gwo yan mo tani uni 'kokin mo mmer mo gom gwom piti jin ṭora a'di mo be.

*Adhan Gwoŋkan jin Ca'djin 'Kwarkunu mo*

<sup>34</sup> Dhali ki 'Kwani Parisiyiin cikki gwo yan ki a'di 'teki 'Kwani Sadukiyiin 'twa/ mo tani uni tulki is mo mmontal 'de/ mo be. <sup>35</sup> Dhali jan tal 'deñ kamu/ 'peni uni mo tani jin ta'da manmisha jo'd gwoñkan mo doñki a'di gwondot mo mmopal a'di mo be mmo/o gwo mo ki: <sup>36</sup> Mantor gwo, gwoñkan jana i/eka/ ek mo mbwanj gwoñkan jin 'kwarkunu mo? <sup>37</sup> Dhali a'di ki thok a'di gwo mo ki: /E mini mii en Tapa Arumgimis pini ka dum pini 'baar mo dhali ka kashiram pini 'baar mo dhali ki bwam pini 'baar mo be. <sup>38</sup> Gwo yansan a'di ita gwoñkan jin twa/a/ jin eka/ ek mo e gwoñkan jin 'kwarkunu mo be. <sup>39</sup> Dhali jin 'ko'd jin waki a'di mo tani a'dihe/ mo be. /E mini en amannyak çab pini me'd is pinin gana/ mo be. <sup>40</sup> Eya po/ gwoñkan su/ gwansan kun 'kwarkunu mo tani uni i'dapkan ki gwoñkan jin cinu 'baar mo dhali gwo jin çina imançi gwo ma Arumgimis kadhamo/ mo be.

### *Gwo gi Dotu gom Ya/ ma Dawuu'd mo*

<sup>41</sup> Dhali ki 'Kwani Parisiyiin 'kokin mo mmotul is mo mmontal 'de/ mo tani Yesus ki doñ uni gwondot mo be <sup>42</sup> mmo/o gwo mo ki: Atinta kuluma um gwo mbwa mo goma Kristhos mo? A'di ta ya/ maja mo? Uni thok a'di gwo mo ki: Ya/ ma Dawuu'd mo be. <sup>43</sup> Dhali a'di ki thok uni gwo mo ki: Dhali wakki/ a'di wakan mo tani atinta on ma Dawuu'd gwo ki Shi/in mo mmoyuk a'di ki Tapa mo mmo/o gwo mo ki:

<sup>44</sup> Tapa o'da Arumgimis pem gwo mo ki:  
Ça'bi /e aha/ ki me'da bim poros pem mo ma,

ntag̤i aha/ mina dhu uni gun ta 'kup ki /e mo e  
bwan̤'kwariny mom pini jin dhuna /e sho'k  
mo be.

<sup>45</sup> Dhali wał̤ka Dawuu'd ki yuł̤ a'di ki Tapa mo tani  
ba/ata mmina a'di ita ya/m piti moyi? <sup>46</sup> Dhali jan  
tal 'deñ kamu/ yisa di'da jin mishi a'di gwo yansan  
thoł̤ mo, walla 'pena tee çaan mo tani jañ kamu/  
dok/e di'd 'de/ yisa jin dot̤ki a'di gwondota kamu/  
mo be.

## 23

*Yesus Be'dki Mii gi Iman'kwar To mo dhali  
'Kwani Parisiyiin mo*

<sup>1</sup> Dhali yan'ko'd Yesus ki owa waambuhany  
'kwani gwo mo dhali imancik a'di gwo mo be  
mmo/o gwo mo ki: <sup>2</sup> Iman'kwar to dhali 'Kwani  
Parisiyiin uni 'kokin mo e monyça'b ma Musa mo  
be. <sup>3</sup> Wakan boł̤i ki mii gi ma to gunn iniin dhali  
ciya hirdhe/ ki gwo jin tora uni um mo hili dhalku/  
ki mii to kun miina uni mo, haali/ uni çiki gwo mo  
tani hili uni 'kokin botki a'di mo be. <sup>4</sup> Uni dekki to  
jin dił̤adit̤ mo kun shiña kal ki shi/ mo dhali uni ki  
duh uni e 'kupa biñ 'kwani mo. Hili uni ki is buni  
mo tani uni 'kokin joç uni ki me'd buni mo be. <sup>5</sup> Uni  
miina ris tom buni 'baar mo ki uni mina 'kwani  
mish mo. Pilakterim\* buni miina uni ki bee bee  
mo dhali burrinyen turgam buni nye'ba/ uni she/  
ka yupen turga/ mo. <sup>6</sup> Dhali uni eni montak̤ e mo  
jin yukkunuwa yuł̤ mo dhali mom 'boron e gu'b gi  
montul is mo be <sup>7</sup> dhali en monthe me'd kagahara

---

\* **23:5** Pilakteri ta'da yi'c jin dhunu Gwo ma Arumgimisa tiya kun  
'kwarkunu mo apo/ mo mmohithi buye/ mo dhala biny cam mo e  
mon'tho mo.

e mo ma suug mo dhali uni eni mii jin yuka 'kwani  
 uni ki gum pem jin caa e ki ca mo. <sup>8</sup> Hili um mini  
 'koki ḥap 'kwani mmoyuk um ki gum bam kun caa  
 e ki ca mo haali/ um tan ga manṭor gwom bum  
 jin ṭal 'de/ mo dhali um tana waka ṭal 'de/ mo be.  
<sup>9</sup> Dhali um mini 'koki yuḳ wathinj kamu/ka babam  
 bum e mony'cesh yan mo haali/ um tan ga Babam  
 bum jin ṭal 'de/ mo a'di jin di'd e momis mo be.  
<sup>10</sup> Walla um yisa minu yuḳ ki itapa mo haali/ um  
 tan gi tapam bum ṭal 'de/ mo a'di jin ta'da Kristhos  
 mo be. <sup>11</sup> A'di jin caaca e bwam um mo tani a'di  
 midi ta ciŋkinam bum mo be. <sup>12</sup> A'diyin jin kar  
 is piti ki ca mo tani minu kar ki gwa'd mo dhali  
 a'diyin jin kar is piti ki gwa'd mo tani minu kar ki  
 ca mo be.

<sup>13</sup> Wayyi e um, 'kwani kun ta iman'kwar to mo  
 dhali 'Kwani Parisiyiin mo kun tana he'k e ka he'k  
 e mo. Haali/ um 'dapki bway gi Bampa/ gi Momis  
 'twa/ mo apo/ 'kwani mo. Haali/ um ki is bum  
 'koki ciç mo walla 'koki dhal uni gwansan bway  
 mo kun mini 'taki ciç i a'di mo be. <sup>14</sup> Wayyi e  
 um, 'kwani kun ta iman'kwar to mo dhali 'Kwani  
 Parisiyiin mo kun tana he'k e ka he'k e mo. Haali/  
 um loski gu'b gi up gun wuna ikath mo dhali eya  
 por ma pije/ mo tani um ki mii mon'tho mo ki  
 rash rash mo. Wakan um mini bu'th dhan miiwak  
 gun caaca mo be. <sup>15</sup> Wayyi e um, 'kwani kun ta  
 iman'kwar to mo dhali 'Kwani Parisiyiin mo kun  
 tana he'k e ka he'k e mo. Haali/ um tani mo mo  
 dhali dhan yi'de/ mo dhali a'cesh mo mmogam  
 jan ṭal 'deñ kamu/ jin dina e ki she/ mo mmobu'th  
 gwom bum mo, dhali ki a'di warki'd ka manbu'th  
 gwom bum mo tani um ki mii a'di ka 'ci ma al o'd

me'di su/ ki nyanye/ mo mmobol is bum gana/ e  
mo be.

<sup>16</sup> Wayyi e um, 'kwani kun tana ja'da/ ka ja'da/  
mo kun toshki ta ashu/um bway mo, kun o gwo mo  
ki: Wakki/ jan tal 'deñ kamu/ midi thul me'da po/  
gu'b gi mondheleladhelel mo tani a'di mii mii ki  
pe'th mo be. Hili wakki/ wathin<sup>q</sup> kamu/ midi thul  
me'da po/ 'dolkon gana/ gi gu'b gi mondhelelad-  
helel mo tani a'di deku ki gwom piti jin ona a'di is  
mo be. <sup>17</sup> Um 'kwani kun tana ja'da/ kun ta pus mo.  
Haali/ to jin ca'd ita'da ta mo, ta 'dolkon 'taa? walla  
gu'b gi mondheleladhelel jin kar 'dolkon ki a'di jin  
kogu mo? <sup>18</sup> Dhali um kun o gwo mo ki: Wakki/  
jan 'de/ midi thul me'da powa gwata/ jin miinuwa  
bas mo tani a'di mii'd ki pe'th mo be. Hili wakki/  
wathin 'deñ kamu/ thul me'da po/ to jin çinu ki  
me'd mo apowa gwata/ jin miinuwa bas mo tani  
a'di deka gwom piti jin ona a'di is mo be. <sup>19</sup> Um  
'kwani kun tana ja'da/ mo. Haali/ to jana ica'd  
mo, to jin çinu ki me'd mo 'taa? walla gwata/ jin  
miinuwa bas a'di kar to jin çinu ki me'd ki jin kogu  
mo? <sup>20</sup> Wakan a'di jin thuli me'da apowa gwata/  
jin miinuwa bas mo tani a'di thulki me'di a'di mo  
dhali aris to 'baar kun 'koni a'di mo be. <sup>21</sup> Dhali  
a'di jin thuli me'da po/ gu'b gi mondheleladhelel  
mo tani a'di thulki me'di a'di mo dhali ki a'di jin  
ça'bki'd e a'di mo be. <sup>22</sup> Dhali a'di jin thuli me'da  
po/ momis mo tani thulki me'da powa kursi ma  
Arumgimis mo dhali ki a'di jin ça'bki'da po/ a'di  
mo be.

<sup>23</sup> Wayyi e um, 'kwani kun ta iman'kwar to  
mo dhali 'Kwani Parisiyiin mo kun tana he'k  
e ka he'k e mo, haali/ um çina nana/ ki to jin

çinu Arumgimis mo dhali anuŋkure/ mo dhali tonj kuya/ jin miinuwa 'tash jin ta'da akammun mo dhali um ki ta piny is e ton tiya kun 'bitha mii 'ba/ ki 'bi'th mo me'd gwoŋkan jin çinu mo dhali momii ma kar/e mo dhali momiimii mo dhali mongam gwo is mo. Aris to gwansan ka ba/ mmina umi mii mii mo mmodar ga piny isi cine/ ki miin tiya mo. <sup>24</sup> Um kun toshki ta ashu/um bway kun tana ja'da/ mo, um ki dhim e ka piye/ mo dhali um ki los kalman ki 'kolo'c mo be.

<sup>25</sup> Wayyi e um, 'kwani kun ta iman'kwar to mo dhali 'Kwani Parisiyiin mo kun tana he'k e ka he'k e mo, haali/ um lamki 'ko'd gwar ma kubbaaya mo dhali asahan mo, hili e bwaman mo tani uni 'tu'dkunu mo ki mondil to mo dhali ki mii kun 'coka'cok mo. <sup>26</sup> /E Wathim Parisi jin ta'da ja'da/ mo. Lami bwamana ɺubbaayam pini ntwa/a/ mo ma dhali asahan mo, wakan ki 'ko'd gwar ma piye/ si'da/ midi dheleladhelel mo be.

<sup>27</sup> Wayyi e um 'kwani kun ta iman'kwar to mo dhali 'Kwani Parisiyiin mo kun tana he'k e ka he'k e mo, haali/ um wana e ki mon'kupaje kun kushu mo ki bany bany mo e mis 'te/ mo. Dhali eya por ma piye/ mo tani uni ki piyu/ monyjaro/ mo, hili e bwaman uni mo tani uni 'tu'dkunu mo ka simaj 'kwani kun wukin mo dhali aris to mo kun nyo/ anyo/ mo. <sup>28</sup> Wakan um si'da/ eya por ma piye/ mo tani um ki pi monkar/e gom 'kwani mo, hili e bwam um mo tani um 'tu'dkunu mo ka he'k e mo dhali ki mii kun 'coka'cok mo be.

<sup>29</sup> Wayyi e um, 'kwani kun ta iman'kwar to mo dhali 'Kwani Parisiyiin mo kun tana he'k e ka he'k e mo. Haali/ um nyaŋki mon'kupaje gi imançι gwo

ma Arumgimis kadhamo/ mo dhali um ki nyonj to  
 mo apo/ mon'kupajeñ 'kwaniñ kar/e mo, <sup>30</sup> mmo/  
 o gwo mo ki: Wakki/ ana mina 'taki 'ko ka tee gi  
 ibabam bana mo tani ana mina 'taki 'koki nyak to  
 mii ki uni mo e mo jin woluwa bas gi imançι gwo  
 ma Arumgimis kadhamo/ mo be. <sup>31</sup> Wakan um o  
 gwo apo/ is bum mo ki um ta iya/ gi uni gwansan  
 kun 'koshkina mee gi imançι gwo ma Arumgimis  
 kadhamo/ mo be. <sup>32</sup> 'Tu'di 'te/ ma ki piny piny mo  
 ki mombar gi ibabam bum mo. <sup>33</sup> Um kun ta tasha/  
 mo, dhali um kun ta ushin tashan 'thi/ mo, um  
 mini mish ye kata sa/, um kun 'dapa'dap ki bway  
 gi mo ma al o'd kan mo. <sup>34</sup> Wakan aha/ hashk-  
 ina um imançι gwo ma Arumgimis kadhamo/ mo  
 dhali 'kwani kun yukayuk mo dhali 'kwani kun ta  
 iman'kwar to mo. Dhali kun tiya mina umi 'kosh  
 mo dhali 'kosh ki cwany'cithan dhul mo dhali kun  
 tiya mina umi dor mo e gu'b gi montul is bum  
 mo dhali to'c 'kus e bampa/ ki she/ ki she/ mo.  
<sup>35</sup> Wakan eya po/ um mo tani arisa bas gi 'kwaniñ  
 kar/e wolkina po/ mony'cesh mo 'pena bas ma  
 Habiil jin di'd ka po/ mo ntaga bas ma Sakariyya  
 jin ta ya/ ma Barakiyya mo a'di jin 'koshkina um  
 mo e bwaman ma gwaña/ jin karu mo ki jin kogu  
 mo e mo jin miinuwa bas mo be. <sup>36</sup> Ka jin ganan  
 aha/ tora um gwo mo ki aris to gwansan mini pu'd  
 apo/ 'kwani gwansan kun tana nyakum yil mo be.

### *Yesus Gwoki'd Apo/ Pa Urushaliim mo*

<sup>37</sup> Ayy Urushaliim Urushaliim jin 'koshki imançι  
 gwo ma Arumgimis kadhamo/ jwa mo dhali 'kosh  
 uni gwansan ki wosh kun hashkunu e/e mo. Me'd  
 wana risa kun oka/ ki tul ucim pini isi montal 'de/

mo me'd kumana n̄wa jin wupi ushan piti ka bi mo, dhali um ushkin mo be. <sup>38</sup> Hili mo mo ma, gu'b pini dhalkunu 'pen mo dhali ta ma'du/ ki ma'du/ mo. <sup>39</sup> Haali/ aha/ ṭora um gwo mo ki: Um mini 'koki par aha/ e dok/e mo ntagi um mini o gwo mo ki: Mom'bor mii gom a'di jin pu'dki'd ki gway gi Tapa mo be.

## 24

*Mojin 'Ce'du Gu'b gi Mondheleladhelel Sho'k mo  
dhali Jamas Mii jin Toru It̄wa/a/ gom 'Pemenjiŋ 'Ko'd  
mo*

<sup>1</sup> Dhala Yesus dhalki gu'b gi mondheleladhelel 'pen mo dhali di'd mmoya ka piye/ mo ki imancik a'di gwo pu'dkin mo dhali ṭor a'di gu'b gi mondheleladhelel mo be. <sup>2</sup> Hili a'di ki thok uni gwo mo ki: Um mishina ris to gwansi 'baar mo 'taa? Ka jin̄ gana/ aha/ ona um gwo mo ki wosha kamu/yisa minu dhal ka makampō/ apowa kamu/ jin midi diki biṭa 'cesh mo.

<sup>3</sup> Me'd jin dikina a'di e 'Kuwosh Set̄uun mo tani imancik a'di gwo pu'dkini a'di mo mmo/o gwo mo ka kwal is ki: Ṭor am gwo mo ma, kakasja sa/ mmina to yansani di mo? dhali ki jamas mii gi wakata mmina /e mpu'du/ mo dhali ki mii jin mina yil gi mony'ceshi di 'kup mo? <sup>4</sup> Dhala Yesus ki thok uni gwo mo ki: Hili ki 'bore/ mo ma, ki wathin 'dej kamu/ midi diki sus umi dheres mo. <sup>5</sup> Haali/ 'kwani tana ris kun mini iiyu/ ki gway pem mo mmo/o gwo mo ki: Aha/ tana Krist̄hos mo dhali uni mini sus tiya ka ris mmodheres mo. <sup>6</sup> Dhali um mini ciḳ gwo gom mo/as mo dhali gwo gom mo/as jin 'ce'du 'te/ mo. Hili mo mo ma ki um

mini dhalki is ki ko/ mo haali/ mii yansan a'di midi bu'th embul mo mo dhali hili 'pemen diki pu'd naskina/ mo be. <sup>7</sup> Haali/ kala kamu/ midi cu mis apo/ kala kamu/ mo dhali 'peŋkuman bampaŋ kamu/ midi cu mis apo/ 'peŋkuman bampaŋ kamu/ mo, dhali te/ midi di mo dhali mony'cesh midi yikin is ki mo ka ris mo be. <sup>8</sup> Aris to gwansan uni ta jasi montel 'pen gi isa nyor mo be.

<sup>9</sup> Yan'ko'd uni mini ci um mo ki um minu to'c bwa mo dhali dhu um mmowu mo. Dhali um minu shi/i e mo ka ris kal gi 'kwaniny'cesh mo gom gway pem mo be. <sup>10</sup> Dhali yan'ko'd 'kwanin tiya ka ris mini ye gwo is mo dhali waṭ tiya gway ka rem 'kup mo dhali shi/a ashim bwa i is ka rem 'kup mo be. <sup>11</sup> Dhali imanci gwonthus mini cu mis mo dhali sus 'kwani ka ris mmodheres mo be. <sup>12</sup> Dhali mo/en gi 'kwani ka ris mo tani mina isi mii ki dhadharmu'th mo haali/ aris tonthus kun 'coka'cok<sub>2</sub> mo tani markunu is kagahara mo be. <sup>13</sup> Hili a'di jin 'dimki 'kup mo ntagi'pemen mo tani a'di iminu woth mo be. <sup>14</sup> Dhali gwom 'borga/ gi Bampa/ gi Momis mo tani minu mii cika piye/ e mony'ceshi 'baar mo me'd gwo jin çinu gom kal gi 'kwaniny'ceshi 'baar mo, idhali yan'ko'd mo tani 'pemen midi pu'du/ mo be.

<sup>15</sup> Wakan ki um mini par a'di e mo mmodosha a'di e mo jin kogu mo a'di jin ta mii jin bulabul mo jin mina 'kwani ta'k is jwa mo tani a'di jin okin ma manci gwo ma Arumgimis kadhamo/ mo jin ta'da Dani/aal mo (Dhalka manden<sub>1</sub> gwo e mishi gwo 'ban mo). <sup>16</sup> Dhali yan'ko'd dhalki uni gwansan kun 'kon e Pa Yahuudiyya mini so 'kuwosh mo. <sup>17</sup> Dhalki a'di jin di'd e 'kuŋgu'b midi diki thul ka

'cesh mo mmogu toŋ kamu/ 'peni gu'b piti mo. 18 Dhali a'di jin di'd e bwam bunto mo midi diki doku/ ka nyaŋ'ko'd mmobu'th burrinyem pom piti mo be. 19 Dhali ayy/ayy/ayy gom uni gwansan kun bwaa uci mo dhali gom uni gwansan kun ci uci ako mmopi ka tee gwansan mo. 20 'Thoyi mo ma ki mosom bum mini 'taki 'koki ta mondit mo walla ka cim ma pesu/ mo. 21 Haali/ yan'ko'd adhan monto'c bwa midi di mo, gi ji wakan yisa di'da 'peni ka muŋ'kup gi mony'cesh mo ntagi shwanesan mo, yisa, dhali midi diki di ki sule/ sule/ mo be. 22 Dhali waŋki/ ka cim gwansan 'konuki 'taki 'koki 'cith bwa mo tani wathimpanj kamu/ si'da/ minu 'taki 'koki woth mo be. Hili haali/ gom gway gi uni gwansan kun kwanykunu mo ka tee gwansan mo tani a'di i'cithkunuwa cim bwa mo be. 23 Yan'ko'd waŋki/ jan 'deŋ kamu/ midi o um gwo mo ki: Hili mo mo ma, aKris̄thos a'dan mo be tani walla, a'di acittaan mo tani dhalku/ gwom piti ki gam is mo ma. 24 Haali/ iKris̄thos kun 'koki ta kuŋ gana/ walla imançι gwo kun 'koki ta kuŋ gana/ mo tani mini cu mis mo dhali ṭora dhan jamas mii mo dhala dhan momer mo. Wakan uni mini susa susi dheres mo ntagi uni kun kwanyu ki she/ mo waŋki/ a'di mishu mii mo be. 25 Hili mo mo ma, aha/ ṭora um gwo ntwa/a/ mo be. 26 Wakan waŋki/ uni mini o um gwo mo ki: Hili mo mo ma, a'di di'd e mombwaasho mo tani dhalku/ ki ii ka piye/ mo. Waŋki/ uni o um gwo mo ki: Hili mo mo ma, a'di di'd isi bwaman gu'b gana/ mo tani dhalku/ gwom piti ki gam is mo ma. 27 Haali/ me'da wara sho'k jin pu'dki'd 'peni mom'pesho'k mo dhali dhwa/a'd mo mo ntaga bora luŋgu'b mo

tani wakan a'di midi ta mo jin mina Ya/ gi 'Kwani ipu'du/ mo be. <sup>28</sup> E mo yin jin mina bunjwar isi di mo tani a'di mina korro/ itul 'kup mmontal 'de/ mo be.

### *Mo jin Mina Ya/ gi 'Kwani Doku/ mo*

<sup>29</sup> Dhali ki jahanne/ 'ko'di monto'c bwa ka tee gwansan mo tani atente/ midi dhurum mo mo dhali appe midi diki ci monkush piti mo dhali arisa cul mini ta'k 'peni momis mo dhali aris mom'bi'th kun 'kon e momis mo tani minu yikin is mo be. <sup>30</sup> Dhali yan'ko'd jamas mii gi Ya/ gi 'Kwani minu piyu/ mo 'peni momis mo, dhali yan'ko'd arisa wak gi 'kwaniny'cesh mini ko mo dhali uni mini par Ya/ gi 'Kwani e mo mmopu'du/ e bwaarak 'peni momis mo ki mom'bi'th mo dhali ki monyca ilu/ mo be. <sup>31</sup> Dhali a'di midi hash iman'doyu gwom piti ka dhana yuk gi cuuwa/ ma poome/ mo dhali uni mini tul unim piti is kun kwanykunu mo 'peni momis kun 'kona shem 'penabi idonon mo 'peni montel 'pen gi momis mo ntagi 'bana kamu/ mo be.

<sup>32</sup> Mishi gwo 'ban mo ma 'peni cwampu/ mo. Ki jahanne/ me'd jin lu/kina a'di abinycwalman piti jin 'ta'dama'ta'dam mo tani dhali lu/ jipim piti mo tani um ki mish gwo 'ban mo ki moyurantee 'dishi'd mo be. <sup>33</sup> Wakan si'dayi, ki um ki para ris to gwansan e mo tani um ki mish mo mo ki a'di 'disha'dish mo dhali a'di 'dishki'd hila/ mo e 'twaŋkal mo be. <sup>34</sup> Ka jinj gana/ aha/ ona um gwo mo ki 'kwani ma nyakum yil gwansan mini 'koki pe mo ntagi aris to gwansan mini bu'th mo mo be. <sup>35</sup> Momis dhali mony'cesh mini pe mo tani hili gwom pem mini 'koki pe mo be.

*Wathij̄ Kamu/ Yisa Mishi'da Tee mo dhali Mo  
mo*

<sup>36</sup> Hili ka tee caan mo dhali mo mo tani dina wathin 'de/ ki mish mo dhali iman'doyu gwo si'da/ kun 'kon e momis mo 'koki mish mo mo walla Ya/ si'da/, hili Ababa a'di 'de/ mo be. <sup>37</sup> Me'da tee ma Nuuh mo tani wakan si'da/ mina Ya/ gi 'Kwani pu'du/ mo be. <sup>38</sup> Haali/ ka tee gwansan itwa/a/ ka gannu/ yi'de/ mo tani uni 'kokin mo mmoshwa to mo dhali mmopi to mo dhali mmomash mo dhali mmoçiya ci mmomash mo ntaga tee ma Nuuh jin jithirkina a'di mo e bwam ma kur mo be. <sup>39</sup> Dhali uni 'koki mish mo mo ntaga gannu/ yi'de/ pu'dki'd mo dhali dhi'th uni 'baar sho'k mo. Dhali wakan mina Ya/ gi 'Kwani pu'du/ mo be. <sup>40</sup> Dhali yan'ko'd 'kwaniq gwasi su/ mini 'ko mo e bwam bunto mo. Dhali jan 'de/ minu bu'th mo be dhali jan kamu/ minu dhalku/ mo be. <sup>41</sup> Up mini 'ko isu/ mo si'da/ kun mini yor to ayo mo. Dhali jan 'de/ minu bu'th mo be dhali jan kamu/ minu dhalku/ mo be. <sup>42</sup> Timi mo mo ma wakan, haali/ um 'koki mish mo mo atee jin mina Tapam bumi yayu/ mo be. <sup>43</sup> Hili mishi yaase mo ma, wałki/ com gu'b midi 'taki misha cim jin mina wathin 'di/ 'taki yayu/ mon'thiny mo dhali kwal to mo tani a'di midi 'taki tim mo mo dhali midi 'taki diki dhal gu'b piti mo ki a'di minu 'taki 'koki 'ce'd mo be. <sup>44</sup> Wakan um si'da/ mini mii thoson is mo haali/ Ya/ gi 'Kwani midi pu'du/ ki mo jin mina umi 'taki 'koki ḥosh mo.

*Ciŋkina/jin Tajin Gana/ mo dhali Ciŋkina/jin Diki  
Tajin Gana/ mo*

<sup>45</sup> Kaja a'di jin ta isin gana/ mo dhali jin ta ciŋkina/ jin yukayuk moye? A'di, jin mina tapam

piti kar a'di tapa apo/ gu'b piti mo mmoci unim  
 piti tonte/ ka tenten gana/ mo? <sup>46</sup> Mom'bor mii  
 'te/ ba/ gom ciŋkina/ caan, a'di jin mina tapam piti  
 pu'du/ mo mmogam mo ki a'di di'd mmomii kan  
 mo be. <sup>47</sup> Ka jin gana/ aha/ ona um gwo mo ki a'di  
 midi kar a'di ari tapa apo/ aris tom piti jin tana  
 a'di mo be. <sup>48</sup> Hili wakki/ ciŋkina/ caan jin ta thus  
 ki thus mo o gwo mo e is piti mo ki: Tapam pem  
 tayi'da diite/ mo be <sup>49</sup> dhali yan'ko'd a'di ki tel mii  
 'pen mo mmodor igarr piti kun nyakka a'di atu'c  
 mii mo dhali shwa to mo dhali pi to mo nyakki uni  
 gun 'kosh ma su mo tan <sup>50</sup> dhali tapa gi ciŋkina/  
 midi pu'du/ mo ka tee jin dina a'di ki tosh ki a'di  
 midi 'taki pu'du/ mo dhali ki mo jin dina a'di ki  
 mish mo mo be. <sup>51</sup> Dhali a'di midi ci a'diya jisa mo  
 dhali a'di midi kar a'di nyakki uni gun tana he'k e  
 ka he'k e mo. Dhali e mun mo tan a'di ta mo jin  
 mina 'kwani 'pe'd shem buni mo be.

## 25

### *Gwom 'Bi'th/e gom Nyaran 'Kume'd mo*

<sup>1</sup> Yan'ko'd Bampa/ gi Momis minu kar ka  
 par 'ban ki nyara/ kun 'koni 'kume'd mo kun  
 kalkina lambam buni mo dhali ii mo mmorak  
 wathinya'b mbway mo be. <sup>2</sup> Dhali unin tiya kun  
 'koni mudhe'd mo tan uni ta pus mo dhali kun  
 'koni mudhe'd mo tan uni yukayuk mo be. <sup>3</sup> Haali/  
 uni gun ta pus ki pus mo kalkina lambam buni mo  
 tan uni 'koki ƙala yini nyakki uni mo. <sup>4</sup> Hili uni  
 gun yukayuk mo ƙalki tura/ yin nyakka lambam  
 buni mo be. <sup>5</sup> Me'd jin tayina wathinya'a'ba diite/  
 mo tan uni 'baar mo ƙo'da e is mo dhali ish e mo

be. <sup>6</sup> Hili ki mombwam/en gana/ mo tani cuuwa/ cuuyunu mo ki: Hili mo mo ma. Wathinyaña'b a'dan be. Iiyu/ ka piye/ mo mmorak a'di mbway mo. <sup>7</sup> Dhali yan'ko'd aris nyara/ gwansan uni cuki mis mo dhali dhitha lambam buni is mo be. <sup>8</sup> Dhali uni kun ta pus ki pus mo ki o uni gun yukayuk gwo mo ki: Çiyi aman ara yin bum mo ma haali/ alambam bam mur ma yini ku'th mo be. <sup>9</sup> Hili uni gun yukayuk thok uni gwo mo ki: Wariba/ a'di si'da/ midi diki mii 'kosh jwa mo gom am mo dhali gom um mo. Ba dhali mii e i is mo dhali ii mo e imanyol to mo dhali yolu a'di gom is bum mo. <sup>10</sup> Dhali ki uni 'kokin mo mmo/ii mo mmoyol mo tani wathinyaña'b pu'dki'd mo dhali uni gwansan kun 'kokin mo mmothoson is mo tani uni iiki bway bwanj gu'b mo nyakki a'di mo e mo ma yuk gi momiimash mo. Dhali acampur mu'thkunu mo be. <sup>11</sup> Dhali yan'ko'd nyaran tiya uni pu'dkin mo si'da/ mmo/o gwo mo ki: Tapa Tapa, ka'dki aman gu'b mo ma. <sup>12</sup> Hili a'di thok uni gwo mo ki: Ka jin̄ gana/ aha/ tora um gwo mo ki: Aha/ mola um mo be. <sup>13</sup> Wakan timi mo mo ma haali/ um moli mo mo walla cim mo walla mo mo be.

### *Gwom 'Bi'th/e gom Kuluny 'Dolkon mo*

<sup>14</sup> Haali/ a'di mina e waki wathi/ jin ya ya yilkina/ e bampañ kamu/ jin si'dasi'd mo dhali a'di ki yuk çin̄kinam piti mo dhali a'di ki ci uni tom piti mo be. <sup>15</sup> Dhali e jan 'de/ mo tani a'di ki ci a'di adhan kuluny 'dolkoni mudhe'd mo dhali e jan kamu/ tani a'di ki ci a'di adhan kuluny 'dolkoni su/ mo dhali e jan kamu/ mo tani a'di ki ci a'di adhan kuluny 'dolkoni 'de/ mo, e uni ka 'detē/ 'detē/

mo me'd isi to kun misha uni mii mo be. Dhali yan'ko'd a'di ki ya mo be. <sup>16</sup> A'di jin bu'thki adhan kuluny'dolkoni mudhe'd mo tani a'di yaki'd mo ki jahanne/ mo dhali yol to ki uni mo dhali a'di ki ta/ a'di mo mmota adhan kuluny'dolkoni mudhe'd ki nyanye/ mo be. <sup>17</sup> Wakan si'da/ a'di jin ta'd gi dhan kuluny'dolkoni su/ mo tani a'di ki ta/ a'di mo dok/ e mmota adhan kuluny'dolkoni su/ ki nyanye/ mo be. <sup>18</sup> Hili a'di jin bu'thki adhan kuluny'dolkoni 'de/ mo tani a'di yaki'd mo dhali ćwany jisa 'cesh mo dhali ba/a guurush gi tapam piti mo be. <sup>19</sup> Dhali yan'ko'd mmosi'dkina tapam buni ća'b'ko'd ki si'd mo tani tapa gi ćinkina/ gwansan a'di pu'dki'd mo dhali thoson gwo gom ton deñ nyakki uni mo be. <sup>20</sup> Dhali a'di jin bu'thki adhan kuluny'dolkoni mudhe'd mo tani pu'dki'd kadhoñ mo mmokal adhan kuluny'dolkoni mudhe'd ki nyanye/ mo mmo/o gwo mo ki: Tapa, / e ćiki aha/ adhan kuluny'dolkoni mudhe'd mo tani aha/ miikina to mmota/ uni mmota adhan kuluny'dolkoni mudhe'd ki nyanye/ mmahan mo be. <sup>21</sup> Dhali tapam piti ki o a'di gwo mo ki: Mba/ ća/. / E ta ćinkina/ jin 'boro'd mo dhali jin ta isinj gana/ mo be. /E ta a'di jin ta isinj gana/ apo/ ushi to kun gwa'dan mo. Aha/ mina kar /e apowa ris to ki nyanye/ mo. Huri /e mo 'te/ ma e moñ'kuny bwa gi tapam pini mo. <sup>22</sup> Dhali a'di si'da/ jin ta'd gi dhan kuluny'dolkoni su/ mo pu'dki'd kadhoñ mo mmo/o gwo mo ki: Tapa, /e ćiki aha/ adhan kuluny'dolkoni su/ mo. Aha/ miikina to ki uni mo dhali ta/ adhan kuluny'dolkoni su/ ki nyanye/ mmahan mo be. <sup>23</sup> Dhali tapam piti ki o a'di gwo mo ki: Mba/ ća/. /E ta ćinkina/ jin 'boro'd mo dhali jin ta isinj

gana/ mo. /E ta a'di jin ta isiq gana/ apo/ ushi to kun gwa'dan mo. Aha/ mina kar /e apowa ris to ki nyanye/ mo. Huri /e mo 'te/ ma e moŋ'kuny bwa gi tapam pini mo. <sup>24</sup> A'di si'da/ jin bu'thki adhan kuluny'dolkoni 'de/ mo pu'dki'd kadhoŋ mo mmo/ o gwo mo ki: Tapa, aha/ misha ki /e ta wathi/ jin çinthira çinthir mo haali/ /e 'cithi to jin dina /e ki si mo dhali tul to is jin dina /e ki 'dash mo. <sup>25</sup> Wakan aha/ ko/ka is mo dhali aha/ yakina mo dhali ba'k adhan kuluny'dolkon pini eya 'cesh mo. Dhali a'di a'dan be. Guyi a'di jin ta jim pini mo ma. <sup>26</sup> Hili tapam piti ki thok a'di gwo mo ki: /E ta thus ki thus mo dhali /e ta çinkina/ jin ta'da piny is ka piny is mo. /E mishkin ki aha/ tana man'cith to jin dika/ ki si mo? dhali tul a'di jin dika/ ki 'dash is mowa? <sup>27</sup> Dhali yan'ko'd /e ka ba/ mini 'taki dhuka guurush pem mo e imandhuwa guurush mo dhali ki yampu'd pem jin migi/ 'taki bu'th a'di jin ta jim pem gana/ mo dhali nyunycinam piti mo be. <sup>28</sup> Wakan buthi adhan kuluny'dolkon 'peni a'di mo ma dhali çiki a'di jin ta'd gi dhan kuluny'dolkoni 'kume'd mo. <sup>29</sup> Haali/ aris uni ka 'dete/ 'dete/ kun ta gi to mo tani minu ci to ki nyanye/ mo dhali uni mini ta gi to kun mini ur 'kup mo. Hili 'peni a'di jin dara'd mo tani hili a'di jin tana a'di mo tani minu bu'th 'peni a'di mo be. <sup>30</sup> Dhali bu'th çinkina/ jin ush me'd ki 'tash mo dhali bič a'di mo e mo jin ta'da 'tum ka 'tum mo. Dhali e mo yin mo tani a'di ita mo jin mina 'kwani 'pe'd shem buni mo be.

*Mom'bor Mii dhali 'Kwani kun Jeenu mo*

<sup>31</sup> Ki Ya/ gi 'Kwani midi pu'du/ mo e monycam piti mo tani dhali ka ris iman'doyu gwom piti ilu/ mo tani dhali yan'ko'd a'di midi çä'b apowa kursim piti gi monyca mo be. <sup>32</sup> Aris kal gi 'kwaniny'ceshi 'baar mo minu tul isi bwambori a'di mo, dhali a'di midi kwa/ uni bwa mo 'peni tiyan tiya mo me'd jin kwa/ ma manhil kaarbal kaarbal bwa mo 'peni mi mo be. <sup>33</sup> Dhali a'di midi dhu kaarbal ki me'da bim poros piti mo, hili mi mina a'di dhu ki me'da cam piti mo be. <sup>34</sup> Dhali yan'ko'd aMalik midi o uni gwansan kun 'kon ki me'da bim poros piti gwo mo ki: Iiyu/ mo ma, ayy um kun 'bor ma Ababa mii mo mmogam mal gi Bampa/ gi Momis jin thosonkunu mo gom um mo 'peni mo jin kaarbkunuwa 'cesh sho'k mo be. <sup>35</sup> Haali/ me'd jin 'kosha te/ aha/ mo tani dhali um ki ci aha/ ton te/ mo. Dhali ki aha/ butha yi'de/ mo tani dhali um ki ci aha/ yi'de/ mmopi mo. Dhali ki aha/ yana ya yilkina/ mo tani dhali um hanki aha/ mo be. <sup>36</sup> Dhali ki aha/ dina is 'te/ mo tani dhali um hi'thki aha/ burrinye/ i is mo. Dhali ki aha/ 'ba'thkina mo tani dhali um iiyini buti aha/ mo. Dhali ki aha/ dina eya sijin mo tani dhali um pu'dkini aha/ mo be. <sup>37</sup> Dhali yan'ko'd uni kun ta kuñ kar/e mini thok a'di gwo mo ki: Tapa, kakasjana mparkina aman /e e mo mmo'kosha te/ /e mo dhali mmoci /e ton te/ mo? walla butha yi'de/ /e mo dhali aman ki ci /e a'di mmopi mo? <sup>38</sup> Dhali kakasja mparkina aman /e e mo mmoya ya yilkina/ mo dhali aman ki han /e mo? walla dina /e is 'te/ mo dhali aman ki hi'th /e burrinye/ i is mo? <sup>39</sup> Dhali kakasja mparkina aman /e e mo mmo'ba'th mo walla dina /e eya sijin mo dhali aman ki buti /e mo? <sup>40</sup> Dhali aMalik

ki thok̄ uni gwo mo ki: Ka jin̄ gana/ aha/ tora um gwo mo ki: Me'd jin miina um a'di gom a'din 'deñ kamu/ jin̄ pisi'd mo 'peni ushi uni gwansan kun tana wał̄ pem mo tani um miiki a'di gom aha/ mo be. <sup>41</sup> Dhali yan'ko'd a'di midi o uni gwansan gwo mo kun 'kon ki me'da cam piti ki: Iiku/ 'peni aha/ mo ma, um kun jeekunu mo e mo ma al o'd jin̄ midi diki us ki sule/ sule/ mo, a'di jin̄ thosonkunu mo gom tapa ma ruma 'cesh mo dhali iman'doyu gwon thus piti mo be. <sup>42</sup> Haali/ aha/ 'kosha te/ mo ka jin̄ gana/ dhali um 'koki ci aha/ tonte/ mo, dhali aha/ butha yi'de/ ka jin̄ gana/ mo dhali um 'koki ci aha/ yi'de/ mmopi mo be. <sup>43</sup> Dhali aha/ ka jin̄ gana/ yana ya yilkina/ mo tani dhali um 'koki han aha/ mo. Dhali aha/ dina is 'te/ mo tani um 'koki hi'th aha/ burrinye/ i is mo be. Dhali ki aha/ 'batha mo tani dhali di eya sijin mo tani um 'koki buti aha/ mo be. <sup>44</sup> Dhali yan'ko'd si'da/ uni mini thok̄ gwo mo ki: Tapa, kakasjana mparkina aman /e e mo mmo'kosha te/ /e mo walla butha yi'de/ /e mo walla ya ya yilkina/ mo walla di is 'te/ mo walla 'ba'th mo walla di eya sijin mo dhali 'kona aman ki mii to gom /e mo? <sup>45</sup> Dhali yan'ko'd a'di midi thok̄ uni gwo mo ki: Ka jin̄ gana/ aha/ tora um gwo mo ki: Me'd jin̄ 'kona um ki mii a'di gom jan tal 'deñ kamu/ 'peni uni gwansan kun pisin mo tani um 'koki mii a'di gom aha/ mo be. <sup>46</sup> Dhali uni mini ii mo e mo jin̄ 'konu ki mii 'ba/ ki sule/ mo, hili uni kun miin ka ɺar/e mo tani mini ciç mo e mon'koki/ e ki sule/ sule/ ya ye 'ba/ mo be.

## 26

*Imanshu 'Kwani Bway Miikina Wu'th apowa*

***Yesus mo***

<sup>1</sup> Ka Yesus 'baarki'da ris gwo gwansan mmo/o mo tani a'di ki o imancik a'di gwo gwo mo ki: <sup>2</sup> Um mishi mo mo ki 'ko'da cim su/ mo tani a'di ta'da cim ki Mompe'kupanyolos midi pu'du/mo dhali Ya/ gi 'Kwani minu ci mo mmo'kosh ki cwany'cithan dhul mo be.

<sup>3</sup> Dhali igasiis kun can dhali 'kwani gwanyjak/a/gi 'kwani mo uni mini tul is mo mmontal 'de/ mo e bwaagon ma gasiis jin ca'd mo a'di jin yukkanu gway ka Kayaapa mo be. <sup>4</sup> Dhali uni gamki 'twa/'kup mo mmontal 'de/ mo mmobutha Yesus ki kup mo dhali mmo'kosh a'di jwa mo be. <sup>5</sup> Hili uni o gwo mo ki: Yisa ka cim jin yukanwa yukan mo yisa, hili isi ciki/ haali/ adulatt midi di mo e bwaj 'kwani mo be.

***Yesus A'di 'Koshkunu Is ka Yina Pi'dnañ Gana/ mo e Pam Beetaniya mo be***

<sup>6</sup> Dhali ka Yesus di'd e Pam Beetaniya e gu'b ma Simaan jin ta gi monthus mo tani <sup>7</sup> a'boma kamu/pu'dki'di a'di mo, a'di jin ta'd gi turaj gasaas jin ta gi kush mo, a'di jin dim ma yina pi'dnañ gana/nycine/ jin 'bitha yol she/ ki 'bi'th mo. Dhala yim ki wol a'di e 'kup piti mo me'd jin dikina a'di eya tharabeesa mo be. <sup>8</sup> Hili ki imancik a'di gwo parki a'di e mo tani uni dek ma nyor mo mmo/o gwo mo ki: Atinta shinu yansan isa 'cesh kan mo? <sup>9</sup> Haali/ ayina pi'dna/ yansan minu 'taki yol ka guurush ki nyanye/ mo dhali ci 'kwani kun hatha'ko'd mo be. <sup>10</sup> Hila Yesus ki tor mii yansan ki e mo dhali o uni gwo mo ki: Atinta toca uma 'bom 'kus kan mo? Haali/ ayim mii tony jaro/ gom aha/ mo be. <sup>11</sup> Haali/ um isa yempa/ tan gi 'kwani

kun hatha'ko'd kun 'kon e um mo. Hili um mini 'koki ta gi aha/ ki sule/ mo be. <sup>12</sup> Mmowoluwa yina pi'dna/yansan e bungwar is pem mo tani ayim ki mii a'di mmothoson a'di gom aha/ gam kan jin minu kan aha/ mo be. <sup>13</sup> Ka jin̄ gana/ aha/ ḥora um gwo mo ki: E mo yin jin minu ci gwom 'borga/ yan e mony'ceshi 'baar mo tani a'di jin miin ma yim mo tani minu ḥor mo mmoneyon mo mo mmoka ayim e mo be.

*Yahuusa A'di Gamki Gwo Me'd mo Mmo'citha/  
Yesus Is ki Gwo mo*

<sup>14</sup> Dhali yan'ko'd jan ṭal 'den kamu/ 'peni uni jin 'dap uni 'twa/ ka 'kume'd i'ce'dka su/ mo jin yuku gway ka Yahuusa Iskariyuuti mo tani a'di yaki'd mo e igasiis kun can mo be <sup>15</sup> dhali o gwo mo ki: Atinta mmina umi ci aha/ mo wakki/ aha/ mina ci a'di ki um mo? Dhali uni ki ci a'di gabul 'dolkon kushi iss 'de/ i'ce'dka 'kume'd mo be. <sup>16</sup> Dhali 'peni mo ćaan ki jahanne/ mo tani a'di cōrki'da ćor mo mmogam embul gana/ mo mmo'cith a'di is ki gwo mo be.

*Yesus Shwaki Tonte/ jin̄ 'Ko'd Nyakki Imancik  
A'di Gwo mo*

<sup>17</sup> Dhali ka cim jin ṭwa/a/ gi Maanjkuthu'd jin minu ki dar ga cumaṭ mo tani imancik gwo pu'dkina Yesus mo mmo/o gwo mo ki: Mana o /e bwa jin mina amani thoson to mo gom /e mo mmoshwa ki Mompe'kupanyolos mo? <sup>18</sup> A'di ki o uni gwo mo ki: Iiku/ mo e 'peñkuman bampa/ mo dhali e jan 'deñ kamu/ mo dhali o a'di gwo mo ki: Amantor gwo o gwo mo ki: Mom pem 'dishi'd mo hila/. Aha/ mina mii rash di ki Mompe'kupanyolos yan e gu'b pini nyakki imancik aha/ gwo mo be. <sup>19</sup> Dhali

imancik a'di gwo miikin mo me'd jin kankin ma  
Jesus uni gwo mo, dhali uni ki thoson to mo gom  
Mompe'kupanyolos mo be.

<sup>20</sup> Dhali ki mo ta mom'pimpili/ mo tani a'di  
ça'bki'da tharabeeza nyakki imancik a'di gwo mo  
kun 'konj 'kume'd i'ce'dka su/ mo be. <sup>21</sup> Dhali ki  
uni 'kokin mo mmoshwa to mo tani a'di ki o uni  
gwo mo ki: Ka jin gana/ aha/ tora um gwo mo ki  
jan 'de/ 'peni um midi 'cith aha/ is ki gwo mo be.

<sup>22</sup> Dhali uni 'kokina bwa mmodit mo kagahara,  
dhali uni ki tel mii 'pen mo mmo/o a'di gwo mo  
ka rem 'kup ka bath 'pen mo ki: Aha/ 'taa? Tapa.

<sup>23</sup> Dhali a'di ki thok gwo mo ki: A'di jin 'thupki  
me'd piti eya sahan nyakki aha/ mo tani a'di midi  
'cith aha/ is ki gwo mo be. <sup>24</sup> Haali/ Ya/ gi 'Kwani  
yaki'd mo me'd gwo jin 'kwarkunu mo gom a'di  
mo, hili wayyi e wathi/ yan a'di jin midi 'cith Ya/  
gi 'Kwani is ki gwo mo. A'di midi 'taki 'bor ki 'bor  
gana/ mo gom wathi/ yan wakki/ a'di minu 'taki  
'koki dhodhu/ mo be. <sup>25</sup> Yahuusa be a'di jin 'cithki  
a'di is ki gwo mo a'di ki o a'di gwo mo ki: A/aha/  
'taa, Tapa? A'di ki thok a'di gwo mo ki: /E oki a'di  
wakan si'da/ mo be.

<sup>26</sup> Dhali me'd jin 'kokina uni mmoshwa tonṭe/  
mo tani Jesus bu'thki maanjkuthu'd mo dhali 'bora  
'bor bwa i is mo, dhali a'di ki 'ce'd a'di mo dhali  
ci a'di ki imancik a'di gwo mo dhali o gwo mo ki:  
Buthi a'di mo ma, dhali 'kayi mo ma. A'di yansan  
ita bunjwar is pem mo be. <sup>27</sup> Dhali a'di bu'thki'da  
kubbaaya mo dhali ki a'di ciki mom'bor bwa i is  
mo tani a'di ki ci a'di ki uni mo mmo/o gwo mo  
ki: Piyi a'di mo ma, aris umi 'baar mo, <sup>28</sup> haali/  
a'di yansan ita'da bas pem ki gwo jin gamu me'd

mo, a'di jin wolki'd ka pije/ mo gom 'kwani ka ris  
 mo gom mogwama gwam gom miinthus mo be.  
<sup>29</sup> Aha/ ṭora um gwo mo ki aha/ mina diki dok/e  
 pi yiman maman cwa yansan ki sule/ ntaga tee jin  
 migā/ pi a'di jin ta jin this nyakki um e Bampa/ ma  
 Ababam pem jin di'd e momis mo be.

*Mo jin Wat ma Buterusa Yesus Gway A'di Torkunu  
 Itwa/a/ mo*

<sup>30</sup> Dhali ki uni yuḳki gway mo tani uni iikin  
 ka pije/ mo e 'Kuwosh Setuun mo be. <sup>31</sup> Yan'ko'd  
 aYesus ki o uni gwo mo ki: Umi 'baar mo mini  
 ta'k mo gom aha/ mon'thiny yan shwane/ mo tani  
 haali/ a'di 'kwarkunu mo ki: Aha/ mina 'kosha  
 manhil ḷa'bal mo dhali ḷa'bal 'pena ma'diny piti  
 mo tani uni minu ćeker bwa mo be. <sup>32</sup> Hili n'ko'd  
 mo tani ki aha/ piyunu/ mo tani aha/ mina ya um  
 itwa/a/ e Pany Jaliil mo be. <sup>33</sup> Dhala Buterus ki ṭor  
 a'di gwo mo eya tente/ ki: Ba uni gwansani 'baar  
 mo mini ta'k mo gom /e mo tani aha/ mina diki biṭ  
 ki sule/ mo be. <sup>34</sup> Dhala Yesus ki o a'di gwo mo  
 ki: Ka jin̄ gana/ aha/ ṭora /e gwo mo ki mon'thiny  
 yansan shwane/ mo ntwa/a/ ka dhoṇgola ḷwa diki  
 ko e naskina/ mo tani /e mini waṭaa/ gway me'di  
 kwara mo be. <sup>35</sup> Dhala Buterus thok a'di gwo mo  
 ki: Hili wakki/ aha/ mina mii wu mo nyakki /e mo  
 tani aha/ mina diki waṭ/e gway mo. Dhali imancik  
 a'di gwo 'baar mo o gwo wakasan mo be.

*Yesus 'Thoki'd e Monsinu jin Ta Bwaagoj ma  
 Jathsemaani mo*

<sup>36</sup> Dhali yan'ko'd aYesus yaki'd nyakki uni mo  
 e mo jin yuḳu ka Jathsemaani mo dhali a'di ki o  
 imancik a'di gwo gwo mo ki: 'Koyi mmahan mo

ma ki aha/ mina thoth is mo mmattaan dhali 'tho  
 mo be. <sup>37</sup> Dhali a'di ki susa Buterus nyakki a'di  
 mo dhali iya/ ma Sabadi isu/ mo, dhali a'di telki  
 mii 'pen mo mmokal bwan dit'i'd mo dhali bwa jin  
 toco'd mo be. <sup>38</sup> Dhali yan'ko'd a'di ki o uni gwo  
 mo ki: Akashiram pem a'di diṭa bwa ki diṭ kagahara  
 mo gom mowu mo. 'Koyi mmahan mo ma, dhali  
 timi nyakki aha/ mo ma. <sup>39</sup> Dhali mmoothothkina  
 a'di 'peny'ce ari'ceenne/ mo tani a'di bitki bwam/  
 em piti a'cesh mo dhali 'tho mo ki: Ababam pem,  
 wakki/ a'di yan mishu mii mo tani dhalka kubbaaya  
 yan ya'di pe aha/ mo ma. Bahili a'di jin oyaa/ bwa  
 mo yisa. Hili a'di jin ta bwam pini mo be. <sup>40</sup> Dhali  
 a'di pu'dki'd e imancik a'di gwo mo dhali gam uni  
 ki uni ishki e mo. Dhali a'di ki owa Buterus gwo  
 mo ki: A/um bunya/ mini 'koki tim nyakki aha/  
 ka tente/ 'de/ mo? <sup>41</sup> Timi mo mo ma, dhali 'thoyi  
 mo ma, ki um mini 'taki 'koki ciç mo e mo jin  
 palu mo, haali/ shi/in ka jin gana/ mo tani a'di ona  
 bwa mo, hili bungwar is a'di ihatha'ko'd ki ha'th  
 mo be. <sup>42</sup> Dok/ e gom me'd jin 'ko a'di isu/ mo  
 tani a'di yaki'd mo dhali 'tho mo ki: Ababam pem,  
 wakki/ a'di yan mol pe mo tani hili isi ciki/ aha/  
 mina pi a'di mo, dhalki a'di jin ta bwam pini mo  
 tani dhalki a'di miinu mo ma. <sup>43</sup> Dhali dok/e a'di  
 pu'dki'd mo dhali gam uni ki uni ishki e mo haali/  
 em buni to'dki uni is mo be. <sup>44</sup> Wakan a'di dhalki  
 uni mo dok/e dhali a'di ki ya mo dhali 'tho mo gom  
 me'di kwara mo mmo/o jasi gwon tal 'de/ mo be.  
<sup>45</sup> Dhali yan'ko'd a'di pu'dki'd mo e imancik a'di  
 gwo mo dhali o uni gwo mo ki: A/um 'kon mmo/  
 ish e kan mo? dhali bu'th mosi/is bum mo? Hili  
 mo mo ma, mo pu'dki'd mo hila/ mo dhali Ya/ gi

'Kwani 'cithkunu is ki gwo mo e me'd gi 'kwani kun ta imanmii miinthus mo be. <sup>46</sup> Cuyi mis mo ma. Dhalki ana iina mo. Hili, a'di jin 'cithki aha/ is ki gwo mo tani a'di pu'dki'd mo be.

*Mo jin 'Cithuwa Yesus Is ki Gwo mo dhali Mo gi Budhu A'di mo*

<sup>47</sup> Ki a'di di'd mo mmo/o gwo naskina/ mo tani Yahuusa pu'dki'd mo, a'di jin 'dap tiya 'twa/ ka 'kume'd i'ce'dka su/ mo, dhali nyakki a'di mo tani dhana waambuhany 'kwani pu'dkin ki gandala turga/ mme'd mo dhali cwa mo, 'peni igasiis kun can mo dhali 'kwaniŋ gwanyjaka/ gi 'kwani mo be. <sup>48</sup> Dhali a'di jin 'cithki a'di is ki gwo mo ciki uni jamas mii mo mmo/o gwo mo ki: A'din 'de/ jin miga/ pi 'twa/ mo tani ta wathi/ mo. Buthi a'di mo ma. <sup>49</sup> Dhali a'di pu'dki'da Yesus ki jahanne/ mo dhali o gwo mo ki: Hayy, Tapa. Dhali a'di ki pi a'di 'twa/ mo be. <sup>50</sup> Yesus ki o a'di gwo mo ki: Akam pem, /e miina ta mmahan mo? Dhali yan'ko'd uni ki pu'du/ i a'di mo dhali dhu me'd buni apowa Yesus mo dhali bu'th a'di mo be. <sup>51</sup> Dhali hili jan 'de/ 'peni uni gwansan jin nyak di ka Yesus mo tani a'di he'thi me'd piti mo dhali buk gandala turgam piti mo dhali ruthun cinkina/ ma gasiis jin ca'd mo dhali 'cith 'cem piti mo be. <sup>52</sup> Dhali yan'ko'd Yesus ki o a'di gwo mo ki: Dwari gandala turgam pini ka nyan'ko'd e mom piti mo ma, haali/ aris uni gwansani 'baar mo kun kalki gandala turga/ mo tani minu 'ce'd sho'k ki gandala turga/ mo be. <sup>53</sup> A/tosha /e ki aha/ mina mol Ababam pem 'tho mo dhali a'di ki ci aha/ ki jahanne/ awaambuhany iman'doyu gwom piti ka ris mo mmo'koki 'ko jasi

'kume'd i'ce'dka su/ mo? <sup>54</sup> Hili bakataye ki Gwo ma Arumgimis minu 'taki thim mo ki a'di minu mii mii wakan mo be. <sup>55</sup> Dhali ki mo yan mo tani aYesus ki owa waambuhany 'kwani gwo mo ki: Um iiyin ka pije/ ki gandala turga/ mme'd mo dhali ki cwa mo mmobu'th aha/ mmohabus mo me'd wathin 'di/ mo. Ka tee kun bathani 'ko'd mo tani aha/ dikina mo e gu'b gi mondheleladhelel mo mmotor gwo mo dhali um 'koki bu'th aha/ mo be. <sup>56</sup> Hili aris to gwansani 'baar mo tani uni bu'thki embul mo mo, ki Gwo ma Arumgimis kun 'kwarkina imançι gwo ma Arumgimis kadhamo/ mo minu mii thim mo be. Dhali yan'ko'd aris imancik a'di gwo uni dhalki a'di 'pen mo dhali so mo be.

*Yesus Doshki'd e Bwambor Montul Is gi 'Kwani  
Yahuuda/ mo*

<sup>57</sup> Dhali yan'ko'd uni gwansan kun bu'thkina Yesus mo tani uni ki sus a'di eya Kayaapa jin ta'da gasiis jin ca'd mo e mo jin tulkina iman'kwar to is mo dhali 'kwani gwanyjaka/ si'da/ mo be. <sup>58</sup> Hila Buterus bathki a'di nsho'k isa dhana/ mo ntagi mo gi bwaagon ma gasiis jin ca'd mo. Dhali a'di ki seyu bwaman mo. Dhali a'di ki nyak ç'a'b ki uni kun hili mo mo mmopar 'pemen gwo e mo be. <sup>59</sup> Dhali igasiis kun can dhali aris uni 'baar mo gi montul is yan mo tani uni njapki gwonthus mo mmo'ce'da Yesusa po/ mo, ki uni mini 'taki kar a'di mmowu mo be. <sup>60</sup> Hili uni 'koki gam tonthusa 'de/ mo, bahili aris iman/o gwonthus apo/ a'di mo tani uni pu'dkin kadhoŋ mo. N'ko'd uni su/ pu'dkin kadhoŋ mo <sup>61</sup> dhali o gwo mo ki: Agarr yansan o gwo mo ki: Aha/ misha mmo'ce'd gu'b gi

mondheleladhelel ma Arumgimis sho'k mo dhali nyaŋ a'di ka cim kwara mo be. <sup>62</sup> Dhala gasiis jin ca'd a'di doshki'd ki mis mo dhali o gwo mo ki: Ayy, /e moli 'twan̄ kamu/ 'de'k mo? Gwo wakata ona 'kwani gwansan apo/ /e mo? <sup>63</sup> Hila Yesus ca'bki'd ki shwam mo. Dhala gasiis jin ca'd ki o a'di gwo mo ki: Aha/ kana /e gwo ka Arumgimis jin di ki e mo. Ba ṭor am gwo mo ma, wakki/ /e tana Kristhos mo, a'di jin ta Ya/ ma Arumgimis mo. <sup>64</sup> AYesus ki o a'di gwo mo ki: A'di ta gwo jin ona /e si'da/ mo be. Hili aha/ mina ṭor /e a'di 'peni shwane/ mo, /e mini par Ya/ gi 'Kwani e mo mmoça'b ki me'da bim poros ki mom'bi'th mo dhali mmoyayu/ e bwaarak'peni momis mo be. <sup>65</sup> Dhali yan'ko'd agasiis jin ca'd dherki burrinyem piti bwa mo dhali o gwo mo ki: A'di walki gwo sor jin shi/ ashi/ mo. Atinta 'kokina ana mmonjap gwo mo mmo/o apo/ a'di mo? Um cikki gwo sor 'peni 'twam piti shwane/ mo be. <sup>66</sup> Gwom bum jin ṭosha um wakata mo? Uni thok gwo mo ki: A'di ha me'd mo mmowu mo be. <sup>67</sup> Dhali yan'ko'd uni ki 'tak a'di manya/ e bwam/ em piti mo dhali dor a'di mo dhali kun tiya ki dor a'di ki cwa mo <sup>68</sup> mmo/o gwo mo ki: Oyi am gwo is mo ma, /e jin tana Kristhos mo. Kaja 'dunn idorki / e kan mo?

### *Buterus Watki'da Yesus Gway mo*

<sup>69</sup> Dhala Buterus a'di ca'bki'da pije/ e bwaman ma gon̄ mo. Dhali ari nyarany ciŋkina/ pu'dki'di a'di mo dhali o a'di gwo mo ki: /E si'da/, /e nyakki di ka Yesus gi Pany Jaliil mo be. <sup>70</sup> Hili a'di watki gwo mo mbwambori uni 'baar mo mmo/o gwo mo ki: Aha/ dinaki mish 'pemen gwom pini yan jin

ona /e mo be. <sup>71</sup> Dhali ki a'di yaki'd mo ka piye/ eya lambalany gu'b mo tani ari ciŋkina/ nyaranj kamu/ parki a'di e mo dhala yim ki o uni gwansan gwo kun doshkina piye/ ki: Wathi/ yansan nyak di ka Yesus gi Pa Naasira mo be. <sup>72</sup> Dhali yan'ko'd dok/e a'di wat̄ki gwo mo ki gwo mmoṭe gwo mo ki: Aha/ dinaki mish wathi/ yan mo be. <sup>73</sup> Yan'ko'd ari'ceenne/ uni kun doshkina piye/ mo tani pu'dkin mo dhali owa Buteris gwo mo ki: Ka jin gana/ /e ta jan ṭal 'de/ si'da/ 'peni uni mo haali/ 'twam pini ṭor/ e eya tente/ mo be. <sup>74</sup> Yan'ko'd a'di telki mii 'pen mo mmojee is pitj wa ki is pitj mo dhali mmoothul gwo me'da po/ mo mmo/o gwo mo ki: Aha/ dinaki mish wathi/ yan mo be. Dhali ki jahanne/ adhongola ḥwa gwoki'd mo. <sup>75</sup> Dhala Buteris ka gwo ma Yesus e mo jin ona a'di a'di nt̄wa/a/: Ka dhongola ḥwa diki ko e mo naskina/ tani /e mini wat̄ aha/ gway me'di kwara mo. Dhali a'di yaki'd ka piye/ mo dhali ko ki jabu'th ki ƙu'bu/ ƙu'bu/ mo be.

## 27

### *Jesus Suskunu mo Mbwambor ma Bilaatus mo be*

<sup>1</sup> Dhali ki mon'thamo/ pu'dki'd mo tani aris igasiis kun can dhali 'kwaniŋ gwanyjaka/ gi 'kwani mo uni gamki 'twa/ 'kup apowa Yesus mo mmokar a'di mmowu mo be. <sup>2</sup>Dhali uni ki dek a'di mo dhali sus a'di mo dhali mmoci a'di ka Bilaatus jin ta'da mudhiir mo be.

### *Jwa ma Yahuusa mo*

<sup>3</sup> Ka Yahuusa jin ta'da man'cith a'di is ki gwo parki a'di e mo ki a'di wakkunu mo tani a'di rici'da

du is mo dhali a'di ki 'doyu 'dolkon kush jin ta'da iss 'de/ i'ce'dka 'kume'd ka nyar'ko'd mo e igasiis kun can mo dhali 'kwanij gwanyjaka/ mo <sup>4</sup>mmo/ o gwo mo ki: Aha/ miikina miinthus mo mmo'cith a'di is ki gwo mo, a'di jin din ma bas ka po/ mo. Dhali uni ki thok a'di gwo mo ki: A'di yan ta'da ta gom am mo? Hili is pini 'teyi e ma. <sup>5</sup> Dhali a'di ki ta'k 'dolkon kush e gu'b gi mondheleladhelel mo dhali a'di ki pi ka pije/ mo dhali ya mo dhali shir is piti ka nyok mo be. <sup>6</sup> Hili igasiis kun can uni bu'thki 'dolkon kush mo mmo/o gwo mo ki: A'di diki ta mii jin dhala gwonjan bway mo mmodhu uni mo e mo jin dhunuwa guurush mo haali/ uni tana guurush ma bas mo be. <sup>7</sup> Wakan uni gamki 'twa/ 'kup mo mmobu'th uni mo dhali yol mo gi iman/uka nos mo mmokan 'kwani kun ta yilkina/ nycine/ mo be. <sup>8</sup> Wakan mombunto yan yukkunu gway ki Mombunto ma Bas mo ntaga tee yansan mo be. <sup>9</sup> Wakan gwo thimkunu mo, a'di jin okin ma manci gwo ma Arumgimis kadhamo/ mo jin ta'da Irmiya mo mmo/o gwo mo ki: Dhali uni bu'thki 'dolkon kush kun 'kon i iss 'de/ i'ce'dka 'kume'd mo jin ta she/ yol piti mo, a'di jin ta she/ yol jin karkina unin tiya kun ta iya/ gi uci ma Israyiil mo be. <sup>10</sup> Dhali uni ki ci uni gom uni kun cila mombunto ma iman/uka nos mo be me'd gwo jin shukina tapa aha/ bway mo be.

### *Bilaatus Dotki'da Yesus Gwo mo be*

<sup>11</sup> Dhala Yesus doshki'd mbwambora mudhiir mo dhala mudhiir ki dot a'di gwo mo ki: Ki /e de /e tana Malik gi 'Kwani Yahuuda/ mo? Dhala Yesus ki thok a'di gwo mo ki: A'di ta gwo jin ona /e si'da/ mo be. <sup>12</sup> Hili ki a'di yerkunu is ki gway mo ki igasiis

kun can mo dhali'kwaniŋ gwanyjaka/ mo tani a'di diki thok 'twaŋ kamu/ mo be. <sup>13</sup> Dhali yan'ko'da Bilaatus ki o a'di gwo mo ki: Dina /e ki ciŋ gwo mo 'taa? ama'diny gwo kun ona uni apo/ /e mo? <sup>14</sup> Hili a'di diki ci a'di 'twan thoka 'de/ mo walla ari gwoŋ kamu/ jin yerkunu a'di is ki gway mo. Wakan ntaga mudhiir a'di merki'd kagahara mo be.

### *Yesus Torkunu Gwo 'Twa/a 'Cesh mo Mmowu mo*

<sup>15</sup> Dhali ka yuŋ jin yuŋ mo tani mii ma mudhiir isa yempa/ mo mmo'cukka waambuhany jan tal 'de/ 'peni uni habuus mo a'di jin dotkina uni mo be. <sup>16</sup> Dhali uni tan gi wathi/ eya sijin jin mishu 'baar mo eya tente/, a'di jin yuŋkunu gway ka Baraabas mo be. <sup>17</sup> Wakan uni tulki is mo mmontal 'de/ mo dhala Bilaatus ki o uni gwo mo ki: Kaja i/ o um bwa jin migā/ 'cukki um mo, a/Baraabas 'taa? walla Yesus a'di jin yuŋ ka Kristhos mo? <sup>18</sup> Haali/ a'di mishki dhapan buni jin takina uni mo mmoči a'di mo be. <sup>19</sup> Isa dhamo/ 'teya ki a'di diki'd mmoča'ba kursi jin dwallu gwo jin ta jim piti mo tani ashim piti hashki a'di gwo mo mmodhalku/ tonŋ kamu/ ki mii apo/ wathiŋ ƙar/e yan mo haali/ aha/ ṭo'ckunu bwa kagahara shwane/ gom a'di mo ki gwony jan mo be. <sup>20</sup> Dhali igasiis kun can dhali 'kwaniŋ gwanyjaka/ uni lalki 'kwani sho'k ki gwo mo mmodot gwo mo goma Baraabas mo dhali mmo'ce'da Yesus sho'k mo be. <sup>21</sup> Dhala mudhiir ki o uni gwo mo dok/e ki: Jana 'peni bwam uni su/ jin o um bwa mo jin migā/ 'cukki um mo? Dhali uni ki thok gwo mo ki: aBaraabas be. <sup>22</sup> Dhala Bilaatus ki o uni gwo mo ki: Dhali aha/ mina miya tinta ka

Yesus mo a'di jin yuku gway ka Kristhos mo? Uni 'baar mo thok gwo mo ki: Dhalki a'di 'koshu ki cwany'cithan dhul mo. <sup>23</sup> Dhali a'di ki thok uni gwo mo ki: Gomata sa/? Tonthus gi wakatinta imiikina a'di mo? Hili uni cuukin kagahara mo mmontal 'de/ mo mmo/o gwo mo ki: Dhalki a'di 'koshu ki cwany'cithan dhul mo.

<sup>24</sup> Wakan ka Bilaatus parki a'di e mo ki a'di mol gwo pi jipi/ mo tani hili a'di ki dhal mii e i is mo goma dulatt jin telkunu 'pen mo tani a'di ki bu'th yi'de/ mo dhali 'thur me'd piti mo mbwambor ma waambuhany 'kwani mo mmo/o gwo mo ki: Aha/ dina ka po/ 'pena bas gi wathi/ yan mo. Hili a'di 'te/ ki is bumi niin ma. <sup>25</sup> Dhali aris 'kwani 'baar mo thok a'di gwo mo ki: Abas piti midi di apo/ aman mo dhali apo/ ucim bam mo be. <sup>26</sup> Dhali yan'ko'd a'di ki 'cukki uni aBaraabas mo dhali ki a'di dorki'da Yesus ki yis bip mo tani a'di ki ci a'di mmo'kosh ki cwany'cithan dhul mo be.

### *I/askar Miikina Yesus ka Mak mo*

<sup>27</sup> Dhali yan'ko'd i/askar ma mudhiir uni ki susa Yesus mo e bwaagon gi gu'b ma mudhiir mo dhali uni ki tula askar isi 'baar mo mmontal 'de/ mo ibwambori a'di mo be. <sup>28</sup> Dhali uni ki 'cuk a'di burrinye/ mo dhali hi'th a'di is ki burrinye/ jin ta'da duk is mo be. <sup>29</sup> Dhali uni ki thoson ton'kup 'pena 'de/ mo dhali uni ki hi'th a'di i'kup piti mo dhali uni ki kar a'di gulucha cwahan e me'da bim poros piti mo dhali luŋ ki jin 'kupa'dupuni bwambori a'di ka mak mo mmo/o gwo mo ki: Hayy, Malik gi 'Kwani Yahuuda/ mo. <sup>30</sup> Dhali uni ki 'tak a'di manya/ i is mo dhali uni ki bu'th gulu'c mo dhali dor a'di e 'kup piti mo be. <sup>31</sup> Dhali ki uni miiki

a'di ka mak mo tani uni ki 'cuk a'di burrinyen duk  
is mo dhali uni ki hi'th a'di burrinyem piti i is  
mo dhali uni ki sus a'di ka piye/ mo mmo'kosh ki  
cwany'cithan dhul mo be.

*Mo gi 'Koshuwa 'Kosh ki Cwany'cithan Dhul mo*

<sup>32</sup> Me'd jin 'kokina uni mmoya ka piye/ mo tani  
uni pu'dkin mo e wathi/ gi Panj Kerawaan jin  
yuku gway ka Simaan mo. Wathi/ yansan a'di  
tu'ckina uni mo mmokal cwany'cithan dhul piti mo  
be. <sup>33</sup> Dhali ki uni pu'dkin mo e mo jin yuku ka  
Gulgutha mo tani (a'di jin ta 'pemen gwo jin onu  
ki: Mo ma Simanj 'Kup mo) <sup>34</sup> uni ki ci a'di yimana  
mura'th jin 'koshu e ki ton ka/ga/ mo. Hili ki a'di  
nyokki a'di mo tani a'di ushki a'di pi mo be. <sup>35</sup> Dhali  
ki uni 'koshki a'di ki cwany'cithan dhul mo tani  
uni ki kwa/ burrinyem piti bwa mo e bwam uni  
'cena mo mmota'k to mo. <sup>36</sup> Yan'ko'd uni ki 'ko  
a'cesh mo dhali rash 'ko mo mmotim a'di apo/ mo  
be. <sup>37</sup> Dhali apo/ 'kup piti mo tani uni ki 'kwar  
gwo apo/ a'di mo jin denju e mo ki: Yansan ta'da  
Jesus jin ta'da Malik gi 'Kwani Yahuuda/ mo be.  
<sup>38</sup> Dhali 'kwani su/ kun tana 'di/ nyakkunu 'kosh ki  
a'di mo ki cwany'cithan dhul mo, jan 'de/ ki me'da  
bim poros piti mo, dhali jan kamu/ ki me'da biny  
cam piti mo be. <sup>39</sup> Dhali uni gwansan kun iikin ki  
iimpe e bway mo tani uni sorki a'di mo mmopir  
'kup buni mo be, <sup>40</sup> dhali mmo/o gwo mo ki: /E  
jin mini 'taki 'kosh gu'b gi mondheleladhelel mo  
dhali nyaj a'di ka cim kwara mo tani wothi is  
pini mo. Wakki/ /e ta Ya/ ma Arumgimis mo, ba  
thulu ka 'cesh 'peni apo/ cwany'cithan dhul mo.  
<sup>41</sup> Wakan si'da/ igasiis kun can dhali iman'kwar to

mo dhali 'kwaniŋ gwanyjaka/ mo tani uni miiki a'di ka mak mo mmo/o gwo mo ki: <sup>42</sup> A'di wothki tiya mo tani is piti mola a'di woth moyi. Dhalki a'di thulu'd ka 'cesh shwane/ 'peni apo/ cwany'cithan dhul mo, dhali ana mina gam a'di gwo is mo be. <sup>43</sup> A'di gamki'da Arumgimis gwo is mo. Dhalka Arumgimis 'cuk a'di mo shwane/ wakki/ a'di ona bwa ki a'di mo, haali/ a'di o gwo mo ki a'di ta Ya/ ma Arumgimis mo be. <sup>44</sup> Dhali unin 'di/ kun nyakkunu 'kosh ki cwany'cithan dhul nyakki a'di mo tani uni si'da/ wakki a'di ki gwon 'de/ yan mo be.

### *Mowu ma Yesus mo*

<sup>45</sup> Dhali shwane/ ka tente/ ta'da tente/ mbwanj 'kup mo tani adhan mondhumumi'd pu'dki'da po/ mony'ceshi 'baar mo ntaga tente/ mbum 'ban mo be. <sup>46</sup> Dhali ka tente/ ta'da tente/ kwara mo tani Yesus gwoki'd ki 'twa/ jin caaca mo ki: Ili, Ili, lama sabaktani, a'di jin ta 'pemen gwo jin onu ki: Arumgimis pem, Arumgimis pem, atinta dhalkina / e aha/ 'pen kan mo? <sup>47</sup> Dhali unin tiya kun doshkin ki 'dishe/ cikki a'di mo dhali o gwo mo ki: Wathi/ yukki'd Iliyya mo be. <sup>48</sup> Dhali jan tal 'de/ 'peni uni a'di guski'd ki jahanne/ mo dhali a'di ki kala lipa/ mo dhali 'tu'd a'di ki yiman tom 'paça'd mo dhali kar a'di eya cwahan mo dhali a'di ki ciki a'di mo mmopi mo be. <sup>49</sup> Hili kun tiya o gwo mo ki: Cori naskina/ bala/. Dhalki ana para mo e mo wakki/ Iliyya midi thulu/ mo mmowoth a'di mo. <sup>50</sup> Dhala Yesus cuu'd ki dhan 'twa/ jin caaca dok/ e mo dhali a'di ki ci shi/in piti mo be.

<sup>51</sup> Dhali hili mo mo ma, burrinye/ gi gu'b gi mondheleladhelel mo a'di dherkunu bwa mo ka

'ban su/ mo 'peni buŋ'kup mo ntagi bum'pen mo, dhali mony'cesh yiŋki is mo, dhali aris woshi 'baar mo pwathkunu bwa mo be. <sup>52</sup> Dhali mon'kupaje si'da/ uni ɬa'dkunu 'twa/ mo, dhali aris bunjwar is gi uni kun dhunu ki she/ ki dhelel dhelel mo uni gun ishki e mo e mowu mo tani uni cukunu mis mo be. <sup>53</sup> Dhali mmopikina uni ka pije/ 'peni jis jwa mo tani 'ko'di mompim piti mo tani uni iikin e 'penkuman bampa/ jin ɬogu mo dhali piki 'kwani i is ka ris mo be. <sup>54</sup> Dhali ka mancil ma askar iss 'kwanim pa mmudhe'd dhali uni gwansan kun nyak 'ko ki a'di mo tani uni rashkina Yesus tim mo mmopar mony'cesh e mo mmoyiŋkin is mo dhali to gwansan kun bu'thki embul mo mo tani uni 'tu'dkunu mo ki mon̄ko/ is mo dhali o gwo mo ki: Ka jin̄ gana/ yansan ta Ya/ ma Arumgimis mo be.

<sup>55</sup> Wakan si'da/ up 'kokin ka ris mo mmun mmo-hil mo 'pena dhana/ mo, uni gun bat̄hkina Yesus nsho'k mo 'peni Pany Jaliil mo mmota imanmii a'di to mo be. <sup>56</sup> Dhali e bwaman uni mo tani aMariyam Magdaliyya diki'd mo dhala Mariyam jin to Ko Yakuub mo dhala Yuusup mo dhali ko iya/ ma Sabadi mo be.

### *Mo jin Kanuwa Yesus mo*

<sup>57</sup> Dhali ki mo ta mom'pimpili/ mo tani wathi/ jin ta pa ki pa pu'dki'd mo 'peni Pa Arraama jin yukkunu gway ka Yuusup mo, a'di si'da/ jin ta'da manciŋka Yesus gwo mo be. <sup>58</sup> A'di yaki'd mo eya Bilaat̄us mo dhali doṭ a'di gwo mo gom bunjwar is ma Yesus mo. Dhali yan'ko'd Bilaat̄us ki ɬan gwo mo ki a'di minu ci ki a'di mo be. <sup>59</sup> Dhala

Yuusup ki bu'th bun̄gwar is mo dhali 'tam a'di is ki burrinyen dhelelga/ jin ta'da dhiny e mo be. <sup>60</sup> Dhali 'thi a'di e jis pitin gana/ jin ta jis jwan this mo, a'di jin 'kolkina a'di wosh mo. Dhali a'di ki 'daŋkal wosha caaga/ mo mmo'dap 'twaŋkal jis jwa 'twa/ mo, dhali a'di ki ya mo be. <sup>61</sup> Mariyam Mag-daliyya dhali Mariyama kamu/ nyakki 'ko mmun mo mmo'ko ka par 'twa/ gi moŋ'kupaje mo be.

*Imanji Mo mo e Moŋ'kupaje mo*

<sup>62</sup> Dhali ka cim jinj 'ko'd mo, a'di jin ta'da cim jinj 'ko'd jin Thosonkunu to mo tani igasiis kun can dhali 'Kwani Parisiyiin tulki isi bwambor ma Bilaat̄us mo be, <sup>63</sup> dhali o gwo mo ki: Tapa, am kakina gwo e jin okin ma manhe'k 'kwani e mo ki a'di di'd ki e mo naskina/ mmo/o gwo mo ki: 'Ko'da cim kwara mo tani aha/ mina cuyu mis dok/e mo be. <sup>64</sup> Wakan ki /e mini ḁan gwo mo ki moŋ'kupaje minu mii ji mo ki 'dantar mo ntaga cim kwara mo, isi ciki/ ki imanciḳ a'di gwo mini 'koki ii mo dhali ḁwal is piti mo dhali tor 'kwani gwo mo ki: A'di piki'd 'peni mowu mo, dhali gwonthus jin ta jinj 'ko'd jin minu o mo tani a'di midi war ki shi/ kagahara mo mmobol jin ṫwa/ a/ e mo be. <sup>65</sup> Bilaat̄us ki o uni gwo mo ki: Um tan ga askar kun ji mo mo. Iiku/ mo ma, mmoji a'di ki 'dantar mo me'd jin misha um a'di mii mo be. <sup>66</sup> Wakan uni iikin mo dhali ji moŋ'kupaje mo, dhali uni ki 'dap wosh 'twa/ ka 'dinjkila/ mo dhali dhu imanji mo mo be.

<sup>1</sup> Dhali 'ko'da cim ma pesu/ mo tani ki mo  
 kali kush mo ka cim jin twa/a/ ka dhas mo tani  
 aMariyam Magdaliyya dhala Mariyama kamu/  
 uni iikin mo mmopar mon'kupaje e mo be. <sup>2</sup>Dhali  
 hili mo mo ma, adhan mony'cesh yikinki is mo  
 kagahara haala man'doyu gwo gi tapa thulki'd mo  
 'peni momis mo dhali pu'du/ mo dhali ka'c wosh  
 ka nyan'ko'd mo dhali a'di ki ça'ba po/ a'di mo  
 be. <sup>3</sup>Jamas piti jin piyina a'di mo tani a'di wana  
 e ka wara sho'k mo dhali burrinyem piti ça'bki  
 bany bany mo me'da wasan gana/ mo be. <sup>4</sup>Dhali  
 gom is jin kogu a'di mo tani imanji mo mo uni  
 deekina is mo dhali uni wakina e gi 'kwani kun  
 wukin mo be. <sup>5</sup>Hila man'doyu gwo ki o up gwo  
 mo ki: Dhalku/ is ki ko/ mo ma, haali/ aha/ misha  
 ki um ŋapkina Yesus jin 'koshkunu jwa mo ki  
 cwany'cithan dhul mo be. <sup>6</sup>A'di yisa di'di mahana,  
 haali/ a'di cuki mis mo me'd gwo jin ona a'di mo.  
 Iiyu/ mo ma, mmopar mo e mo jin ishkina a'di  
 nycine/ mo. <sup>7</sup>Dhali yan'ko'd iiyi ki jahanne/ mo  
 dhali tor imancik a'di gwo gwo mo ki a'di cuki mis  
 mo 'peni mowu mo. Dhali hili mo mo ma, a'di  
 midi ya ntwa/a/ ki um mo e Pany Jaliil mo be.  
 Dhali e mun mo tani um mini gam a'di mo. Hili  
 aha/ torkina um gwo mo be. <sup>8</sup>Wakan uni iikin ki  
 jahanne/ mo 'peni mony jis jwa mo ki monko/ is  
 mo dhali ka dhan bwan 'kunyga/ mo, dhali uni  
 sokin mo mmotor imancik a'di gwo gwo mo be.  
<sup>9</sup>Dhali hili mo mo ma, aYesus gamki uni 'kup mo  
 dhali o gwo mo ki: Hayy. Dhali uni pu'dkin mo  
 dhali bu'th a'di i sho'k piti mo dhali luŋ a'di mo be.  
<sup>10</sup>Dhali yan'ko'd Yesus ki o uni gwo mo ki: Dhalku/

is ki ƙo/ mo ma. Iiku/ mo ma, dhali ƙor iwaƙ pem gwo mo mmo/ii mo e Pany Jaliil mo dhali uni mini par aha/ e i mun mo be.

### *Imanji Mo mo Wankunu Is mo be*

<sup>11</sup> Ki uni 'kokin mo mmo/ii mo tani hili mo mo ma, kun tiya 'peni uni gun ta imanji mo mo tani uni ii kin mo e 'penkuman bampa/ mo dhali ƙor igasiis kun can gwo mo goma ris to gwansan kun bu'thki embul mo mo be. <sup>12</sup> Dhali ki uni tulki is mo mmontal 'de/ mo nyakki 'kwaniŋ gwanyjaka/ mo dhali gam 'twa/ 'kup mo tani uni ki ciya dhana guurush ki i/askar mo be <sup>13</sup> mmo/o gwo mo ki: Tori 'kwani gwo mo ki: Imancik a'di gwo pu'dkin mo mon'thiny mo dhali ƙwal a'di mo ki aman 'kokina mmo/ish e mo be. <sup>14</sup> Dhali wakki/ gwo yansan midi pu'du/ mo e bwany'ce ma mudhiir mo tani aman mina lal a'di sho'k ki gwo mo dhali buƙ um 'ba/ mo 'peni monto'c bwa mo be. <sup>15</sup> Wakan uni bu'th kina guurush mo dhali mii a'di me'd jin kankunu uni gwo mo. Dhali gwo lolop yansan a'di kalu ki lala'th mo e bwan 'Kwani Yahuuda/ 'baar mo ntaga tee yansan mo be.

### *Yesus Hashki Uni kun 'Koni 'Kume'd I'ce'dka 'De/ mo*

<sup>16</sup> Dhali imancik a'di gwo kun 'koni 'kume'd i'ce'dka 'de/ mo tani uni ii kin mo e Pany Jaliil mo e 'kuwosh jin kankin ma Yesus uni gwo mo. <sup>17</sup> Dhali ki uni parki a'di e mo tani uni luŋki a'di mo. Hili kun tiya 'koni modhaŋ gwo mo be. <sup>18</sup> Dhala Yesus pu'dki'd mo dhali o uni gwo mo ki: Aris moshirri 'baar mo e momis mo dhali apo/ mony'cesh mo tani uni cikunu aha/ mo be. <sup>19</sup> Wakan iiku/ mo ma,

dhali waraa ris kal gi 'kwaniny'cesh ki imancik  
aha/gwo mo. Miiki uni ki yi'de/ ki gway ma Ababa  
mo dhali ki gway gi Ya/ mo dhali ki gway gi Shi/  
in Dheleladhelel mo be. <sup>20</sup> Tori uni gwo mo ma,  
mmodhu aris gwo gwansan uni gun kankika/ um  
mo, dhali hili mo mo ma, aha/ mina nya<sup>k</sup> di e um  
isa yempa/ mo ntagi yil gi mony'cesh yan midi di  
'kup mo be.

## **Gwo Ma Arumgimis Uduk New Testament and OT Portions**

copyright © 2005 SIM International

Language: Uduk

Translation by: SIM International

### **Uduk New Testament and OT Portions**

Published by Bible Alliance Mission, 1983.

• If you are interested in obtaining a printed copy, please contact the SIM at [www.sim.org](http://www.sim.org).

• This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-02

---

PDF generated using Haiola and XeLaTeX on 11 Nov 2022 from source files dated 29 Jan 2022

f734434c-b6bd-5d21-abc6-692c3842e034